

ବେଲୋର ସୁଲକି


ବେଲୋର ସୁଲକି











तमसो मा ज्योतिर्गमय

SANTINIKETAN  
VISWA BHARATI  
LIBRARY

082.83

RB 17 RL

253323

# আলোর ফুলকি

অবনীন্দ্রনাথ ঠাকুর



বিশ্বভারতী গ্রন্থনবিভাগ  
কলিকাতা



ফরাসী লেখক Edmond Rostand'এর রচিত গল্পের ভাবানুবাদ করেন  
Florence Yates Hann : *The Story of Chanticleer*

উহারই ভাবগ্রহণ করিয়া এই কাহিনীর রচনা ও ভারতী পত্রে

প্রথম প্রকাশ : বৈশাখ ১৩২৬ - অগ্রহায়ণ ১৩২৬

গ্রন্থাকারে প্রকাশ : বৈশাখ ১৩৫৪

সংস্করণ : বৈশাখ ১৩৬৩

পুনর্মুদ্রণ : আশ্বিন ১৩৭৯

ভাদ্র ১৩৮৬ : ১৯০১ শক

অন্তঃপট নন্দলাল বসু -অঙ্কিত

প্রচ্ছদ নন্দলাল বসু -অঙ্কিত ও মণীন্দ্রভূষণ গুপ্তের সৌজন্তে মুদ্রিত

অশ্চদ শ্রীবিনোদবিহারী মুখোপাধ্যায় -অঙ্কিত

প্রকাশক রণজিৎ রায়

বিশ্বভারতী । ৬ আচার্য জগদীশ বসু রোড । কলিকাতা ১৭

মুদ্রক সিদ্ধার্থ মিত্র

বোধি প্রেস । ৫ শঙ্কর ঘোষ লেন । কলিকাতা ৬





কুকড়ো গা-বাড়া দিয়ে গলা চড়িয়ে ডাক দিলেম :  
 আলোর ফুল, আলোর ফুল, দু-উ-উ-উল-কি-ই-ই আলোর! —

দূরে একটা মহা বন, সেখানে বসন্ত-বাউরি 'বউ-কথা-কণ্ড' ব'লে থেকে থেকে ডাক দেয় ; কাছে পাহাড়তলির আবাদের পশ্চিমে, ঢালু মাঠের ধারে, পুরোনো গোলাবাড়ির গায়ে মাচার উপর কুঞ্জলতার বেড়া-দেওয়া কোঠাঘর ; সেখানে একটা ঘড়ি বাজবার আগে পাপিয়ার মতো 'পিয়া পিউ' শব্দ করে। যার বাড়ি তার পাখির বাতিক ; পোষা পাখি, বুনো পাখি, এই গোলাবাড়ির আর কোঠাবাড়ির ফাঁকে ফাঁকে কত যে আছে ঠিক নেই, কেউ দরজা-ভাঙা খাঁচায়, কেউ হেঁড়া বুড়িতে, চালের খড়ে, দেয়ালের ফাটলে বাসা বেঁধে সুখে আছে। ও-পাড়ার ডালকুন্তো তন্মা মাঝে মাঝে মুরগির ছানা চুরি করতে এদিকে আসে, কিন্তু পাখিদের বন্ধু পাহাড়ী কুস্তানি জিম্মার সামনে এগোয়, তার এমন সাহস নেই। বাড়ি যার, সে যখন বাইরে গেল, পাহারা দিতে রইল জিম্মা, আর রইল মোরগ-ফুল-মাথায়-গোঁজা কুকড়ো— সে এমন কুকড়ো যে সবার আগে চোখ খোলে, সবার শেষে ঘুম তোলে।

এই কুকড়োর চার রঙের চার বউ। সাদি, মেমসাহেবের মতো গোলাপী ফিতে মাথায় বেঁধে সাদা ঘাগরা প'রে ঘুর-ঘুর করছেন ; কালি, চোখে কাজল আর নীলাস্বরী শাড়ি-পর্যায় মাথায় সোনালী মোড়া বেনে খোঁপা, যেন কালতে ঠাকরন ; সুরকি, তিনি ঠোঁটে আলতা দিয়ে, গোলাপী শাড়ি প'রে যেন কনে বউটি ; আর থাকি, তিনি ধূপছায়া রঙের সায়া জড়িয়ে বসে রয়েছেন, যেন একটি আয়া।

বেলা পড়ে আসছে, গোলাবাড়ির উঠোনে বিকেলের রোদ এসেছে। সফেদি, সিয়াঙ্গ, সুরকি, থাকি, গুলবাহারি সব মুরগি মিলে জটলা করছে। বাচ্ছারা এক দিকে একটা কেঁচো নিয়ে টানাটানি মারামারি চেষ্টামেচি বাধিয়ে দিয়েছে ; ঘরের মধ্যে ঘড়ি সাড়া দিলে “পিয়া পিউ।” সফেদি বলে উঠল, “ওই পাপিয়া ডাকল।” থাকি তাড়াতাড়ি ছুটে এসে বললে, “পাপিয়া লো কোন্ পাপিয়া ? বনের না ঘরের ? ঘড়ির ভিতরে যার বাসা, সে কি ডাক দিলে।” সফেদি তখন ধান খুঁটে খুঁটে গালে দিচ্ছিল ; এবার খুব দূর থেকে শব্দ এল, “পিউ পিউ।” সফেদি বললে, “এ যেন বনেরই বোধ হচ্ছে। শুনছিস, কত দূর থেকে ডাক দিয়ে গেল।” ঘড়ির মধ্যে থেকে যে 'পিয়া' ব'লে থেকে থেকে দিনে রাতে অনেকবার ডাক দেয়

খাকি একবার আড়াল থেকে তার চেহারাখানি দেখে নেবার জন্তে থাকে-থাকে কুঠিবাড়ির দিকে ঘুরে আসে ; ‘পিউ’ বলে যেমন ডাকা, অমনি সে সোনার মন্দিরের মতো সেই ঘড়িটার কাছে ছুটে যায়, খুঁট করে দরজা বন্ধ হবার মতো একটা শব্দ শোনে, তখন চক্ষুশূল ছুটো ঘড়ির কাঁটাই সে দেখতে পায়। পাখি, যে ‘পিয়া পিউ’ বলে ডাকলে, তার আর দেখা পায় না, এমনি নিত্য ঘটে বারে বারে। ঘড়ির মধ্যে যে পাখি, সে এখনো ডাকে নি, ডেকে গেল বনের পাখিটা। শুনে খাকি বললে, “আঃ, তবু ভালো, এই বেলা গিয়ে ঘুলঘুলিতে আড়াসি পেতে বসে থাকি, আজ সে পিউ-পাখির দেখা নিয়ে তবে অল্প কাজ, রোজই কি কাঁকি দেবে।”

খাকি কেন যে ঘন ঘন ঘড়ি দেখে আসে, সফেদির কাছে আজ সেটা ধরা পড়ে গেল। খাকির মন-পাখি যে কোন্ পাখির কাছে বাঁধা পড়েছে, সবার কাছে সেই খবরটা জানিয়ে দেবার জন্তে সফেদি চলেছে, এমন সময় চালের উপর থেকে কে একজন ডাক দিলে, “সাদি, ও দিদি, ও সফেদি।” “কে রে, কে রে।”— ব’লে সাদি চারি দিক চাইতে লাগল। উত্তর হল, “আমি কবুত গো কবুত।” সফেদি রেগে বললে, “আরে তা তো জানি। কোথায় তুই ?”  
“ছাতে গো ছাতে।”

সাদি দেখলে, এক গাঁ থেকে আর-এক গাঁয়ে নীল আকাশের খবর বয়ে চলে যে নীল পায়রা তারি একটা একটুখানি জিরোতে আর একটু গল্প করে নিতে কোঠাবাড়ির আলসেতে বসেছে।

গোলাবাড়ির কুঁকড়োকে একটিবার চোখে দেখতে, তার একটুখানি খবর শুনে জীবনটা সার্থক করে নিতে পায়রা অনেক দিন ধরে মনে আশা করে আসছে ; সাদা মুরগির কাছে ঠিক খবর পাবে মনে করে পায়রা তাকে শুধোতে যাবে, এমন সময় উঠোনের কোণে একটা মাসকলাই চোখে পড়তেই সাদি সেদিকে ‘রও’ বলেই দৌড়ে গেল। সাদিকে কলাই খুঁটতে দেখে সুরকি ছুটে এল, কালি বালি গুলজারি সবাই এসে সাদিকে ঘিরে শুধোতে লাগল, “দেখি, কী পেলি। দেখি, কী খেলি। দেখি দেখি, কী কী।” সাদি টুপ করে মাসকলাইটা গালে ভরে ফিক করে হেসে বললে, “কট্ কট্ কলাট, মা-স ক-লা-ই।” ব’লেই সাদি কোঠাবাড়ির ঘুলঘুলির ধারে যেখানে খাকি চুপটি করে বসে ছিল, সেখানে চলে গেল।

সাদি বললে, “ওলো, ঘুলঘুলিটা খোলা পেলি কি।”

খাকি সাদিকে দরমার ঝাঁপে একটা ইঁহরের গর্ত দেখিয়ে বলছে, “যেমনি ঘণ্টা পড়বে, আর অমনি সে ওই গর্তটায় চোখ দিয়ে...”

এমন সময় পায়রা ডাক দিলে, খুব নরম করে, মিষ্টি করে, “ছুধি-ভাতি সাদি সাহাজাদী, ও সকেদি।”

এবার সাদি সাড়া দিলে, “নীলের বড়ি, নীল পোখরাজ। কী বলবে বলো।”

পায়রা খুব খানিক গলা ফুলিয়ে গদগদ সুরে বললে, “যদি একবার, একটিবার, বলব তবে — শুধু একটিবার যদি দেখাও...”

খাকি, সুরকি, গুলজারি সব মুরগি ইতিমধ্যে সেখানে জুটেছিল। তারা সবাই সাদির সঙ্গে বলে উঠল, “কী, কী, কী, কী দেখাব।”

পায়রা অনেকখানি ঢোক গিলে বললে, “তঁার মাথার মোরগফুলটি যদি একটিবার...”

সব মুরগি হেসে এ-ওর গায়ে চলে পড়ে বলতে লেগেছে, “চায় লা, চায় লা, দেখতে চায়, দেখতে চায়।”

পায়রা বলছে, “দেখবই দেখব, দেখবই দেখব,” আর আলসের উপর গলা ফুলিয়ে দৌড়ে বেড়াচ্ছে।

সাদা মুরগি তাকে ধমকে বললে, “অত ব্যস্ত কেন। আলসেটা ভাঙবে নাকি।”

পায়রা ডানা চুলকে বললে, “না, না, তবে কিনা আমরা তাঁকে ছেরেছা করে থাকি...”

সাদি বুক ফুলিয়ে বলে উঠল, “ছেরেছা কে না করে।”

খোপ ছেড়ে আসবার সময়, কবুতনিকে সে ফিরে এসে যে জগদ্বিখ্যাত পাহাড়তলির কুকড়োর রূপ-বর্ণনা শুনিয়া দেবে, দিব্যি করে এসেছে, সাদিকে পায়রা সে কথা বলে নিলে। সাদি ইতিমধ্যে আবার খান খুঁটে লেগেছিল, সে পায়রার কথার উত্তর দিলে, “চমৎকার, দেখতে চমৎকার, এ কথা সবাই বলবে।”

পায়রা বলছিল, কতদিন খোপের মধ্যে বসে তারা ছুটিতে তঁার ডাক শুনেছে, নীল আকাশ ভেদ করে আসছে, সোনার সূচের মতো ঝকঝকে সেই ডাক, আকাশ আর মাটিকে যেন বিনি স্তোর মালাখানিতে বেঁধে এক ক’রে দিয়ে।

কুঞ্জলতার আড়ালে বেড়ার গায়ে ভাঙা খাঁচায় তাল-চড়াই এদিক-ওদিক করছিল, হঠাৎ বলে উঠল, “ঠিক, ঠিক, সবারি প্রাণ তার জন্তে হটফটায়।”

এক মুরগি বলে উঠল, “কার কথা হচ্ছে, আমাদের কুঁকড়োর নাকি।”

চড়াই বলে উঠল, “কুঁকড়ো কি শুধু তোদেরই না তোরাই শুধু তার। তুই মুই সেই, তোরা মোরা তারা, তোদের মোদের তাদের, সবাই তার, সে সবার।”

কিছু দূরে গোবদামুখো পেরু বসে বসে এই-সব কথা শুনছিল, এখন আস্তে আস্তে পায়রার কাছে এসে, কুঁকড়ো যে এল ব’লে এবং এখনি যে সে তার চক্ষুকর্ণের বিবাদ ভঞ্জন করে কুঁকড়োকে দেখে জীবন সার্থক করতে পারবে, এই কথা খুব ঘটা করে জানিয়ে দিলে। পায়রা বললে, “পেরু মশায়, আপনিও তাঁকে চেনেন?”

পেরু গলার থলিটা ছলিয়ে বলে উঠল, “আমি চিনি নে! কুঁকড়োকে জন্মাতে দেখলেম, সেদিন।”

কুঁকড়োর জন্মস্থানটা দেখবার জন্তে পায়রা ভারি ব্যস্ত হয়ে উঠল। পেরু তাকে একটা পুরোনো বেতের পঁটেরা দেখিয়ে বললে, “এইখানে কুঁকড়োর জন্ম হয় কর্কট রাশিস্থে ভাস্করে, মুক্তোর মতো এক ডিম থেকে।” যে মুরগি এই ডিমে তা দিয়েছিলেন, তিনি এখনো বর্তমান কিনা, শুধোলে পেরু পায়রাকে বললে, “এই পঁটেরার মথোই তিনি আছেন, এখন বৃদ্ধা হয়েছেন, বড়ো একটা বাইরে আসেন না, কেবলই ঝিমোচ্ছেন, কুঁকড়োর কথা হলেই যা এক-একবার চোখ মেলেন।” ব’লেই পেরু সেই পঁটেরার কাছে মুখ নিয়ে বললে, “শুনছ গিন্নি, তোমার কুঁকড়োর এখন খুব বাড়-বাড়ন্ত” — বলতেই পঁটেরার ডালা ঠেলে বৃড়ি মুরগি হেঁয়ালিতে জবাব দিলে, “পুরোনো চাল ভাতে বাড়ে গো, ভাতে বাড়ে।” জবাব দিয়েই বৃড়ি পঁটেরার মধ্যে মুড়িসুড়ি দিয়ে লুকিয়ে পড়ল।

পেরু বলে উঠল, “আমাদের গিন্নি হেঁয়ালি বলতে খুব মজবুত, মুখে মুখে হেঁয়ালি জুগিয়ে বলতে এর মতো ছুঁজনে দেখা যায় না। কলির বিষ্ণুশর্মা অবতার কিম্বা চাগক্য পণ্ডিতাও বলতে পারো।” অমনি পঁটেরার মধ্যে থেকে জবাব হল, “ময়ূর গেলেন লেজ গুড়িয়ে, পেরু ধরলেন পাখা।” “দেখলে, দেখলে” বলতে বলতে পেরু সেখান থেকে সরলেন।

পায়রা সাদা মুরগিকে শুধোলে, “শুনেছি নাকি, সুখেও যেমন ছুখেও তেমনি, শীতে-বর্ষায় কালে-অকালে তাঁর গলার সুর সমান মিঠে।”

মুরগি উত্তর দিলে, “ঠিক, ঠিক।”

“শুনেছি তাঁর সাড়া পেলে শিকরে বাজ আর একদণ্ড আকাশে তিষ্ঠে থাকতে পায় না, সবার মন আপনা হতেই কাজে লাগে।”

“ঠিক, ঠিক।”

“শুনেছি, ডিমের মধ্যে যে কচি কচি পাখি তাদেরও রক্ষে করে তাঁর গান, বেজি আর ভাম বাসার দিকে মোটেই আসে না।”

অমনি চড়াই বলে উঠল, “তাওয়ায় চড়ানো ডিমসিদ্ধ খেতে।”

“ঠিক, ঠিক।”

পায়রা এবার আলসে থেকে একেবারে মুখ ঝুঁকিয়ে বললে, “আর শুনেছি নাকি তিনি কী গুণগান জানেন, যার গুণে তিনি নাম ধরে ডাক দিলেই পৃথিবীর রাঙা ফুল, তার শুনতে পায়, আর অমনি চারি দিকে ফুটে ওঠে, রাজ্যের অশোক শিমূল পারুল পলাশ জবাল পারিজাত গোলাপ আর গুল-আনার?”

“এও ঠিক সত্যি, ঠিক সত্যি।”

“আর নাকি যার গুণে এমন হয়, সে-মস্তুর জগতে তিনি ছাড়া আর কেউ জানে না।”

সাদা মুরগি উত্তর দিলে, “না। শুনেছি, তাঁর পিয়ারী যে পাখি, সেও জানে না, কী সে-মস্তুর।”

“তাঁর পিয়ারী পাখিরা জানে না বল।”

সাদা মুরগি উত্তর করলে না।

পায়রার একটিমাত্র পিয়ারী— কপোতনী ; কাজেই কুকড়োর অনেক পিয়ারী শুনে সে একটু চমকে গেল। চড়াই বলে উঠল, “অবাক হলে যে? কুকড়োর পিয়ারী অনেক হবে না তো কি তোমার হবে। তুমি তো বল কেবল ঘু ঘু, আর তিনি যে নানা ছন্দে গান করেন।”

পায়রা বললে, “কী আশ্চর্য। তাঁর সব চেয়ে পিয়ারী মুরগি, সেও জানে না তবে কী সে মহামন্ত্র।”



অমনি সুরকি খাকি কালি সাদি গুলজারি যে যেখানে ছিল, সবাই একসঙ্গে বলে উঠল, “না গো না, জানি না তো, জানি না তো।”

এই-সব কথা হচ্ছে, ইতিমধ্যে দেখা গেল একটি মনুয়া কুঞ্জলতার পাতার উপর এসে বসেছে আর একটা সরু আটকাঠি আস্তে আস্তে মনুয়াটির দিকে বেড়ার ওধার থেকে এগিয়ে আসছে— কাঠির মাথায় সাপের চকরের মতো দড়ির কাঁস।

তাল-চড়াই মনুয়াটিকে দেখছে কিন্তু সেই একটুখানি মনুয়াকে ধরবার জ্ঞে অত বড়ো কাঁস-লাগানো আটকাঠিটা যে এগিয়ে আসছে, সেটা তার চোখে পড়ে নি। সে আপনার মনেই বকে যাচ্ছে, “মন-মনুয়া, বনের টিয়া।” হঠাৎ দূর থেকে কুকড়োর সাড়া এল, খবর-দারি...। অমনি চমকে উঠে মনুয়া-পাখি ডানা মেলে উড়ে পালাল, আটকাঠিটা সাঁ করে একবার আকাশ আঁচড়ে বেড়ার ওধারে আস্তে আস্তে লুকিয়ে পড়ল।

চড়াইটা অমনি ব্যঙ্গ করে বলে উঠল, “দেখলে কুকড়োর কীর্তি। এইবার কর্তা আসছেন।”

কুকড়ো আসছেন শুনে সবাই শশব্যস্ত। পায়রা এদিক-ওদিক ঘাড় ফিরিয়ে দেখছে, তাল-চড়াই সেটা সহিতে না পেরে বললে, “এমনি কী অদ্ভুত কুকড়োর চেহারাখানা। পাকা ফুটিতে ছুটি শজনেখাড়া গুঁজে দাও, মাথার দিকে একটা বিটপালং কিম্বা কতকটা লাল পুঁইশাক, চোখের জায়গায় ছুটো পাকা কুল, কানের কাছে ঝোলাও লাল ছুটো পুলি-বেগুন, লেজের দিকে বেঁধে দাও আনারসের মুকুটি— বস, জলজ্যাস্ত কুকড়োটা গড়ে ফেলো।”

পেরু এই কুকড়োর রূপ-বর্ণনা খুব মন দিয়ে শুনছিল, আর তাল-চড়াইয়ের বুদ্ধির তারিক করছিল। পায়রা গলা ফুলিয়ে বললে, “চড়াই ভায়া, তোমার কুকড়ো যে সাড়া দেয় না, দেখি।” চড়াই বললে, “ওই ডাকটুকু ছাড়া আর সবখানি ঠিক কুকড়ো হয়েছে, না?”

পায়রা রেগে গলা ফুলিয়ে বলে উঠল, “বোকো না, বোকো না, মোটে না, মোটে না, বোকো না।” ঠিক সেই সময় বেড়ার উপরে রূপ করে এসে কুকড়ো বসলেন। পায়রা দেখলে মানিকের মুকুট আর সোনার বুক-পাটায় সেজে যেন এক বীরপুরুষ এসে সামনে দাঁড়িয়েছেন। সন্ধ্যার আলো তাঁর সকল গায়ে পলকে পলকে রামধনুকের রঙ ধরে ঝিকমিক ঝিকমিক করছে, দৃষ্টি তাঁর আকাশের দিকে স্থির। মিষ্টি মধুর সুরে তিনি ডাকলেন,

“আ-লো। আ-লো। আ-লো।” তার পর তাঁর বৃকের মধ্যে থেকে যেন সুর উঠল, “অতুল-ফু-উ-ল। আলোর ফুল! আলো— প্রাণের ফুলকি আলো, চোখের দৃষ্টি আলো, এসো ফুলের উপর দিয়ে, শিশির মুছে দিয়ে, এসো পাতায়-লতায় ফুলে ঝিক্‌মিক। আলোতে ঝিক্‌মিক— দেখা দিক, সব দেখা দিক, ভিতরে যাক তোমার প্রভা, বাইরে থাক তোমার আভা, একই আলো ঘিরে থাক শত দিক শতধারে, অনেক আলোর এক আলো, অনেক ছেলের এক মা। তোমার স্মৃতি গাই আলোকবাদিন, আলোকের স্তোতা। তোমায় দেখি ছোটো হতে ছোটো, বড়ো হতে বড়ো, নানাতে, নানা কালে— কাচে, মানিকে, মাটিতে, আকাশে, জলে-স্থলে; সকালে জ্বলজ্বল, সন্ধ্যায় ঝিলমিল, মন্দিরে, কুটিরে, পথে বিপথে। ভিখারীর কাঁথার শোভা, রাজার পতাকায় প্রভা— আলো। বনের তলায় সোনার লেখা, সবুজ ঘাসে সোনার চুমকি, আলোর ফুলকি, আলপনা অ-তুল-উ-ল অমূল আলো।”

আর-সব পাখি যে-যার কাজে ব্যস্ত ছিল, কেউ ধান খুঁটছিল কেউ গা ঝাড়ছিল, গুলজারি করছিল কিচমিচ, সুরকি মাখছিল ধুলো, খাকি ঘাঁটছিল ছাইপাঁশ, কালি খুঁড়ছিল গর্ত, সাদি মাজছিল গা, পেরু বকছিল বকবক, চড়াই বলছিল ছি-ছি, কেবল সেই আকাশের মতো নীল পায়রা অবাক হয়ে শুনছিল—

জয় জয় আলোর জয়।

পায়রা আর স্থির থাকতে পারলে না, গলা কাঁপিয়ে ছুই ডানা ঝটপট করে বল উঠল, “সাধু সাধু।” কুকড়ো আঙিনায় নেমে পায়রাকে দেখে বললেন, “ধন্যবাদ হে অচেনা পাখি, এখন কি যাওয়া হবে।”

পায়রা বললে, “আপনার দর্শন পেয়ে কৃতার্থ হয়েছি, এখন ঘরে গিয়ে কপোতীকে আপনার আশীর্বাদ দিয়ে চরিতার্থ হই।” কপোতনীর প্রবালের মতো রাঙা পায়ে নমস্কার জানিয়ে কুকড়ো কবুতকে বিদায় করলেন। পায়রা তাল-চড়াইয়ের ভাঙা খাঁচায় ডানার এক ঝাপটা মেরে গাঁয়ের দিকে উড়ে গেল।

চড়াইটা গজগজ করতে লাগল, “সুঁড়ির জয় মাতালে কয়।” কুকড়ো ডাক দিলেন, “কাজ ভুলো না, কাজ ভুলো না।” আর অমনি রাজহাঁস সে আর চুপচাপ বসে রইল না,

পাতিহাঁস, চিনেহাঁস, সব হাঁসগুলোকে দিঘির পাড়ে জল খাইয়ে আনতে চলল। কুঁকড়ো হুকুম দিলেন, যত কুঁড়ে হাঁসের ছানা সবাইকে বেলা পড়বার আগে অন্তত বত্রিশটা করে গুগলি সংগ্রহ করে আনা চাই। একটা বাচ্চা মোরগ, তাকে পাঠালেন কুঁকড়ো বেড়ার উপর দাঁড়িয়ে চারশো'বার 'ককুর-কু' বলে গলা সাধতে, এমন চড়া সুরে, যেন শুদিকের পাহাড়ে ঠেকে তার গলার আওয়াজ এদিকের বনে এসে পরিষ্কার পৌঁছয়।

বাচ্চা মোরগ গলা সাধতে একটু ইতস্তত করেছে দেখে কুঁকড়ো তাকে আশ্বে এক ঠোকর দিয়ে বুঝিয়ে দিলেন যে, তার বয়েসে তাঁকেও প্রতিদিন ঠিক এমনি করেই গলা সাধতে আর পড়া মুখস্থ কর্তৃস্থ সবি করতে হয়েছে। বাচ্চা মোরগের মা গুলজারি ছেলের হয়ে কুঁকড়োর সঙ্গে একটু কৌদল করবার চেষ্টা করতেই, “যাও, জালার মধ্যে ডিমগুলোতে তা দাও সারারাত।”— গুলজারির উপর এই হুকুম-জারি করে আর-সব মুরগিদের সবজি বাগানে যে-সব পোকা শাক-পাতা কেটে নষ্ট করছে, তার সব কটিকে বেছে সাফ করতে পাঠিয়ে দিয়ে কুঁকড়ো পের্টরার মধ্যে তাঁর মায়ের কাছে উপস্থিত। কুঁকড়োর মা তাঁকে ধমকে বলে উঠল, “এইটুকু বয়েসে তোর এই বিত্তে হচ্ছে। কেবল টো টো করে ঘুরে বেড়ানো।” কুঁকড়ো একটু হেসে বললেন, “মা, আমি যে এখন মস্ত এক কুঁকড়ো হয়ে উঠেছি।” “যাঃ, যাঃ, বকিস নে। ‘বেঙাচি বলাতে চান তিনি কোলা ব্যাং, ওরে বাপু সময়েতে সব হয়, চিল হন চ্যাং।’ আজ না হয় হবে কাল।” বলেই কুঁকড়োর মা পের্টরার ডালাটা বন্ধ করলেন।

সাদি, কালি, সুরকি, খাকি কুঁকড়োর মার চার বউ। কুঁকড়ো আসতেই তারা বলে উঠল, “ঘরে কুঁড়োটি নেই যে, তার কী করছ।” “চরে খাওগে” বলেই কুঁকড়ো গা-ঝাড়া দিয়ে বসলেন। একদল বসে-বসে খাবে আর পরচর্চা করবে, আর অল্পদল তাদের খোরাক জোগাবার জন্তে খেটে মরবে, কুঁকড়োর পরিবারে সেটি হবার জো নেই, তা তুমি উপোসই কর, আর না-খেয়েই মর। কাজেই কালি সাদি সবাই যেখানে যা পায়, হুমুঠো খেয়ে নিতে চলল। কিন্তু খাকি— সে নড়তে চায় না, সাদিকে চুপিচুপি বললে, “তোরা যা না, আমি সেই ঘড়ির মধ্যকার পিউ-পাখির সন্ধানে রইলেম।” বলে খাকি একটা ঝাঁপির আড়ালে লুকোল। আর-সব মুরগি গেছে, কেবল সুরকি বসে-বসে নখে মাটি খুঁড়ছে মুখ ভার করে, দেখে কুঁকড়ো

শুধোলেন, “তোর আজ হল কী।”

সুরকি ভয়ে ভয়ে ঢোক গিলে বললে, “কুঁক-ক বলি—”

কুঁকড়ো গম্ভীর মুখে বললেন, “বলেই ফেল্ না। বনিতার ভনিতার কবিতার কোনটা বাকি?” উত্তর হল, “বল তো ভালোবাস, কিন্তু—”

“কথাটা চেপে যাও ছোটো বউ, চেপে যাও।” কুঁকড়ো উত্তর করলেন।

ছোটো বউ ছাড়বার পাত্রী নয়, কান্না ধরলে, “না আমি শুনবই।” কুঁকড়ো বিরক্ত হয়ে বলে উঠলেন, “আর ছাই শুনবে কি-ই-ই।” কুঁকড়োকে সুরকি একলা পেয়ে কিছু মতলব হাসিলের চেষ্টায় আছে সব মুরগিই সেটা এঁচেছিল। তারা খাবারের চেষ্টায় কেউ যায় নি। এখন সাদি এক-কোণ থেকে আস্তে আস্তে বেরিয়ে এসে বললে, “তোমার পাটরানী আমি, সাদি।” কুঁকড়ো বিষম গম্ভীর হয়ে বললেন, “কে বললে— না।” সাদি একটু গলা চড়িয়ে বললে, “আমায় বলতেই হবে।” ইতিমধ্যে এক দিক থেকে কালি এসে বলছে, খুব বিনিয়ে বিনিয়ে, “কও, আমি তোমার সু-ও-রা-নী।” কুঁকড়ো ঠিক তেমনি সুরে উত্তর করলেন, “কি— না— বল— গা।” কালি সুর ধরলে “বল না, বল না...” অমনি সাদি বলে উঠল, “মস্তুরটা কী? যার গুণে তুমি গুণীর মতো গান গাও?” কাছে ঘেঁষে সুরকিও সুর ধরলেন, “হ্যাঁগা, শুনেছি তোমার গলার মধ্যে একটা পিতলের রামশিঙে পরানো আছে, আর তাতেই নাকি লোকে তোমার নাম দিয়েছে আম-পাখি।”

কুঁকড়ো ব্যাপার বুঝে খুব খানিকটা হেসে মাথা হেলিয়ে বললেন, “আছে তো আছে। এই গলার একেবারে টুঁটির ঠিক মাঝখানে খুব শক্ত জায়গায় সেটা লুকোনো আছে, খুঁজে পাওয়া শক্ত।” বীজমস্তুরটা মুরগিদের কানে দেবার জন্মে কুঁকড়ো মোটেই ব্যস্ত ছিলেন না, তবু খুব চুপিচুপি তাদের প্রত্যেকের কানের কাছে মুখ নিয়ে নিয়ে বললেন, “দেখো, মাঠের মধ্যে যখন চরতে যাচ্ছ, তখন খবরদার ঘাসের ফুল মাড়িয়ে না, ফুলের পোকা খেয়ো কিন্তু ফুল যেন ঠিক থাকে। খবরদার, যা-ও।”

মুরগিরা চলে যাচ্ছিল, কুঁকড়ো তাদের ডেকে বললেন, “জানো, যখন যাবে চরতে—”

এক মুরগি পাঠ বললে, “বাগিচায়।” কুঁকড়ো বললেন, “পয়লা মুরগি—” ইস্কুলের

মেয়েদের মতো সব মুরগি একসঙ্গে বলে উঠল, “আগে যায়।” কুঁকড়ো ছুঁকুম দিলেন, “যা—ও।” মুরগিরা যাচ্ছিল, কুঁকড়ো তাড়াতাড়ি তাদের ডেকে সাবধান করে দিলেন, “সড়ক পার হবার সময় রাস্তায় কী আছে, তা খুঁটে নেবার চেষ্টা করা ভুল, গাড়িচাপা পড়তে পার।”

মুরগিরা ভালোমানুষের মতো বেড়ার ফাঁকটার সামনে গিয়ে দাঁড়াল। কুঁকড়ো চারি দিক দেখে বললেন, “দুই তিন চার, সিধে হও পার।” ঠিক সেই সময় দূরে মটরগাড়ির ভেঁপু বাজল, “হাউ মাউ—খাউ।” কুঁকড়োর অমনি সাড়া পড়ল—ভেঁপুর চেয়ে জোর আওয়াজ—‘স বু-উ-উ-র।’ বেড়ার ধার দিয়ে সাঁ-করে খানিক ধুলো আর ধোঁয়া গড়াতে গড়াতে চলে গেল। মিনিট কতক পরে যখন সব পরিষ্কার হল, তখন কুঁকড়ো মুরগিদের যাবার পথ ছেড়ে একপাশে সরে দাঁড়ালেন। একে একে মুরগিরা চলল, সাদি খাকি গুলজারি। সুরকি সব-শেষে। সে কুঁকড়োকে বলে গেল, “কাব্যায়, যা-খাই তাতেই আজ তেল-তেল গন্ধ করছে, যেন তেলাকুচোর তেলফুলুরি।” ঝাঁপির আড়ালে খাকি মুরগি, সে মনে মনে বললে, ‘রক্ষে, তিনি আমাকে দেখেন নি, বাঁচলেম বাপু।’

২

সাদি, কালি, গুলজারি—এরা সবাই সেটা জানবার জন্তে ধরাধরি করছে। পায়রা থেকে চড়াই এমন-কি, টিকটিকি পর্যন্ত পাহাড়তলির এ-পাড়া ও-পাড়ার ছেলেবুড়ো যে যেখানে আছে, সবাই যে লুকোনো জিনিসের কথা বলাবলি করছে, কুঁকড়ো সেই লুকোনো জিনিসের খবরটা বৃকের মতো নিয়ে বসে আছেন; কিন্তু মুখ ফুটে কাউকে বলতে পারেন না, অথচ না বললেও বুক যে ফেটে যায়। অতি গোপনীয় বীজমন্ত্রটি যার কানে চুপিচুপি বলে দেওয়া চলে, এমন উপযুক্ত পাত্র—সে কোথা। এ যে অতি গোপন কথা, অতি নিগূঢ় রহস্য। মেয়েরা তো এ কথা একটি দিন চেপে রাখতে পারবে না। বিশেষত সাদি কালি সুরকি আর খাকি এমন সব গুলবাহারি গুলজারি, যাদের মুখ চলছেই, তাঁদের এ কথা একেবারেই বলা যেতে পারে না, শোনবার জন্তে তাঁরা যতই ইচ্ছুক থাকুক-না কেন। নাঃ, বুক ফেটে

যায় যাক, মনের কথা মনেই থাক্, গুপ্ত মন্তর, অন্তরের ভাবনা মন থেকে দূর করে যেমন আর সবাই, তেমনি আমিই বা কেন না থাকি— দিব্যি আরামে, পাহাড়তলির রাজবাহাছুর কুঁকড়ো। এইটুকুই যথেষ্ট, আর এইটুকুতেই আমার আনন্দ, কিমধিকমিতি। মনে মনে এই তর্কবিতর্ক করতে করতে বুক ফুলিয়ে কুঁকড়ো ধানের মরাইটার চার দিকে পা-চালি করছেন, আর এক-একবার নিজের দিকে ঘাড় বঁকিয়ে বঁকিয়ে নিজেকে নিজে তারিফ করছেন, ‘ক্যা খপ্-সু র তি ই-ই’। তাঁর মাথার মোরগফুলটা আর চোখের কোল থেকে বুলছে যে দাড়ি, তার মেহেদি রঙটা যে বনের টিয়া থেকে আরম্ভ করে লাল তুতির লালকেও হার মানিয়েছে, এটা কুঁকড়োকে আর বৃষ্টিয়ে দিতে হল না। তিনি খড়ের গাদার উপরে বুক ফুলিয়ে দাঁড়িয়ে আকাশের পানে একবার, মাঠের দিকে একবার, তাকিয়ে দেখলেন; সোনা আর মানিকের আভায় জল স্থল আকাশ রাঙিয়ে সন্ধ্যাটি কী চমৎকার সাজেই সেজে এসেছে। “আজকের মতো দিনের শেষ কাজ সাঁঝি-আলপনা দেওয়া হল, আজ করবার যা, তা সারা হয়েছে, কালকের চিন্তা কাল হবে, এখন আর কী, দুমুঠো যা জোটে, খেয়ে নিতে ছু-টি-ই-ই।” বলেই কুঁকড়ো একটিবার ডাক দিয়ে চালাঘরের মটকা থেকে নেমে বাসার দিকে দৌড়ে যাবেন, ওদিক থেকে শব্দ এল, ‘রঙ-ও-ও’! উঠানের মধ্যে শুকনো ঘাসের বোঝাটা একবার খসখস করে উঠল, আর তার তলা থেকে জিন্মা কুস্তানী খড় আর কুটোয় ঝাঁকড়া মাথাটা বের করে জুলজুল করে কুঁকড়োর দিকে চাইতে লাগল।

কুঁকড়ো আর কুকুরের চেহারায় মিল না হলেও নামে নামে যেমন কতকটা, কাজেও তেমনি অনেকটা মিল ছিল। ছুষ্ঠের দমন, শিষ্ঠের পালন দুজনেরই জীবনের ব্রত। কাজেই দুজনে যে ভাব খুবই হবে, তার আশ্চর্য কী। তা ছাড়া সূর্য আর মাটি ছয়েরই পরশ দুজনেরই ভালো লাগে। এই আকাশের আলো আর পৃথিবীর উপর ভালোবাসা এই ছুটি জীবকে যেন একসূত্রে বেঁধেছে। সূর্যের দিকে মুখ করে মাটির কোলে ছই পা রেখে না দাঁড়ালে কুঁকড়োর গান মোটেই খোলে না; আর কুকুর তার আনন্দই হয় না, রোদে মাটির উপরে এক-একবার না গড়িয়ে নিলে। জিন্মা প্রায়ই বলে, “সূর্যকে ভালোবাসে বলেই না সে চাঁদ দেখলেই তাড়া করে যায়, আর মাটিকে ভালোবাসে বলেই না সে গর্ত খুঁড়ে তার মধ্যে

মুখটি দিয়ে চূপটি করে থাকে।” ভালোবাসার বশে জিন্মা বাড়ির বাগানটায় এত গর্ত করে রাখত যে এক-একদিন বৃড়ো ভাগবত মালি কর্তার কাছে কুকুরের নামে নালিশ জুড়ত। কিন্তু জিন্মার সব দোষ মাপ ছিল, গোলাবাড়ির সব জানোয়ারের খবরদারি, ক্ষেতে না গোরুবাছুর ঢোকে তার দিকে নজর রাখা, এমনি সব পাহারার কাজে জিন্মার মতো আর তো হুঁটি ছিল না। তা ছাড়া জিন্মার জিন্মায় অমন যে কুঁকড়ো এমন-কি, তাঁর অত্যাশ্চর্য সুরটি পর্যন্ত রাত্রে না রাখলে চলে না; কাজেই কুকুর হঠাৎ যখন বললে, ‘রও’ তখন যে একটা বিপদের সম্ভাবনা আছে, সেটা জানা গেল। কিন্তু এমন কী বিপদ হতে পারে। কুঁকড়ো দেখলেন, অশ্বদিন যেমন আজও সন্ধ্যাবেলা ঠিক তেমনি চারি দিক নিরাপদ বোধ হচ্ছে, অস্তুত তাঁর এই গোলাবাড়ির রাজত্বের বেড়ার মধ্যে কোনো যে শত্রু আছে, তা তো কিছুতেই মনে হয় না। সে যে মিছে ভয় পাচ্ছে সেটা তিনি জিন্মাকে বুঝিয়ে দিতে চেষ্টা করলেন। ভয় কাকে বলে কুকুরের জানা ছিল না; কিন্তু মিথ্যুক আর মিছে নিন্দে রটাতে গোলাবাড়িতে আর পাড়াপড়শীর ঘরেতে যারা, তাদের সে ভালোরকমই জানত। কুঁকড়ো না জানলেও ঐ বোঁচা-ঠোট চড়াই আর ডিগডিগে-পা ময়ূর যে কুঁকড়োর হুই প্রধান শত্রু, সেটা জিন্মা কুঁকড়োকে জানিয়ে দিতে বিলম্ব করলে না। তালচড়াই, যার নিজের কোনো আওয়াজ নেই, হরবোলার মতো পরের জিনিস নকল করেই চুলবুল করে বেড়ায়, পরের ধনে পোন্দারি যার পেশা, আর ঐ ময়ূর, জরি-জরাবৎ আর হীরে-মানিকের ঝকমকানি ছাড়া আর-কোনো আলো যার ভিতরে বাহিরে কোথাও নেই, দরজি আর জছুরির দোকানের নমুনো-ঝোলাবার আলনা ছাড়া আর কিছুই যাকে বলা যায় না, এই অস্তুত জানোয়ার তাঁর প্রধান শত্রু শুনে কুঁকড়ো একেবারে ‘হাঃ হাঃ’ করে হেসে উঠলেন। জিন্মা বললে, “কারো সঙ্গে খোলাখুলি শত্রুতা করবার সাহস আর ক্ষমতা না থাকলেও এরা সবাইকে হয় মনে করে, এমন-কি, কুঁকড়োর নিন্দেও সুবিধা বুঝে করতে ছাড়ে না। এবং খাওয়া-পরা-সাজগোজের দিক দিয়েও এরা পাড়ার মধ্যে নানা বদ চাল চোকাচ্ছে। এদের দেখাদেখি অগুরাও বেয়াড়া বেচাল বে-আদব হয়ে ঞ্ঠবার জোগাড়ে আছে। সাদাসিধেভাবে খেটেখুটে পাড়াপড়শীকে ভালোবেসে আনন্দে থাকতে চায় যে-সব জীব, তাদের এই-সব

সাজানো পাখিরা বলে, ‘ছা-পোষার’ দল। আর নিষ্কর্মা বসে-থাকা পালকের গদিতে কিম্বা মাথায় পালক গুঁজে হাওয়া খেয়ে ঘুরঘুর করাকেই এরা বলে চাল। সেটা রাখতে চালের সব খড় উড়ে গেলেও এরা নিজের বুদ্ধির প্রশংসা নিজেরাই করে থাকে, আর অনেক সুবুদ্ধি পাখির মাথা ঘুরিয়ে দেয় ছবুন্ধি এই ছুই অদ্ভুত জানোয়ার, কথা-সর্বস্ব হরবোলা আর পাখা-সর্বস্ব চালচিত্র।”

কুঁকড়ো কাজে যেমন দড়ো, বুদ্ধিতে তেমনি ; চড়াই আর ময়ূরের চেয়ে অনেক বড়ো, দিলদরিয়া, কাজেই পৃথিবীতে অস্তুত এই গোলাবাড়িতে যে তাঁর কেউ গোপনে সর্বনাশের চেষ্টায় আছে, এটা বিশ্বাস করা কুঁকড়োর পক্ষে শক্ত। তিনি বললেন, “জিম্মা নিশ্চয়ই একটু বাড়িয়ে বলছে, অশ্বের সামান্য দোষকে সে এত যে বড়ো করে দেখছে, সে কেবল তাঁকে সে খুবই ভালোবাসে বলে। চড়াই হল তাঁর ছেলেবেলার বন্ধু আর ময়ূরটা লোক তো খুব মন্দ নয়। আর যদিই বা তাঁর শত্রু সবাই হয়, তাতেই বা ক্ষতি কী। তিনি তাঁর গান এবং মুরগিদের ভালোবাসা পেয়েই তো সুখী, নেইবা আর কিছু থাকল।”

জিম্মা অনেকদিন এই গোলাবাড়িটায় রয়েছে, এখানকার কে যে কেমন, তা জানতে তার বাকি ছিল না। কুঁকড়োর উপরে মুরগিদেরও যে খুব টান নেই, তারও প্রমাণ অনেকবার পাওয়া গেছে। “বিশ্বাস কাউকে নেই।” বলেই জিম্মা এমনি এক হুংকার ছাড়ল যে পাঁচিলের গায়ে চড়াই পাখির খাঁচাটা পর্যন্ত কেঁপে উঠল। “ব্যাপার কী!” বলে চড়াই-কুঞ্জলতার মাচা বেয়ে নীচে উপস্থিত। জিম্মা চড়াইকে সাফ জবাব দেবার জগ্গে চেপে ধরলে। আড়ালে একরকম আর কুঁকড়োর সামনে অশ্বরকম ভাব দেখানো আর চলছে না। বলুক সে-চড়াইটা সত্যিই কুঁকড়োকে পছন্দ করে কি না, না হলে আজ আর ছাড়ান নেই। চড়াই মনে মনে বিপদ গুনলে। কিন্তু কথায় তার কাছে পারবার জো নেই। সে অতি ভালোমানুষটির মতো উত্তর করলে, “কুঁকড়োকেও টুকরো-টুকরো ক’রে দেখলে বাস্তবিকই আমার হাসি পায় ; আর তার খুঁটিনাটি এটি-ওটি নিয়েই আমি তামাশা করে থাকি। কিন্তু সবখানা জড়িয়ে দেখলে কুঁকড়োকে আমার শ্রদ্ধাই হয় বলতে হবে। শুধু তাই নয়, কুঁকড়োর খুঁটিনাটি নিয়ে আমি যে ঠাট্টা-তামাশাগুলো করে থাকি, সেগুলো সবাই যে অপছন্দ করে



না, সে তো তুমিও জানো জিন্মা।”

জিন্মা ভারি বিরক্ত হয়ে বলে উঠল, “শোনো একবার, কথার ভাঁওরাটা শোনো। বাইরের বনে সোনার আলো, ফুলের মধু থাকতে যে পাখিটা দরজা-ভাঙা খাঁচায় বসে বাসি ছাত্তু খেয়ে পেট ভরাচ্ছে, তার কাছে পরিষ্কার জবাব আশা করাই ভুল।”

চড়াই বলে উঠল, “সাধ করে কি আমি খাঁচায় বাসা বেঁধেছি। বাইরে সোনার আলো আর সোনালি মধু সময়ে সময়ে যে সীসের গরম-গরম ছররা গুলি হয়ে দেখা দেয় দিদি।”

জিন্মা ভারি চটেছিল। উত্তর করলে, “আরে মুখখু, কোন্‌দিন কবে একটা-আধটা কাঠুঁজের খোলা টেলার মতো খুরে লাগল বলে বনের হরিণ সে কি কোনোদিন বনের থেকে তফাত থাকতে চায়, না আকাশে বাজ আছে বলে কেউ আকাশের আলোটা আর আকাশে ওড়াটা অপছন্দ করে। ভাঙা খাঁচার পুষ্টিপুস্তর হরবোলা। ফুলে-ফলে আলোতে-ছায়ায় অতি চমৎকার বনে-উপবনে যে মুক্তি, তুই তার কী বুঝবি।”

চড়াই উত্তর দিলে, “বেঁচে থাক আমার ভাঙা খাঁচার দাঁড়খানি। কাজ নেই আমার মুক্তিতে। রাজার হালে আছি, পরিষ্কার কলের জল খাচ্ছি, মস্ত সাবানদানিতে ছবেলা গরমের দিনে নাইতে পাচ্ছি, দোলনা চোকি, চানের টব বনে এ-সব পাই কোথা, বলো তো দিদি।”

জিন্মা এমন রেগেছিল যে, গলার শিকলিটা খোলা পেলে সে আজ চড়াইটার গায়ের একটি পালকও রাখত না, মেরেই ফেলত।

এই ব্যাপার হচ্ছে, এমন সময় বাড়ির মধ্যে ঘড়ি বাজল, ‘পি-উ’।

যেমন ‘পিউ’ বলা, অমনি খাকি মুরগি বুড়ির আড়াল থেকে বেরিয়ে সেদিকে দৌড়। গর্তের মধ্যে মুখ দিয়ে সে কিন্তু কিছুই দেখতে পেলে না; এবারও তার আশা পুরল না, সময় উত্তরে গেছে, পিউ-পাখি পালিয়েছে।

চড়াই খাকিকে বললে, “কী দেখছ গো। এক-পহরের ঘড়ি পড়ল নাকি।”

কুকড়ো খাকিকে গোলাবাড়িতে দেখে অবাক হয়ে বললেন, “তুই যে চরতে ঘাস নি ?”

খাকি চমকে উঠে ঘাড় ফিরিয়ে ডানার ঘোমটায় মুখ ঝাঁপলে।

কুকড়ো শুধোলেন, “গর্তটার মধ্যে মুখ গুঁজড়ে হচ্ছিল কী, শুনি।”

খাকি আমতা-আমতা করে বললে, “এই চোখ আর ঘাড়টা টনটন করছিল—”

“কাকে দেখবার জ্ঞে।” কুকড়ো শুধোলেন। খাকি বললে, “কাকে আবার।” কুকড়ো বললেন, “হাঁ, শুনি, কাকে।”

খাকি কান্নার সুর ধরলে, “তুমি বল কি গো।” কুকড়ো ধমকে বললেন, “চোপরাও, সতি কথ্য বল।” খাকি বিনিয়ে-বিনিয়ে বললে, “পিউ পাখিকে।”

কুকড়ো খাকির দিক থেকে একেবারে মুখ ফেরালেন, খাকি আস্তে আস্তে পগার পারে দৌড় দিলে।

কুকড়ো কুকুরকে বললেন, “একটা ঘড়িকে ভালোবাসা, এমন তো কোথাও শুনি নি। এ বুদ্ধি খাকিকে দিলে কে বলো তো।”

“ওই ছিটের মেরজাই-পরা চিনে মুরগিটার কাজ।” কুকুর উত্তর দিলে।

কুকড়ো শুধোলেন, “কোন্ মুরগিটি, বলো তো। ওই যেটা বড়ো বয়েসে ঠোঁটে আলতা দিয়ে বেড়ায় সেইটে নাকি।”

কুকুর উত্তর করলে, “হাঁ হাঁ, সেই বটে। তিনি যে আবার সবাইকে বৈকালি পার্টি দিচ্ছেন।”

“কোথায় সেটা হচ্ছে।” কুকড়ো শুধোলেন।

চড়াই উত্তর দিলে, “ওই কুল গাছটার তলায় যেখানে পাখি তাড়াবার জ্ঞে একটা খড়ের সাহেবি কাপড়-পরা কুশোপুতুলের কাঠামো মালী খাড়া করে রেখেছে, সেইখানে। খুব বাছা-বাছা নামজাদা পাখিরাই আজ যাবেন। কাঠামোর ভয়ে ছোটোখাটো পাখিরা সেদিকে এগোতেই সাহস পাবে না।”

কুকড়ো আশ্চর্য হয়ে বললেন, “বল কি, চিনে মুরগির বৈকালি!”

চড়াই ঠিক তেমনি সুরে উত্তর দিলে, “হাঁ মশায়, প্রতি সোমবার পাঁচ হইতে ছয় ঘটিকা পর্যন্ত মুরগি-গিন্নির ঘোরো মজলিস হইয়া থাকে।”

“তা হলে আজ বৈকালে—” কুকড়ো আরো কী শুধোতে যাচ্ছিলেন, চড়াই বলে উঠল, “না, আজ ভোরবেলায়।”

“ভোরবেলায় বৈকালি তো কখনো শুনি নি হে।” কুকড়ো আশ্চর্য খুবই হলেন। চড়াই

তখন কুঁকড়োকে বুঝিয়ে দিলেন, “ভোর পাঁচটায় বাগানে মালী তো থাকে না, তাই বিকেল ৫টা না করে সকাল ৫টাই ঠিক হয়েছে।”

“এ কী বিপরীত কাণ্ড।” বলে কুঁকড়ো ‘হো হো’ করে হেসে উঠলেন। চড়াই অমনি বলে উঠল, “বিপরীত বলে বিপরীত।” জিন্মা তাকে ধমকে বললে, “তোমার আর খোশামুদিতে কাজ নেই, তুমি নিজে তো কোনো সোমবারে পার্টিগুলো কামাই দাও না দেখি।”

চড়াই উত্তর করলে, “সত্যি যাই বটে, সবাই আমাকে খাতির করে কিনা।”

জিন্মা গজগজ করে খানিক কী বকে গেল। জিন্মা কী বকছে শুথোলে কুঁকড়োকে সে জবাব দিলে, “কোনদিন হয়তো তোমাকেও কোন্-এক মুরগি এই পার্টিতে নিয়ে হাজির করেছে, দেখব।”

কুঁকড়ো হেসে বললেন, “আমাকে হাজির করে দেবে, চা-পার্টিতে, কোনো এক মুরগি।”

জিন্মা বললে, “হাঁ মশায়, এমনি হাজির করা নয়, মাথার খুঁটি ধরে টানতে টানতে না হাজির করে।”

কুঁকড়ো একটু চটেই জিন্মাকে বললেন, “এ সন্দেহটা তোমার করবার কারণটি কী।”

জিন্মা জবাব দিলে, “কারণ নতুন মুরগির দেখা পেলে মশায়ের মাথা সহজেই ঘুরে যায় এখনো।”

চড়াই বলে উঠল, “জিন্মা-দি ঠিক বলেছে, নতুন মুরগি যেমন দেখা, অমনি কুঁকড়ো-মশায় এমনি করে ঘাড় বেঁকিয়ে বেঁকিয়ে ‘কুক কুক’ বলে নৃত্য করতে থাকেন, মুরগিটির চারি দিকে।” বলে চড়াইটা একবার কুঁকড়োর চলনবলন হুবহু দেখিয়ে দিলে।

কুঁকড়ো হেসে বললেন, “আচ্ছা বেকুফ পাখি যাহোক।”

চড়াইটা তখনো ডানা কাঁপিয়ে লেজ ছুলিয়ে কুঁকড়োর মতো তালে তালে পা ফেলে মোরগ মুরগির নকল দেখাচ্ছে, ঠিক সেই সময় ওদিকে ছুম করে বনুকের আওয়াজ হল। চড়াই অমনি কাঠের পুতুলের মতো এক পা তুলেই দাঁড়িয়ে গেল। কুঁকড়ো গলা উঁচু করে, আর কুকুর কান খাড়া করে নাক ফুলিয়ে শুনতে লাগল। আর-এক গুলির আওয়াজ। চড়াইটা গিয়ে মুরগি-গিন্নির ভাঙা পেঁটার আড়ালে লুকিয়েছে, এমন সময় উছ-উ-উ বলতে

বলতে সোনার টোপের সোনালিয়া বন-মুরগি কুঞ্জলতার বেড়ার ওপার থেকে ঝপাং করে উড়ে এসে উঠোনের মধ্যে পড়ল।

কুঁকড়ো বলে উঠলেন, “একী। একে। কে এ।”

সোনালিয়া কুঁকড়োর কাছে ছুটে গিয়ে বললে, “পাহাড়তলির ‘সা মোরগ’, আপনি আমার রক্ষক করুন।” আবার ছুম করে আওয়াজ। সোনালিয়া চমকে উঠেই অজ্ঞান হয়ে ঢলে পড়লেন, পালাবার আর শক্তিই ছিল না। কুঁকড়ো অমনি একখানি ডানা বাড়িয়ে সোনালিয়াকে তুলে ধরে আর-এক ডানার ঝাপটা দিয়ে গামলা থেকে জলের ছিটে আর বাতাস দিতে থাকলেন খুব আস্তে আস্তে। তাঁর ভয় হচ্ছিল পাছে পাতার সবুজ, ফুলের গোলাপি, সোনার জল আর সন্ধ্যাবেলার আলো দিয়ে গড়া বাসন্তী শাড়িপরা এই আশ্চর্য পাখিটি জল পেয়ে গলে যায়, কি বাতাসে মিলিয়ে যায়। একটু চেতন পেয়ে সোনালিয়া আবার কুঁকড়োকে মিনতি করতে লাগল, “ওগো একটু আমায় লুকোবার স্থান দাও, আমাকে পেলে তারা মেরেই ফেলবে।”

চড়াই সোনালিয়ার গায়ে টকটকে লাল সাটিনের কাঁচুলি দেখে বললে, “এতখানি জালের উপর থেকে শিকারীর বন্দুকের তাগ কেমন করে যে ফসকাল, তাই ভাবছি।”

সোনালিয়া বললে, “সাথে কি গুলি ফসকেছে, চোখে যে তাদের ধাঁধা লেগে গেল। তারা মনে করেছিল, ঝোপের মধ্যে থেকে ছাই রঙের একটা তিতির-মিতির কেউ বার হবে, কিন্তু আমি সোনালি যখন হঠাৎ বেরিয়ে গেলুম সামনে দিয়ে তখন শিকারী দেখলে খানিক সোনার ঝলকা, আর আমি দেখলেম একটা আঙনের হলকা। গুলি যে কোন্‌দিকে বেরিয়ে গেল কে তা দেখবে। কিন্তু ডালকুস্তোটা আমায় ঠিক তাড়া করে এল। কুকুরগুলো কী বজ্জাত।” এমন সময় জিম্মাকে দেখে “অহা কুকুর নয়, ওই ডালকুস্তোগুলোর মতো বজ্জাত দেখি নি, বাপু।” এই বলে সোনালিয়া একটু লুকোবার স্থান দেখিয়ে দিতে কুঁকড়োকে বার-বার বলতে লাগল। কুঁকড়ো একটু সমিস্থায় পড়লেন। আঙনের ফুলকি এই সোনালিয়া পাখি, একে কোন্‌ ছাইগাদায় তিনি লুকোবেন। তিনি দু-একবার এ-কোণ ও-কোণ দেখে, এখানটা-ওখানটা দেখে বললেন, “না, একে আর রামধনুককে লুকোতে পারা কঠিন।”

জিন্মা বললে, “আমার ওই বাস্ফটার মধ্যে লুকোতে পারা যেতে পারে, ইনি যদি রাজি হন।”

“ভালো কথা।” বলেই সোনালি গিয়ে বাস্ফে সঁধোলেন, কিন্তু অনেকখানি সোনালি আঁচল বাস্ফের বাঁইরে ছড়িয়ে রইল, জিন্মা সেটুকু ঢেকে চেপে গস্তীর হয়ে বসল।

জিন্মা বেশ বাগিয়ে বসেছে, এমন সময় বেড়ার ওধার থেকে ঝোলা-কান গালফুলো ডালকুস্তো ‘তন্মা’ উঁকি দিলেন। জিন্মা যেন দেখতেই পায় নি এই ভাবে রুটিই চিবচ্ছে। তন্মা বললে, “উঃ কিসের খোসবো ছাড়ছে।” জিন্মা সামনের থালাখানা দেখিয়ে বললে, “আজ একটু বনমুরগির ঝোল ঝাঁধা গেছে।”

ডালকুস্তো এবার পষ্ট করে শুধোলে, জিন্মা এদিকে একটা সোনালিয়া পাখিকে আসতে দেখেছে কিনা। কুঁকড়ো সে কথা চাপা দিয়ে বলে উঠলেন, “তন্মার মুখটা কেমন গোমসা দেখাচ্ছে-না, জিন্মা।”

জিন্মা ধীরে স্নস্থে উস্তর করলে, “একটা সোনালী টিয়ে মাঠের উপর দিয়ে উড়ে গেল দেখিছি, ওই ওদিকে—” তন্মাটা আকাশে নাক তুলে কেবলি শুঁকতে লেগেছে, বনমুরগির গন্ধটা সত্যিই জিন্মার থালা থেকে আসছে কি না। কুঁকড়োর বুকের ভিতরটা বেশ একটু-খানি গুরগুর করেছে, এমন সময় দূর থেকে শিকারী সিটি দিয়ে তন্মাকে ডাক দিলে। তন্মা চলল দেখে কুঁকড়ো আর জিন্মা “রাম বলো” বলে হাঁফ ছাড়তেই চড়াইটা ডাক দিলে, “বলি তন্মা।”

“করো কী।” বলে কুঁকড়ো তাকে এক ধমক দিলেন, কিন্তু চড়াইটা আরো টেঁচিয়ে বলে উঠল, “বলি, ও তন্মা।” তন্মার গোমসা মুখটা আবার বেড়ার উপর দিয়ে উঁকি দিলে। কুঁকড়ো রেগে ফুলতে লাগলেন, চড়াই তন্মাকে বললে, “খুঁজে খুঁজে নারি যে পায় তারি।”

তন্মা শুধোলে, “কী খুঁজে দেখি, বলো তো ভাই?”

“চটপট তোমার ফোগলা গালের চির-খাওয়া দাঁতটি।” বলেই চড়াই সট করে নিজের খাঁচায় ঢুকল; “চোপরাও” বলে তন্মা সে তল্লাট ছেড়ে চৌচা চম্পট।

ডালকুস্তোটা মাঠের ওপারে চলে গেছে। কুঁকড়ো সবাইকে অভয় দিয়ে ঘরের মটকা থেকে হাঁক দিলেন, “ত-ত-তফাত গিয়া।” অমনি সে-মোনালিয়া বাস্তবের মধ্যে থেকে বেরিয়ে উঠোনময় নেচে বেড়াতে লাগল যেন আলোর চরকিবাজি। কুঁকড়ো তার সেই বকবকে রূপ দেখে ভারি খুশি হয়ে মনে মনে বললেন, ‘আহা, এমন পাখিকেও কেউ গুলি করে। এর দিকে বন্দুক করা, আর একটি মানিকের পিছুমে তাগ করা একই।’ মোনালির কাছে আস্তে আস্তে এসে কুঁকড়ো শুধোলেন, “সূর্যের আলোর মতো কোন্ পূব-আকাশের সোনার পুরী থেকে তুমি এলে সোনালিয়া বনমুরগি।”

মোনালি মাখমের মতো নরম সুরে বললে, “আমি ওই বনে আছি বটে কিন্তু ওটা তো আমার দেশ নয়।” কুঁকড়ো তাঁর সবচেয়ে মিষ্টি সুরে শুধোলেন, “তবে কোথায় তোমার দেশ সোনালিয়া বিদেশিনী।” মোনালি উত্তর করলে, “তা তো মনে নেই। শুনেছি বরফের পাহাড়ের ওপারে যে-দেশ, সেখানকার মাটি ফুল-কাটা গালচেতে একেবারে ঢাকা, সেইখানের কোন্ অশোক বনের রানীর মেয়ে আমি। আমার একটু একটু স্বপ্নের মতো মনে পড়ে— চমৎকার নীল আকাশের তলায় বড়ো বড়ো গাছের ছাওয়ান সখীদের সঙ্গে খেলে বেড়াচ্ছি অশোক বনের ছল্লালী। আমাদের ঘরের চারি দিকে কত রঙের ফুল ফুটেছে, ভোমরা সব উড়ে উড়ে পদ্মের মধু খেয়ে যাচ্ছে। কেবল পাখি আর প্রজাপতি আর ফুল। একটাও শিকারী ডালকুস্তো নেই। মান্নুঘরা পর্যন্ত সেখানে আমাদের মতো চমৎকার সব রঙিন সাজে সেজে রাজা-রানীর মতো বেড়িয়ে বেড়াচ্ছে। নন্দন-কাননে আনন্দে ঘুরে বেড়াতেই আমি জন্মেছি, ডালকুস্তোর তাড়া খেয়ে ছুটোছুটি করে মরতে তো নয়। আহা, সেখানকার সূর্যের লাল আভা রক্ত-চন্নন আর কুসুম-ফুলের রঙে মিশিয়ে বৃকে মেখে রেখেছি, এই দেখো।” ব’লে সোনালিয়া কুঁকড়োর গা-ঘেঁষে দাঁড়াল। কুঁকড়ো আনন্দে ডগমগ হয়ে ঘাড় ছলিয়ে ডানা কাঁপিয়ে তালে তালে পা ফেলে সোনালিয়ার চারি দিকে খানিক নৃত্য করে আস্তে আস্তে এগিয়ে এসে বললেন, “মনো মোনালিয়া। শোনো সোনালিয়া বিদেশিনী বনের টিয়া—” হঠাৎ মোনালি বলে উঠল, “ইস্।”

কুকড়ো একটু খতমতু খেয়ে গেলেন। বুঝলেন সোনালিয়া সহজে ভোলবার পাত্রী নয়। যে-কুকড়ো তাদের দিকে একটিবার ঘাড় হেলালে সাদি কালি গোলাপি গুলজারি সব মুরগিই আকাশের চাঁদ হাতে পায় মনে এমনি করে সেই জগৎবিখ্যাত কুকড়োকে সোনালি মুখের সামনে শুনিয়ে দিলে যে জগতের সবাই যাকে ভালোবাসে এমন কুকড়োয় তার দরকার নেই! সে বেছে বেছে সেই কুকড়োকে বিয়ে করবে যার নাম-বশ কিছুই থাকবে না; থাকবার মধ্যে থাকবে যার মনমোনালিয়া বনের টিয়া একমাত্র মুরগি।

কুকড়ো খানিক চূপ করে থেকে বললেন, “একবার গোলাবাড়ির চার দিক দেখে আসবেন চলুন।” বলে তিনি সোনালিয়াকে খুব খাতির করে সব দেখাতে লাগলেন। প্রথমেই, যেটা থেকে অজ্ঞান হয়ে পড়লে সোনালিয়ার মুখে চোখে জল ছিটিয়ে কুকড়ো তাকে বাঁচিয়ে-ছিলেন সেই টিনের গামলাটা আর যে কাঠের বাস্কাটায় সোনালিয়াকে লুকিয়ে রেখে তন্মার চোখে ধুলো দিয়েছিলেন সেই ছুটো জিনিস দেখিয়ে বললেন, “এগুলো নতুন কিনা, কাজেই কুচ্ছিং; কিন্তু পুরোনো দেয়াল, ভাঙা বেড়া, ফাটা দরজা, পুরোনো ওই মুরগির ঘরটি আর কতকালের ওই লাঙল, ধানের মরাই আর ওই শেওলায় সবুজ খিড়কির ছুয়োর আর পানা-পুকুর আর ওই কুঞ্জলতার থোকা-থোকা ফুল, কী সুন্দর এগুলি।”

সোনালিয়া কোনোদিন তো ঘরকন্নার ব্যাপার দেখে নি, সে কেবলি কুকড়োকে শুধোতে লাগল, “এ-সব নতুন জিনিসের মধ্যে থাকায় কোনো ভয় নেই তো।” কুকড়ো তাকে বললেন, “আমরা বেশ নির্ভয়ে আছি— মোরগ মুরগি হাঁস এবং মানুষ। কেননা, এ-বাড়ির কর্তা— তিনি নিরামিষ খান, কাজেই আশু বাচ্ছা নিয়ে আমাদের সুখে থাকবার কোনো বাধা নেই। ওই দেখুন-না, বেড়াল পাঁচিলের উপর ঘুমিয়ে আছে, আর ঠিক তার নীচেই আমার সব-ছোটো বাচ্ছাটা খেলে বেড়াচ্ছে গাঁদা গাছটার তলায়।” ইতিমধ্যে চড়াইটা চট করে কখন চিনে-মুরগিকে সোনালিয়ার খবরটা দিয়ে ফুড়ুং করে উঠানে এসে বসল। সোনালিয়া শুধোলেন, “ইনি?” চড়াই অমনি উত্তর দিলে, “ইনি এইমাত্র চিনে-মুরগিকে আপনার শুভ আগমন জানিয়ে এলেন। তিনি আপনার সঙ্গে দেখা করতে এলেন বলে।” কুকড়ো পরিচয় দিলেন, “ইনি ভাল-চটকমশায়, সর্বদা কাজে ব্যস্ত।” সোনালিয়া শুধোলে, “কী কাজ।”

চড়াই সঙ্গে সঙ্গে উত্তর করলে, “বড়ো কঠিন কাজ, নিজের ধন্যায় ফিরছেন ইনি, পাছে কেউ উপর-চাল চেলে টেকা দেয়।”

সোনালিয়া বললে, “হ্যাঁ কাজটা শক্ত বটে, কিন্তু অতি ছোটো।”

কুকড়ো অল্প কথা পেড়ে সোনালিয়াকে চুন-খসা দেয়ালের ধারে পুরোনো জাঁতাটা দেখিয়ে বললেন, “ওই পাঁচিলটার উপরে দাঁড়িয়ে আমি যখন গান করি তখন সোনালী রঙের গিরগিটিগুলো দেয়ালের গায়ে চূপ করে বসে শোনে। মনে হয় যেন ওই জাঁতার মোটা পাথর ছুখানাও দেয়ালের গায়ে হেলান দিয়ে বসে-বসে আমার গান শুনছে। এইখানটিতে আমি গান গাই, এইখানের মাটি আমি পরিষ্কার করে আঁচড়ে রেখেছি। আর এই যে পুরোনো লাল মাটির গামলা, গানের পূর্বে ও পরে প্রতিদিন এরি থেকে এক চুমুক জল না খেলে আমার তেষ্ঠাও ভাঙে না, গলাও খোলে না।” সোনালিয়া একটু হেসে বললে, “তোমার গলা খোলা না-খোলায় বুঝি খুব আসে যায় তোমার বিশ্বাস।”

“অনেকটা আসে যায় সোনালি।” গম্ভীরভাবে কুকড়ো বললেন।

“কী আসে যায় শুনি?” সোনালিয়া নাক তুলে বললে।

কুকড়ো বললেন, “ওই গোপন কথাটা কাউকে বলবার সাধ্য আমার নেই।”

“আমাকেও না?” কুকড়োর দিকে এগিয়ে এসে অভিমানের সুরে সোনালিয়া বললে, “আমি যদি বলতে বলি, তবুও না?”

কুকড়ো কথাটা ঘুরিয়ে নিয়ে সোনালিকে এক বোঝা কাঠ দেখিয়ে বললেন, “আমাদের প্রিয়বন্ধু, রান্নাঘরে শ্মশানে চ, ইনি চালা কাঠ।” “এ যে আমার বন থেকে চুরি করা দেখছি।” বলে সোনালিয়া আবার শুধোলে, “তবে তোমারও একটা গুপ্ত মন্তুর আছে।”

“হ্যাঁ বন-মুরগি। এই কথাটা কুকড়ো এমনি সুরে বললেন যে সোনালিয়া বুঝলে গোপন কথাটা জানবার চেষ্টা এখন বৃথা।

কুকড়ো সোনালিকে নিয়ে গোলাবাড়ির বাইরের পাঁচিলে উঠলেন। সেখান থেকে তিনি দেখালেন দূরে পাহাড়ের গা বেয়ে জলের মতো সাদা একটা সরু সাপ কতদিন ধরে যে নামছে তার ঠিক নেই।



সব দেখে শুনে সোনালিয়া কুঁকড়োকে বললে, “এইটুকু জায়গা, তাও আবার নেহাত কাজ-চলা-গোছের জিনিসপত্তরে ভরা, এখানে একঘেয়ে দিনগুলো কেমন করে তোমরা কাটাও বুঝি না। আকাশ দিয়ে যখন পাখিরা উড়ে চলে তখন তোমার মন নতুন দেশ বড়ো-পৃথিবীটা দেখবার জন্তে একটুও আনচান করে না?”

কুঁকড়ো বললেন, “একটুও নয়। পৃথিবীতে একঘেয়ে দিনও নেই, পুরোনোও কিছু হয় না। আমি এইটুকু জায়গাকেই প্রতিদিন নতুন নতুন ভাবে দেখতে পাই। কিসের গুণে তা জান? আলোর গুণে।”

মোনালি অবাক হয়ে বললে, “আলোর গুণে। সে আবার কী রকম।”

“দেখো’সে।” বলে কুঁকড়ো একটি স্থলপদ্মের গাছ দেখিয়ে বললেন, “দিনের আলোর সঙ্গে এই ফুলের রঙ ফিকে থেকে গাঢ় লাল হবে দেখবে। এই খড়ের কুটিগুলো আর এই লাঙলের ফলাটা আলো পেয়ে দেখো কত রকমই রঙ ধরছে। ওই কোণে মইখানার দিকে চেয়ে দেখো ঠিক মনে হচ্ছে নাকি এটা যেন দাঁড়িয়ে ঘুমচ্ছে আর ধানখেতের স্বপ্ন দেখছে। আর মায়ুষ যেমন পৃথিবী প্রদক্ষিণ করে, ঠিক তেমনি করে ওই পিঁপড়েগুলো দেখো এই চিনেমাটির জালাটার চারি দিক প্রদক্ষিণ করে আসছে আট পল এক বিপলের মধ্যে। পলকে পলকে এখানকার সব জিনিসই নতুন নতুন ভাব নিয়ে দেখা দিচ্ছে নতুন আলোতে। আর আমিও কুঁকড়ো ওই মইখানার মতো আপনার কোণটিতে দাঁড়িয়ে রোজ রোজ কত আশ্চর্য ব্যাপারই দেখছি। দেখে দেখে চোখ আর তৃপ্তি মানছে না; চোখের দৃষ্টি আমার নতুনের পর নতুন, ছোটো এই গোটাকতক জিনিসের অফুরন্ত শোভা, এই ক-টা সামান্য জিনিসের অসামান্য রূপ দেখতে দেখতে দিন দিন খুলেই যাচ্ছে, বেড়েই চলেছে, ডাগর হয়ে উঠছে মহা বিস্ময়ে। ওই কুঞ্জলতার কুঁড়িটি ফুটে দেখে যে আনন্দ পাই, মুরগির ডিমগুলি যখন ফোটে বাচ্চাগুলির চোখ যখন ফোটে তখনো আমি তেমনি আনন্দ পেয়ে গেয়ে উঠি। এইটুকু জায়গা, এখানে কী যে সুন্দর নয় তা তো আমি জানি নে।”

কুঁকড়োর কথা শুনতে শুনতে সোনালিয়া ক্রমেই অবাক হচ্ছিল। ছোটোখাটো সব সামান্য জিনিসের উপরে আলো ধরে এমন চমৎকার করে তো কেউ তাকে দেখায় নি। আপনার

ছোটো কোণটিতে চুপচাপ বসে থেকেও যে সবই খুব বড়ো করে দেখা যায় আজ সোনালি সেটি বুঝে অবাক হল।

কুকড়ো বললেন, “সব জিনিসকে যদি তেমন করে দেখতে পার তবে সুখছঃখের বোঝা সহজ হবে; অজানা আর কিছু থাকবে না। ছোটো একটি পোকাকার জন্ম-মরণের মধ্যে পৃথিবীর জীবন আর মৃত্যু ধরা রয়েছে দেখো, একটুখানি নীল আকাশ ওরি মধ্যে কত কত পৃথিবী জ্বলছে নিভছে।”

মুরগি-গিল্মি অমনি পের্টরার মধ্যে থেকে গা-ঝাড়া দিয়ে উঠে বললে, “কুয়োর তলে পানি, আকাশকেই জানি।” পের্টরার ডালা আবার বন্ধ হবার আগেই কুকড়ো সোনালিকে মায়ের সঙ্গে পরিচয় করে দিলেন। মুরগি-গিল্মি চোখ মটকে চুপি চুপি বললেন, “বড়ো জবরদস্ত কুকড়ো, না?”

সোনালি মিহি সুরে বললে, “হুঁ, উনি খুব বিদ্বান বুদ্ধিমান।”

এদিকে কুকড়ো জিন্মাকে বলছিলেন, “সোনালিয়ার সঙ্গে ছদশু কথা কয়ে আরাম পাওয়া যায়, সব-বিষয়ে সে কেমন একটু উৎসাহ নিয়ে জানতে চেষ্টা করে দেখেছ।”

এমন সময় কিচমিচ টেঁচামেচি করতে করতে মাঠ থেকে দলে-দলে হাঁস মুরগি ধাড়ি বাঁচ্ছা সবাইকে নিয়ে চিনে-মুরগি উপস্থিত। এসেই সবাই সোনালিয়াকে ঘিরে ‘আহা কী সুন্দর’ ‘ক্যাব্য্যাৎ’ ‘বাহবা’ ‘বেহেতর’ এমনি-সব নানা কথা বলতে লাগল। কুকড়ো একটু দূরে দাঁড়িয়ে হাসিমুখে এই ব্যাপার দেখছিলেন। কী সুন্দর দেখাচ্ছে সোনালিয়াকে। তার চলন বলন সবই বেশ কেমন একটু ভদ্র রকমের। গোলাবাড়ির কোনো মুরগিই এমন নয়। চিনে-মুরগিরও সোনালি বউ করবার সাধ একটু যে না হয়েছিল তা নয়; সে তাড়াতাড়ি নিজের ছেলের সঙ্গে সোনালিয়ার ভাব করে দিতে দৌড়ল।

কুকড়ো এইবার তাঁর সব মুরগিদের ঘরে যেতে ছুকুম দিলেন। সোনালিয়া আরো খানিক তাদের সঙ্গে গল্প করবার ইচ্ছে করায় কুকড়ো বললেন, “ওদের সব সকাল সকাল ঘুমেনো অভ্যেস।” মুরগিরা একটু বিরক্ত হয়ে সব শুতে চলল মই বেয়ে নিজের নিজের খোপে। সোনালিয়া শুধলে, “কোথায় যাচ্ছ ভাই।”

এক মুরগি বললে, “বাড়ি চলেছি। এই যে আমাদের ঘরে যাবার সিঁড়ি।”

মই বেয়ে মুরগিদের উঠতে দেখে সোনালিয়া অবাক হয়ে গেল। বনের মধ্যে তো এ-সব কিছুই নেই।

চিনে-মুরগি সোনালিয়ার সঙ্গে খুব আলাপ জমিয়ে বন্ধুত্ব করবার চেষ্টায় আছেন, সোনালিয়া তাকে বললে যে, এখনি তাকে আবার বনে ফিরে যেতে হবে, গোলাবাড়িতে সে কেবল ছদণ্ডের জন্তু এসেছে বৈ তো নয়। ঠিক সেই সময় দূরে ছম করে আবার বন্দুকের আওয়াজ হল। এখনো শিকারীগুলো বন ছেড়ে যায় নি, কাজেই সোনালিকে কিছুতেই বনে একলা পাঠাতে কুঁকড়োর একটু ইচ্ছে নেই। গোলাবাড়ির সবাই তাকে আজকের রাতটা কোনোরকমে সেখানে কাটাতে অমুরোধ করতে লাগল। জিন্মা নিজের বাস্তুটা রাতের মতো সোনালিকে ছেড়ে দিয়ে বাইরে গুতে রাজি হল। বন্ধ ঘরের মধ্যে সোনালি কোনোদিন শোয় নি; কিন্তু কী করে। প্রাণের দায়ে তাতেই সে রাজি হল। চিনে-মুরগির আহ্লাদ আর ধরে না, সে সোনালিকে তার সকালের মজলিসে যাবার জন্তু আবার ধর-পাকড় করতে লাগল। এমন সময় অন্ধকার হয়ে আসছে দেখে কুঁকড়ো ডাক দিলেন, “চুপ রহ। চুপ রহ।” তার পর মইটা বেয়ে মটকায় উঠে তিনি চারি দিকটা একবার বেশ করে দেখে নিলেন, হাঁস মোরগ মুরগি কাছা বাছা সবাই আপনার আপনার খোপে যে যার মায়ের কোলে ডানার নীচে সঁধিয়েছে কি না। চিনে-মুরগি সোনালির কানে কানে বললে, “মনে থাকবে তো ভাই, কুলতলায় ভোর পাঁচটা থেকে ছটার সময়। ময়ুর নিশ্চয় আসবেন, কাছিম বুড়োও আসবেন বোধ হয়, আর সুরকি-দিদি বলেছে কুঁকড়োকেও নিয়ে যাবে।” কুঁকড়ো একবার সুরকির দিকে চেয়ে দেখলেন, সুরকি খোপ থেকে আস্তে আস্তে মুখটি বার করে গিল্পিপনা করে বললে, “তুমিও যাবে তো। চিনি-দিদির ভারি ইচ্ছে। আমারও ইচ্ছে তুমি পাঁচজনের সঙ্গে একটু মেশো, ছেলেমেয়ের তো বিয়ে দিতে হবে।”

কুঁকড়ো সাফ জবাব দিলেন, “না।” সোনালি মইখানার নীচে থেকে কুঁকড়োর দিকে মুখ তুলে খুব মিষ্টি করে বললে, “যেতেই হবে তোমায়।”

কুঁকড়ো মুখ নিচু করে বললেন, “কেন বলো তো।” সোনালিয়া বললে, “সুরকি-দিদির

আবদারে তুমি অমন 'না' করলে যে।”

কুকড়ো একটু গললেন। “আমি তা—” তার পর খুব শক্ত হয়ে বললেন, “না, কিছুতেই যাব না। রাত হল,” বলে কুকড়ো অশ্রু দিকে চাইলেন। মোনালি একটু বিরক্ত হয়ে কুকুরের বাস্তুতে গিয়ে সঁধলেন।

রাত্রির নীল অন্ধকার ক্রমে ঘনিষ্ণে এসেছে। একে-একে সবাই ঘুমিয়ে পড়েছে। জিন্মা ঘরের দাওয়ায় পা ছড়িয়ে শুয়েছে। চিনি-দিদি ঘুমের ঘোরে এক-একবার বকতে লেগেছে, “৫টা থেকে ৬টা।” তাল-চড়াইটা তার খাঁচার এককোণে গুটিসুটি হয়ে ঘুম দিচ্ছে। কুকড়ো তখনো মটকার উপরে খাড়া দাঁড়িয়ে পাহারা দিচ্ছেন আর চারি দিক চেয়ে দেখছেন। একটা ছুঁঁ বাচ্ছা রাতের বেলায় চুপি চুপি উঠেনে বার হয়েছে দেখে কুকড়ো তাকে এক ধমক দিয়ে তাড়িয়ে ঘরে ঢুকিয়ে দিলেন। তার পর আন্তে আন্তে সোনালির বাস্তুটার কাছে গিয়ে কুকড়ো বললেন, “মোন।” ঘুম ঘুম সুরে সোনালিয়া উত্তর দিলে, “কী।” কুকড়ো একবার বললেন, “না।” তার পর আবার নিখেস ছেড়ে বললেন, “নাঃ, কিছু নয়।” বলে কুকড়ো মই বেয়ে উপরে চলে গেলেন। উপরে গিয়ে কুকড়ো একবার ডাক দিলেন, “রাত, ভারী রাত।” তার পর কুকড়ো সে রাতের মতো চোখ বুজলেন খোপে ঢুকে।

চারি দিক নিশুতি হল আর অমনি কালো বেড়ালের সবুজ চোখছুটো অন্ধকারে বকবক করে উঠল। অমনি ভৌদড় বললে, “আমিও তবে চোখ খুলি।” ভাম বললে, “আমিও।” দুজোড়া চোখ ছাদের আলসেতে জ্বলজ্বল করে ঘুরতে লাগল। ছুঁচো ইঁহুর আর বাহুড় তিনজনেই বললে, “আমরাও তবে চোখ খুললেম।” কিন্তু এদের চোখ এত ছোটো যে খুলল কি না বোঝা গেল না, কেবল তাদের চিক চিক আওয়াজ শোনা গেল। একটু পরেই অন্ধকার থেকে তিনটে পঁচা আঙনের মতো তিন জোড়া চোখ খুলে স্ট করে দেখা দিলে। তখন সবুজ হলদে লাল— সব চোখ এ ওর দিকে চাওয়া-চাওয়ি করতে থাকল আর বলাবলি করতে লাগল, “আছ তো? এসেছ? আছ তো, এঁ এঁ এঁ।” বেড়াল পঁচাকে শুধল, “আছ তো।” পঁচা ভৌদড়কে, ভৌদড় বাহুড়কে, এমনি সবাই সবাইকে শুধলে, “আছ তো। ঠিক আছ তো। ঠিক আজকে তো। আসছ তো ঠিক।” বেড়াল শুধলে, “আজই

নাকি।” পৈঁচা-তিনটে জবাব দিলে, “হাঁ: হাঁ: হাঁ:।” চড়াই খাঁচার মধ্যে জেগে উঠে শুনলে এক পৈঁচা আর-এক পৈঁচাকে শুধছে, “ঘোঁট কিসের।” অগ্ন পৈঁচা বলছে, “কুঁকড়োর সর্বনাশের ঘোঁট রে ঘোঁট।” ভৌদড় অমনি শুধলে, “কো-ও-থায়।” পৈঁচার উত্তর দিলে, “পাকুড়তলে, পাকুড়তলে, পাকুড় পাকুড় পাকুড়তলে।” ভাম শুধলে, “ক-খ-ন।” উত্তর হল, “আটটায় ঘুঁট। আটটায় ঘুঁট। আটটায় ঘুঁট। ঘুঁট ঘুঁটে রাতে। ঘুঁট ঘুঁটে রাতে।”

রাতের আঁধারে বাহুড়গুলো জাহুকরের হাতে তাসের মতো একবার দেখা দিচ্ছিল আবার কোন্ ডিড়ে যাচ্ছিল। বেড়াল পৈঁচাকে শুধলে, “বাহুড় তো আমাদের দলে বটে।” পৈঁচা বললে, “হাঁ নিশ্চয়।” “ছুঁচো ইঁহর?” “হাঁ তারাও।”

বেড়াল বাড়ির দরজা আঁচড়ে বললে, “পিউ পিউ পিউ। দিয়ে পিউ আটটায় ঘড়ি দিয়ে দিয়ে দিয়ে।” পৈঁচা শুধলে, “ঘড়িটাও এ দলে নাকি।” বেড়াল উত্তর করলে, “নি-শ-চয়। নিশাচর সবাই এ দলে; তা ছাড়া দিনের বেলারও ছুঁচার জন আছেন।” পেরু আর ছুঁচার জন উঠোনের এককোণে লুকিয়ে ছিল, আন্তে আন্তে বেরিয়ে এল। পেরু শোখালে, “ডোবা চোখ, চাকা মুখ। সব ঠিক তো।” উত্তর হল, অন্ধকার থেকে—“হাঁ: হাঁ: হাঁ। সব ঠিক, ঘুঁটটা ঠিক, এ পাড়া ঠিক, ও পাড়া ঠিক।” তাল-চড়াই মনে মনে বললে, ‘সেও যাচ্ছে ঠিক।’

কুকুর এমন সময় গা-ঝাড়া দিয়ে বলে উঠল, “কে ও।” অমনি সব নিশাচরগুলো চমকে উঠে এদিক ওদিক চাইতে লাগল। বেড়াল তাদের সাহস দিয়ে বললে, “ও কিছু নয়, বুড়িটা ঘুমিয়ে ঘুমিয়ে বকছে।” কিন্তু এবার কুঁকড়ো যেমন একটু গা-ঝাড়া দিয়ে সাড়া দিয়েছেন, “কি-ই-ও।” অমনি সব নিশাচর—পৈঁচা, বেড়াল, এমন-কি, পেরু পর্যন্ত ‘ওইগো’ বলেই পালাই পালাই করতে লাগল। পেরু, তিনি পালানোই স্থির করলেন, তাঁর গলার থলি থেকে পা পর্যন্ত ভয়ে কাঁপছিল; বেড়ালের যেন জ্বর এসে পড়ল, পৈঁচাগুলো চোখ বুজলেই অন্ধকারে মিলিয়ে যাবে জানে, তারা অমনি খপ করে চোখের পাতা বন্ধ করে ফেললে। একসঙ্গে সব জ্বলন্ত চোখ নিভে গেল। রাত্রি যে অন্ধকার সেই অন্ধকার। কুঁকড়ো ঘর থেকে বেরিয়ে এসে চড়াইকে শুধলেন, “কারা যেন ফুসফাস করছিল না।”

চড়াই বললে, “শুনছিলেম বটে একটা ঘোঁট চলছে।” ঘুটঘুটে অন্ধকারে সব ঘুঁটেগুলো এমন কাঁপতে লাগল যে রাত্রিটা ছলছে বোধ হল।

কুকড়ো বললেন, “বটে, ঘোঁট চলছে?”

চড়াই বললে, “হাঁ তোমার সর্বনাশের, সাবধান।” “বয়ে গেল।” বলে কুকড়ো আবার গিয়ে ঘরে ঢুকলেন।

চড়াই আবার ভালোমানুষটির মতো গা-ঝাড়া দিয়ে বসল। সে ঠিক-ঠিক কথাই বলেছে কিন্তু কেমন হৃদিক বাঁচিয়ে বলেছে। যুধিষ্ঠিরের অশ্বখামাহত-ইতি-গজ গোছের। কথাটা চড়াইয়ের মুখে শুনে কিন্তু পৈঁচাদের সন্দেহ বাড়ল। “চড়াই সত্যিই তাদের দলে কি না” —শুধতে অন্ধকারের মধ্যে একটার পর একটা চোখ চড়াইয়ের দিকে চাইতে লাগল। চড়াই বললে, “আমি বাপু কোনো দলে নেই; তবে ঘোঁটটা কেমন চলে দেখতে ইচ্ছে আছে।” পৈঁচাতে চড়াই খায় না, কাজেই ঘোঁটে গেলে কোনো বিপদ তার নেই বলে পৈঁচার চড়াইকে মন্ত্রণাসভায় যাবার স্থানটি বাতলে দিয়ে বললে, “‘চোরের মন পুঁই-আঁদাড়ে’, এই শোলক বললেই সে দরজা খোলা পাবে।”

এ দিকে ঘরের মধ্যে থেকে সোনালিয়ার হাঁপ ধরছিল; সে একটু ভালো হাওয়া পেতে ঘর থেকে মুখ বার করেই সব নিশাচরকে দেখে ‘একি!’ বলে চমকে উঠল। অমনি সব চোখ একসঙ্গে ঝপ করে বন্ধ হয়ে গেল। অনেকক্ষণ আর সাড়া-শব্দ নেই। তখন অন্ধকারে একটির পর একটি চোখ খুলল আর বলাবলি শুরু হল। সোনালিয়া চূপ করে শুনছে কে একজন উঠোনের ও-কোণ থেকে বললে, “বেঁচে থাকো পৈঁচা-পৈঁচিরা।” পৈঁচার শুধলে, “আমরা তো ওর নামটি পর্যন্ত সইতে পারি নে তা জানো, কিন্তু তোমরা তার উপর চটা কেন বলা তো।”

দিনের বেলায় যারা ছুঁছুঁকি লুকিয়ে বেড়ায়, রাত্রে তাদের পেটের কথাটা আপনিই যেন প্রকাশ হয়ে পড়ে। বেড়াল খুব চাপা জন্তু কিন্তু আগেই তার কথা বেরিয়ে পড়ল, “ওই কুকুরটার সঙ্গে অত তার ভাব বলেই কুকড়োটাকে ছুঁছুঁ আমি দেখতে পারি নে।” পেরু বললেন, “যাকে সেদিন জন্মাতে দেখলেম, সে আজ কৰ্তা হয়ে উঠল, এটা আমি কিছুতেই সইব না।

এইজন্মে আমার রাগ ওটার উপর।” রাজহাঁস বললে, “ওর পা ছুখানা বড়ো বিজী, একেবারে হাঁসের মতো নয়। দেখলেই আমার মাথা গরম হয়ে ওঠে, গোড়ালির ছাপ তো নয়, চলবার বেলায় মাটির উপরে বাবু যেন তারাহুল কেটে চলে যান। কী দেমাক।” কেউ বললে, “কুকড়োর চেহারাটা ভালো বলেই সে তাকে পছন্দ করে না। কেন সে নিজে কুচ্ছিত হল কুকড়োটা হল না।”

আর কেউ কেউ বললে, “সব ক-টা গির্জের চুড়োতে তার সোনার মূর্তি দেখলে কার না গা জ্বালা করে। নিশ্চয়ই ও পাখিটা কির্স্টান। ওকে জাতে ঠেলাই ঠিক। মোচনমানের সঙ্গে এক ঘটিতে জল খেতে আমি ওকে স্বচক্ষে দেখেছি। ওর কি বাচবিচার আছে। ওর ছায়া মাড়াতে ভয় হয়।”

ঠিক সেই সময় ঘড়ি পড়ল আর ঘড়ির মধ্যে কলের পাখি বলে উঠল, “পি-পি-পি-রা-আ-আ-লি।”

মেঘের আড়াল থেকে চাঁদ অমনি উঁকি দিলেন। উঠানের এক কোণে খানিক আলো পড়ল। ছুঁচো আস্তে আস্তে মুখ বার করে পেরঁচাকে বললে, “আমার সে পাজিটার সঙ্গে কোনোদিন চোখোচোখিই নেই।”

ঘড়িকলের পাখিটাকে আর শুধতে হল না; সে আপনিই বললে, “একটুতে আমার দম ফুরিয়ে যায়, রোজ দম না দিলে মুশকিল, আর কুকড়োর দমের শেষ নেই।” ব’লেই গলা ঘড় ঘড় করে ঘড়িপাখি চুপ করলে। টং টং করে আটটা বাজল। পেরঁচার সব ডানা মেলে বললে, “আর আমরা কুকড়োকে একটুও ভালোবাসি নে, কেননা—কেননা ও কিনা—সে কিনা” বলতে বলতে অন্ধকারের মধ্যে পেরঁচার উড়ে পড়ল নীল রাত্রির মধ্যে। একলা সোনালিয়া উঠানে দাঁড়িয়ে বললে, “আর কুকড়োকে আমি এখন খুব ভালোবাসি, কেননা—কেননা—সবাই তাঁর শত্রু।”

খেত আর আবাদ যেখানে শেষ হয়েছে, সেইখানে পাহাড়ের একটা ঢল, সেইখানে পৌঁচাদের ঘোঁটের মজলিস বসবে। অতি নোংরা ঢালু জমি; শেয়ালকাঁটা, বাবলাকাঁটায় ভরা; উপরে মস্ত পাকুড় গাছটা, সরু একটা পাগদণ্ডি বেয়ে সেখানে উঠতে হয়। রাত্রে জায়গাটাতে এলে ভয় করে কিন্তু দিনের বেলায় যখন সূর্য ওঠে, এখান থেকে ছায়ায় বসে পাহাড়-ঘেরা গ্রাম, নদী সবই অতি চমৎকার দেখায়।

পাকুড় গাছে, লতা-পাতায় ঝোপে-ঝাড়ে জায়গাটা এমনি ঢাকা যে একবিন্দুও চাঁদের আলো সেখানে পড়তে পায় না। সেই ঘুটঘুটে অন্ধকারে ছতুম পৈঁচার চোখ টিপটিপ করে জ্বলছে, আর কিছু দেখাও যাচ্ছে না, শোনাও যাচ্ছে না, অথচ অনেক পাখিই আজ সেখানে জুটেছে ঘোঁট করতে। পৈঁচার সর্দার ছতুম একে একে নাম ধরে ডাকতে লাগলেন, আর চারি দিকে একটার পর একটা লাল, নীল, হলদে, সবুজ চোখ জ্বালিয়ে দেখা দিতে থাকল একে একে ধুঁধুল পৈঁচা, কাল পৈঁচা, কুটুরে পৈঁচা, গুড়গুড়ে পৈঁচা, দেউলে পৈঁচা, দালানে পৈঁচা, গেছো পৈঁচা, জংলা পৈঁচা, পাহাড়ী পৈঁচা। ছতুমথুমো ডেকে চলেছে, “ভুতো পৈঁচা, খুদে পৈঁচা, চিলে পৈঁচা, গো-পৈঁচা, গোয়ালে পৈঁচা, লক্ষ্মী পৈঁচা,” লক্ষ্মী পৈঁচার দেখা নেই, চোখও জ্বলছে না। ছতুম ঘাড় ফুলিয়ে রেগে ডাক দিলে, “ল-ক্-খী-পেঁ-এঁ্যা-এঁ্যা-চা-আ আ।” লক্ষ্মী পৈঁচা তাড়াতাড়ি এসে চোখ খুলে হাঁপাতে হাঁপাতে বললে, “অনেক দূর থেকে আসতে হয়েছে, বিলম্ব হয়ে গেল।” চিলে পৈঁচা চৈঁচিয়ে বললে, “সেইজগুই স্বরা করা তার উচিত ছিল।”

সব পৈঁচা একত্র হয়েছে, তখন ছতুম গম্ভীরভাবে বললেন, “কাজ আরম্ভ হবার আগে এসো ভাই সব এককাত্তা হয়ে এক সুরে নিজের নিজের ঢাকের বাণ্ডি বাজিয়ে দিই, “ছতুম-থুম, ছতুম-তুম। লাগ লাগ ঘুঁট। লাগ লাগ ঘুঁট। দে ধুলো, দে ধুলো, দে ধুলো, চোরা-আ-আ গো-ফ-তা।” সমস্ত রাত্রিটার অন্ধকার বিকট শব্দে ভঁরে দিয়ে পৈঁচাগুলো ডানা ঝাপটাতে লাগল, আর অন্ধকারের জয় দিতে থাকল,

ঘুটঘুটে আঁধারে

আমরা খুলি চোখ,

—যত লাল চোখ।



## আলোর ফুলকি

বুকে বসাই নোখ,

রক্তে গিলি ঢোক ।

হাড় ভাঙি আর ঘাড় ভাঙি

আর দিই কোপ

ঝোপ বুঝে কোপ ।

আঁদাড়ে কোপ, পঁদাড়ে কোপ ।

“চোপ চোপ” বলে ছতুম সবাইকে থামিয়ে গম্ভীর সুরে আঁধারের স্ততি আওড়ালেন, “নিঝুম রাত, ছপুর রাত, নিশুতি রাত । কেঁচ পক্ষের কষ্টি পাথর কালো আকাশের কালো রাত । বর্ষাকালের কাজল মাখা পিছল রাত । নিখুঁত রাত । কালোর পরে একটি খুঁত তারার টিপ । ভয়ংকরী নিশীথিনী, বিরূপা ঘোর, ছায়ার মায়ী, থাকুন, তিনি রাখুন । নিশাচর নিশাচরী রক্তপাত করি, আচম্বিতে নিঝুম রাতে, ছপুর রাতে । নষ্টচন্দ্র, ভ্রষ্ট তারা, ভিতর-বার অন্ধকার-রাত সারারাত । নিঝুম ছপুর, নিখুঁত ছপুর, অফুর রাত ।”

ছতুম পৌঁচা চূপ করলেন । খানিক চারি দিক যেন গমগম করতে লাগল, কারু সাড়া-শব্দ নেই, অন্ধকারে কেবল ছুঁচোর খুসখাস আর বেড়ালের গা-চাটার চটচট শোনা যেতে লাগল । পাকুড়তলায় এত বড়ো গম্ভীর মজলিস কোনোদিন বসে নি ।

এইবার ব্যয়েসে সবার বড়ো চিলে পৌঁচার পালা । সে চড়া গলায় চীৎকার করে শুরু করলে, “ভুই সব ।” সব জ্বলন্ত চোখগুলো অমনি চিলের দিকে ফিরল । “ভাই সব, আমরা আজ এই কতকালের পুরনো মিসকালো পাকুড়তলায় ঘুটঘুটে আঁধারে কেন এসেছি জান ? খুন খুন খুন করতে, এ আমি চেষ্টিয়েই বলব । কিসের ভয় । কাকে ভয় ।” তার পর একেবারে নবমে গলা চড়িয়ে চিলে বললে, “ভয় করব না, চেষ্টিয়েই বলি, কুঁকড়োটা চো-ও-ও-র”, ব’লেই বড়ো চিলের গলা ভেঙে গেল, সে খক খক করে কাসতে লাগল, আর অস্থ সব পৌঁচা চেষ্টাতে থাকল, “চোর । ডাকাত । সিঁদেল । বদমাশ । আমাদের সর্বস্ব নিলে ।”

চড়াই অমনি বলে উঠল, “কী নিলে শুনি ।”

“আমাদের আনন্দ, আমাদের তেজ সবই হরণ করছে জান না?” ব’লে পৌঁচাগুলো চড়াইয়ের

দিকে কটমট করে চাইতে লাগল।

চড়াই একটু দূরে সরে একটা বাঁশঝাড়ে বসে শুধলে, “তোমাদের তেজ কেমন করে হরণ করলে সে।”

“কেন, গান গেয়ে। তার সুর শুনলেই আমাদের হৃৎখু আসে, বেদনা বোধ হয়; সব পৈঁচারই মন খারাপ হয়ে যায়, কেননা তার সাড়া পেলেই মনে পড়ে।”

“আলো আসছে।” বললেই চড়াই সট করে বাঁশঝাড়ে লুকল। হুতুম রেগে চড়াইকে বললে, “চুপ। খবরদার, ও জিনিসের নাম আর কোরো না, ও নাম শুনলেই রাত্রির মন চঞ্চল হয়ে যেন পালাই পালাই করতে থাকে।”

চড়াই বেরিয়ে এসে বললে, “আচ্ছা না-হয় দিন আসছে বলা যাক।”

অমনি সব পৈঁচা শিউরে উঠে চারি দিকে “ঊ ঙাঁ” করতে লাগল আর কানে ডানা ঢেকে বিকট মুখ করে বলতে লাগল, “খামো, খামো, চুপ, চুপ।” চড়াই আবার লুকিয়ে পড়ল, পৈঁচাদের বিকট চেহারা দেখে তার একটু ভয় হল। হুতুম খানিক ভেবে বললে, “বলো-না বাপু, যা আসবার তা আসছে।” চড়াই বললে, “যাক ও কথা, যা আসবার তা তো আসবেই, কেউ তো ঠেকাতে পারবে না।”

হুতুম বললে, “তা তো জানি, কিন্তু আসবার আগে তার নাম কেন সে কুকড়ো করে বলো তো? তার কাঁসির মতো গলা শুনলেই সেই শেষ রাতের কথাই যে মনে আসে।”

“ঠিক, ঠিক, সত্যি, সত্যি।” সব পৈঁচাই বলে উঠল। দিনের কথা মনে করতেও তাদের বিষম কষ্ট হচ্ছিল।

হুতুম বললে, “রাত যখন পোহাবার দিকেই যায়নি, তখন থেকেই পাজি কুকড়োটা গান শুরু করে...।”

সবাই অমনি বলে উঠল, “ডাকু হায়। চোট্টা হায়।” হুতুম আবার বললে, “বাকি রাতটুকু সে একেবারে কাঁচা-ঘুম ভাঙিয়ে মাটি করে দেয়।” চারি দিক থেকে অমনি চৈঁচানি উঠল, “মাটি। মাটি। একেবারে মাটি। নেহাত মাটি।” তার পর একে একে সবাই আপনার আপনার হৃৎখু জানাতে লাগল। ধুঁধুল বললে, “খরগোশের গর্ভর কাছে খানিক বসতে না বসতে কুকড়োটা

ডাক দেয় আর অমনি আমায় সরতে হয়।” কাল পৌঁচা বললে, “পেটের খিদে ভালো করে মেটাবার জো নেই সেটার জ্বালায়।” কেউ বললে, “তঁার সাড়া কানে এলেই আর মাথা ঠিক রাখতে পারি নে, এটা করতে ওটা করে ফেলি। খুন করতে হয় মশায় তাড়াতাড়ি। যেন আমারি দায় পড়েছে। জ্বখমগুলোও যে একটু শক্ত করে বসা ব তার সময় পাই নে মশায়। যতটুকু মাংস দরকার তার বেশি একটু কি সংগ্রহ করবার জো আছে ওটার জ্বালায়। ওর গলাটা শুনলেই দেখি যেন অন্ধকার দেখতে-দেখতে ফিকে হচ্ছে, আর আমি ভয়ে একেবারে কেঁচো হয়ে যাই।”

চড়াই শুনে শুনে বললে, “আচ্ছা সব দোষ কি কুঁকড়োর। এ-পাড়া ও-পাড়ায় আরো তো অনেক মোরগ আছে যারা ডেকে থাকে।”

ছতুম বললে, “তাদের গানকে আমরা ভয় করি নে। ওই কুঁকড়োর ডাকটাই যত নষ্টের গোড়া, সেইটেই বন্ধ করা চাই।”

সবাই অমনি চেষ্টা করে উঠল, “বন্ধ হোক। বন্ধ হোক। চাই বন্ধ করা চাই।” আর ডানা বাজাতে লাগল। গোলমাল একটু থামলে গো-পৌঁচা বললে, “তা যাই বল, চড়াই আমাদের জন্তে অনেক করেছেন।” চড়াই ভয় পেয়ে বললে, “কী, কী, আমি আবার বললেম কী, ও আবার কেমন কথা?” খুঁদে পৌঁচা বললে, “কুঁকড়োর নিন্দে রটিয়ে তার নকল দেখিয়ে তামাশা করে।” অমনি দেউলে, দালানে, গুড়গুড়ে, গোয়ালে, গেছো, জংলা, পাহাড়ে সব পৌঁচা হাসতে লাগল “হঃ হঃ, ঠিক ঠিক, বাঃ বাঃ, ঠিক ঠিক, হু হু হু হু, হু-উ-উ, খুব ঠিক খুব ঠিক।”

ছতুম রোঁয়া ফুলিয়ে পাখা ঝাপটালে, “বস্-স্-স।” অমনি সব চুপ হয়ে গেল। চিলে পৌঁচা গলা কাঁপিয়ে চিঁ চিঁ করে বললে, “তার নিন্দেই রটাও আর নকলই দেখাও সে তো তাতে খোড়াই ডরায়। বেপরোয়া সে গান গেয়ে চলে, আর বেকার আমরা কেঁপেই মরি। এই দেখো-না সাজগোজ হীরে-জহরতের দিক দিয়ে দেখলে ময়ূরের সামনে কুঁকড়োটা দাঁড়াতেই পারে না, কিন্তু তবু তার গান, সে তো এখনো আমাদের জ্বালাতে ছাড়ছে না।” সব পৌঁচা বিকট চীৎকার করতে থাকল, “ধরো কুঁকড়োকে। মারো কুঁকড়োকে, ধুমাধুম ধুমাধুম।”

ছতুম চটপট ডানা ঝেড়ে খাড়া হয়ে দাঁড়িয়ে সবাইকে বললে, “থামো থামো শোনো শোনো,

এটেন-সান্ অ-ব-ধা-ন ।” অমনি সব পৈঁচা ডানা ছড়িয়ে গোল চোখগুলো পাকিয়ে স্থির হয়ে বসল, এমনি গম্ভীর হয়ে যে, রাতটাও মনে হতে লাগল যেন কত বড়ো, কত-না গভীর । ঘুটঘুটে অন্ধকারের মধ্যে থেকে লক্ষ্মী পৈঁচা আন্তে আন্তে বললে, “তাকে মারা তো হয় না। যে সময়ে সে ঘরের বাইরে এসে দাঁড়ায় সে সময় আমরা দেখতেই পাই নে, চোখে সব যে বোধ হয় ধোঁয়া আর ধাঁধা— ধাঁ-ধাঁ ধাঁ ।” ব’লেই লক্ষ্মী পৈঁচা চুপ করলে, আর সব পৈঁচা গুমরোতে থাকল ।

তখন পাকুড়গাছের আগড়ালের উপর থেকে কুটুরে পৈঁচা মিহি আওয়াজ দিলে, “বোলুঙ্গা কুছ, সল্লা হ্যায় কুছ ।” হুতুম উপর দিকে চেয়ে বললে, “শুনি, তোমার মতলবটা কী ।” কুটুরে সট করে নীচের ডালে নেমে বসে আরম্ভ করলে, “পাহাড়ের ওদিকটায় একটা লোক অদ্ভুত সব পাখির চিড়িয়াখানা বানিয়েছে, নানা দেশী-বিদেশী মোরগ, নানা জাতের নানা কেতার ধরা আছে । ময়ূর যিনি রাজ্যের অদ্ভুত পাখির খবর রাখেন, তিনি কুঁকড়োকে কিছতে দেখতে পারেন না, কেননা, ময়ূরের একটিমাত্র বৈ ছুটি সুর নেই, তাও আবার কর্ণকুহর ভেদ করা ছাড়া আর কিছু করতে পারে না । কিন্তু কুঁকড়োর ডাক, সে সোজা অন্ধকারের বৃকে গিয়ে বেঁধে আর তার পর যে কাণ্ডটা ঘটে তা কারুর জানতে বাঁকি নেই । কাজেই ময়ূর স্থির করেছেন চিনে-মুরগির কুলতলার মজলিসে তিনি এই-সব অদ্ভুত মোরগদের হাজির করবেন।” “চিনে-মুরগির সঙ্গে আলাপ করে দিতে বুঝি ?” ব’লেই সব পৈঁচা হেঁ হেঁ করে হাসতে থাকল ।

কুটুরে বললে, “এই-সব অদ্ভুত মোরগের কাছে কি কুঁকড়ো দাঁড়াতে পারবে । একেবারে খাড়া দাঁড়িয়ে মাটি হবে ।” গোয়ালে পৈঁচা বলে উঠল, “হাজির তারা হবে কেমন করে । খাঁচা না খুলে দিলে তো সেই-সব খাসা মোরগদের এক পা নড়বার সাধ্য নেই ।”

কুটুরে সবাইকে আশ্বাস দিয়ে বললে, “তারও উপায় করা গেছে । যে পাহাড়ী ছোঁড়াটা খাঁচা খুলে সকালে তাদের দানাপানি খাওয়ায় সে কাল যেমন খাঁচা খুলবে আর আমি অমনি তার মুখে গিয়ে ডানার এক ঝাপটা দেব । নিশ্চয়ই সে কাঁদতে কাঁদতে দৌড় দেবে খাঁচা খোলা রেখে । পৈঁচার বাতাস গায়ে লাগলেই অশুখ, সেটা জানো তো । তার পর সব মোরগকে নিয়ে সরে পড়ো আর কি ।”

চড়াই বললে, “ওদিকে কুঁকড়ো বলছেন যে তিনি মজলিসে মোটেই যেতে রাজি নন ।”

বেড়াল বললে, “যাবে না কী। নিশ্চয়ই যাবে। দেখ নি সোনালিয়া মুরগিটির সঙ্গে তার কত ভাব। আমি এই লিখে দিচ্ছি সোনালিয়া কুকড়োকে মজলিসে হাজির করবেই কাল।” চড়াই বুঝলে কালো বেড়ালটা সারাদিন ঘুমোয় বটে, কিন্তু কোথা কী হয় সেটুকুও দেখে শোনে, গোলাবাড়ির সব খবরই সে রাখে চোখ বুজে বুজেই।

চড়াই বললে, “হাজির যেন হলেন কুকড়ো, তার পর?”

“তার পর আর কী। কুকড়ো যখন দেখবেন পাড়ার সবাই অদ্ভুত সব মোরগদের খাতির করতেই ব্যস্ত, এমন-কি, হয়তো সোনালি পর্যন্ত, জেনে রেখো তখন খুঁটিনাটি বাধবেই আর তা হলেই—”

“কুকড়োর লড়াই না হয়ে যায় না।” বলেই ছতুম ঠোঁটে ঠোঁট বাজিয়ে দিলেন। কিন্তু বেড়াল বললে, “ধরো লড়ায়ে কুকড়োর হার না হয়ে জিতই হয়ে গেল ফস করে। তখন উপায়?”

কুটুরে অমনি বললে, “সে ভাবনা নেই, ওই-সব খাসা মোরগদের মধ্যে যে বাজখাঁই পালোয়ান মোরগ আছে তাকে পারে এমন কেউ দেখি নে। মানুষ তার পায়ে লোহার কাঁটা-দেওয়া যে কাতান বেঁধে দিয়েছে তার এক ঘা খেলে কুকড়োকে আর দেখতে হবে না, একেবারে চিৎপটাং।” বলে কুটুরে হাসতে লাগল। সঙ্গে সব পেঁচাই ধাই ধাই করে নাচতে থাকল।

ছতুম বললে, “আমি তো বাপু আগে গিয়ে তার মাথার মোরগ ফুলটা ছিঁড়ে খাব, কপা কপ্ কপা কপ্।”

চড়াই মনে মনে বললে, “গতিক তো খারাপ দেখছি। কুকড়োকে খবর দেব নাকি।” কিন্তু চেঁচিয়ে সে সবাইকে বললে, “বেশ হবে, খুব হবে, ভালোই হবে, কী বল।”

কুটুরে বললে, “মজা ব’লে মজা। খাসা মোরগগুলোও ছ-চারটে মরবে নিশ্চয়। পেট ভরে খাও; সেগুলো কি নষ্ট করা ভালো।”

ছতুম চিলের কানে-কানে বললে, “কুকড়োর কাবারের পর দুজনে মিলে, বুঝেছ কিনা, চড়াই ভাতি...” আর তার পরে ধুঁধুলে পেঁচা কী বলতে যাচ্ছে এমন সময় দূরে কুকড়োর সাড়া পড়ল, “গা-তোল্-তোল্।” পেঁচারা শুনলে, “পটোল তোল্।” অমনি ভয়ে সব

চূপ। কুটুরে ক্রমেই মাথা হেঁট করতে লাগল। কে যেন তার ঘাড় ধরে মাটিতে মুখ ঘষে দিতে চাচ্ছে। এতক্ষণ পৈঁচা-সব ঝোঁয়া ফুলিয়ে বিকট চেহারা করে বসে ছিল, দেখতে দেখতে ফুটো রবারের গোলার মতো চূপসে গেল, যেন কতদিন খায় নি। মুখে কারু কথা সরছে না, কেবল চোখ পিটপিট করে এ ওকে শোখাচ্ছে, “হল কী। কী ব্যাপার।” তার পর ডানা মেলে একে একে সবাই পালায় দেখে চড়াই বললে, “এরি মধ্যে চললে নাকি।” চড়ায়ের কথা কে-ইবা শোনে। চড়াই যত বলে, “ভোর হতে এখনো দেরি, চলুক না ঘোঁট আরো খানিক।” সব পৈঁচা চোখ পিটপিট করে বলে, “না না না, আর না, আর না, আর না।” ছতুম বললে, “গেলুম।” ধুঁধুল বললে, “মলুম।” “বাঁচাও বাঁচাও।” বলছে আর-সব পৈঁচাগুলো। তাড়াতাড়িতে কোথায় যাবে, কী করবে ঠিক পাচ্ছে না, কানার মতো কখনো কাঁটা-গাছে গিয়ে পড়ছে, কখনো পাথরে টক্কর খাচ্ছে। আর ডানা দিয়ে চোখ-মুখ ঘষছে আর বলছে, “উঃ গেছি। উঃ গেছি।” “লাগছে লাগছে।” বলতে বলতে একে একে সব পৈঁচা চম্পট দিলে। সব-শেষ ছতুম পৈঁচাটা “গেলুম। গেলুম।” বলতে বলতে উড়ে পালাল।

চড়াই দেখলে অন্ধকারের মধ্যে কালো কালো নৌকার মতো দলে-দলে পৈঁচা গ্রাম ছাড়িয়ে ক্রমে পাহাড়ের গায়ে মিলিয়ে গেল। আর কেউ কোথাও নেই, পাকুড়তলা সে একা রয়েছে। “ফজর তো হল এখন ছোটো হাজরির জন্তে একটা গঙ্গা ফড়িং পেলে হয় ভালো।” বলে চড়াই এদিক ওদিক করছে, এমন সময় একটা ঝোপের আড়াল থেকে ঝপ করে সোনালিয়া বেরিয়ে এল। চড়াই অবাক হয়ে বললে, “একি। এত রাত্রে আপনি এখানে।”

সোনালিয়া একটু দূরে থেকে পৈঁচাদের যুক্তি সমস্ত শুনেছিল, সে হাঁপাতে হাঁপাতে বললে, “কী ভয়ানক ব্যাপার, চড়াই তো কুঁকড়োর বন্ধু, এখন বন্ধুকে বাঁচাতে চেষ্টা তো তার করা উচিত।” চড়াই আবার ফড়িং-এর সন্ধান করতে করতে বললে, “পৈঁচা ভাজা খেতে কী মজা তা পাখিজন্মে তারা কেউ জানলে না—।”

সোনালিয়া অবাক হল। চড়াইটার রকম দেখে সে রেগে বললে, “কথার জবাব দাও-না।” “কীঃ।” বলেই চড়াই ফিরে দাঁড়াল। সোনালি শুধলে, “ঘোঁটের খবর জানতে চাচ্ছি।” চড়াই ধীরে স্নেহে উত্তর করলে, “ঘোঁটটা খুব চলেছিল, সব দিকেই ভালো।”

সোনালি চড়াই-এর হেঁয়ালির অর্থ বুঝলে না ; সে পরিষ্কার জবাব চাইলে । চড়াই বললে, “অন্ধকার বেশ ঘুটঘুটে আর পৈঁচাগুলোও বেশ মোটা-সোটা দেখলেম ।”

“তারা তাঁকে মারবার যুক্তি করলে ?” সোনালি শোধালে ।

“নাঃ, মারবার নয় তাকে পরলোকে পাঠাবার যুক্তি ।” ব’লে চড়াই সোনালিকে আশ্বাস দিয়ে বললে, “তবু কতকটা রক্ষে, কী বলো ।” সোনালি কি বলতে যাচ্ছিল, চড়াই বললে, “ভাবছ কেন, শেষ দাঁড়াবে যা তা ফক্কাঃ, বুঝলে ।” সোনালি ভয়ে ভয়ে বললে, “যাই বল কিন্তু পৈঁচারাতো সহজ পাখি নয় ।”

চড়াই হেসে বললে, “কিন্তু তাদের যুক্তিটা মোটেই ভয়ানক নয় । আরো অনেক যুক্তি তারা এঁটেছে ঝাঁটবেও । পৈঁচাগুলো যদি সহজ পাখি হত তবে ঘুঁট না করে খাবার ঘুঁটেই তারা বেড়াত । কিন্তু তাদের ভুরু চোখের উপরে, নীচে, আশে পাশে, আর চোখগুলো দেখেছ তো ? মনে হয় যেন পাহারোলার লঠন, খোলো আর বন্ধ করো । আর ঠোঁট তো দেখেছ ?” ব’লেই চড়াই “ছিঃ ছিঃ ।” বলে ডানা ঝাড়া দিয়ে বললে, “তুমি কিছু ভেবো না সোনালি । সব ঠিক হবে, অবস্থা বুঝে ব্যবস্থা করা চাই, বুঝলে কিনা ।”

সোনালি চড়াই-এর হেঁয়ালি বড়ো একটা বুঝলে না কিন্তু কুঁকড়োর পুরনো বন্ধু হয়ে চড়াই এখনো যখন হাসিতামাশা করছে তখন ভয়ের কারণ খুবই কম এটা তার মনে হল । “কিন্তু তবু কী জানি, কুঁকড়োকে সব কথা জানানো ভালো ।” ব’লে সোনালি গোলাবাড়ির দিকে যাবে, চড়াই তাকে তাড়াতাড়ি পথ আগলে বললে, “অমন কাজটি করো না, যদি-বা কুঁকড়ো সেখানে না যান, এই ঘোঁটের কথা শুনলে নিশ্চয়ই যাবেন, আর তা হলে লড়াই বাধবেই ।” সোনালি চড়াইয়ের কথা রাখলে । চড়াই যখন তাঁর পুরনো বন্ধু, তখন তারি পরামর্শমত কাজ করাই ঠিক । সোনালি যাচ্ছিল, ফিরে এল ।

ওদিক থেকে শব্দ এল, “গা তো ল্ ।” চড়াই আর সোনালি ফিরে দেখলে কুঁকড়ো আসছেন । কুঁকড়ো হাঁক দিলেন, “কো-উ-ন হ্যায় ।”

সোনালি মিহিন্দ্রে উত্তর দিলে, “সো-না-লি-য়া”, কুঁকড়ো শোধালেন, “ওখানে আর কেউ আছে কি ।” সোনালি চড়াইকে চোখ টিপে বললে, “না মশায় ।” ঘোঁটের কথা কুঁকড়োকে

যেন বলা না হয় সোনালিকে সে বিষয়ে সাবধান করে দিয়ে, চড়াই আশ্তে আশ্তে বাবলা গাছের তলায় একটা খালি ফুলের টবের আড়ালে গিয়ে লুকোল।

৫

কুকড়ো নিজে যেমন, তেমনি কাউকে ভোরে উঠতে দেখলে ভারি খুশি। সোনালিয়াকে দেখে বললেন, “বাঃ তুমি তো খুব সকালে উঠেছ। বেশ, বেশ।” কিন্তু সোনালিয়া চিনে-মুরগির চা-পার্টিতে যাবার জন্তেই খালি আজ এত সকালে বিছেনা ছেড়ে বেরিয়েছে শুনে কুকড়ো ভারি দমে গেলেন। কুকড়ো পষ্ট বললেন, তিনি ওই চিনে-মুরগিটাকে ছ’চক্ষে দেখতে পারেন না। কিন্তু সোনালিয়া ছাড়বার নয়, সে তবু কুকড়োকে চিনে-মুরগির মজলিসে যেতে পেড়াপিড়ি করে বললে, “দেখি তুমি আমার কথা রাখ কি না।”

কুকড়ো তবু যেতে রাজি নয়, তখন সোনালিয়া অভিমান করে বললে, “তবে আমি এখনি বাড়ি চলে যাই।” কুকড়ো তাড়াতাড়ি বলে ফেললেন, “না সোনালি, এখনি যেয়ো না।” সোনালি অমনি স্বেযোগ বুঝে বললে, “তবে যাবে বলো চিনি-দিদির বাড়িতে।” কুকড়ো কিছুক্ষণ চুপ করে থেকে বললেন, “আচ্ছা তাই, আমিও যাব।” কথাটা ব’লেই কুকড়ো মনে মনে নিজের উপর খুব চটলেন, মেয়েরা যা আবদার করবে, তাই কি মানতে হবে।

সোনালি কুকড়োর ভাব বুঝে মনে মনে হাসতে লাগল। কুকড়োকে চিনি-দিদির বাড়িতে নিয়ে যেতে সে খুব ব্যস্ত ছিল না; সে কুকড়োর কাছ ঘেঁষে বললে, “তোমার সেই মস্তুরের কথাটি বলো-না শুনিই-ই—।”

কুকড়ো একটু গম্ভীর হলেন, সোনালি বললে, “বলো-না, বলোবলো, বলো-না।”

কুকড়ো এবারে গদগদস্বরে “সোনালি আমার মনের কথাটি” বলে আবার চুপ করলেন। সোনালি বলে চলল, “বনের মধ্যে বসন্তকালের চাঁদনিত সারারাত কাটিয়ে একলাটি আমি বনের ধারে এসে দাঁড়িয়েছি, সকালের আলো আকাশে ঝিলিক দিয়ে উঠল, আর অমনি শুনলেম, তোমার ডাক দূর থেকে আসছে, যেন দূরে কার বাঁশি বাজছে।”— বনের রানী



সোনালিয়া পাখি সকালের সোনার আলোতে একলাটি দাঁড়িয়ে কান পেতে তাঁর গান শুনছে একমনে, এ খবর পেয়ে কোন্ গুণীর না মনটা নরম হয়। কুঁকড়ো ঘাড় হেলিয়ে ভাবতে লাগলেন, ‘বলি কি না বলি।’ সোনালিয়া মিঠে সুরে আরম্ভ করলে রূপকথা, “এক যে ছিল কুঁকড়ো আর যে ছিল বনের টিয়া।” কুঁকড়ো ভুল ধরলেন, “হল না তো হল না তো।” তার পর নিজেই রূপকথার খেই ধরলেন, কুঁকড়োর পিয়া ছিল সোনালিয়া, বনবাসিনী বনের টিয়া।” সোনালিয়া বলল উঠল, “কুঁকড়ো টিয়াকে কখনো বললে না রূপকথার নিতিটুকু”, বলতেই কুঁকড়ো সোনালিয়ার কাছে এসে বললেন, “জানো, সে কথাটা কী? যেটা বনের টিয়াকে কুঁকড়ো বলতে সময় পেলে না? কথাটা হচ্ছে, তোমার সোনার আঁচল বসন্তের বাতাস দিয়ে গেল সোনালিয়া বনের টিয়া।” সোনালি গম্ভীর হয়ে বললে, “কী বকছেন আপনি। রূপকথা শোনাতে হয় তো আপনার চার বউকে শোনান গিয়ে, খুশি হবে”, ব’লেই সোনালি অশ্রু দিকে চলে গেল।

কুঁকড়ো রেগে গজ গজ করে ঘুরে বেড়ান, অনেকক্ষণ পরে সোনালি আস্তে আস্তে কুঁকড়োর কানের কাছে মুখ নিয়ে বললে, “একটা গান গাও-না।” কুঁকড়ো ফৌঁস করে উঠলেন, সোনালি বললে, “বাসরে, একে বুঝি বলে গান!” তখন মিষ্টি সুরে কুঁকড়ো ডাকলেন, “সো-ও-ও-ন”, যেন শ্যামা পাখি সিটি দিলে, সোনালি অমনি আবদার ধরলেন, কুঁকড়োর গুলু মস্তুরটি শোনবার জন্তে। কুঁকড়ো খানিক এদিক ওদিক করে বললেন, “সোনালি, তুমি বাইরে যেমন খাঁটি সোনার বৃকের ভিতরটাও যদি তেমনি তোমার খাঁটি হয় তবে তোমায় আমার গোপন কথাটি শোনাতে পারি”, ব’লে সোনালির মুখের দিকে অনেকক্ষণ চেয়ে থেকে যেন শুনতে লাগলেন, সোনালির বৃকের মধ্যে থেকে ডাক আসছে কি না, ‘বলো বলো।’ তার পর কুঁকড়ো আরম্ভ করলেন, “সোনালি পাখি, বৃকে দেখো আমি কী, সোনার শিঙার মতো বাঁকা আমি বাজবার জন্তেই সৃষ্টি হয় নি কি জীবন্ত এক রৌশন-চৌকি? জলের উপরে যেমন রাজহাঁস, তেমনি সুরের তরঙ্গে ভেসে বেড়াতেই আমার জন্ম, আমি চলছি সুরের বোঝা শব্দের ভার বয়ে সোনার একটি মউরপঙখি, সকাল-বিকাল।”

সোনালিয়া বলল উঠল, “নৌকোর মতো ভেসে বেড়াতে তো তোমায় কোনোদিন দেখি নি,

মাটি আঁচড়াতে প্রায়ই দেখি বটে।”

কুকড়ো বললেন, “মাটি আঁচড়াবার অর্থ আছে। তুমি কি মনে কর, আমি মাটি আঁচড়াই মাসকলাই সংগ্রহ করতে। সে করে মুরগিরা, আমি মাটি আঁচড়ে দেখি, কোন্ মাটি আমার উপযুক্ত দাঁড়াবার বেদী হতে পারে। আমি জানি, গান গাওয়া মিছে হবে যদি না ইট-পাটকেল ঘাস কুটো কাঁটা সব সরিয়ে এই পুরানো পৃথিবীর কালো মাটির পরশখানি নিতে ভুলি। পৃথিবীর বৃকের খুব কাছে দাঁড়িয়ে মাটির সঙ্গে নিজেকে একেবারে মিলিয়ে তবে আমি গান করি। সোনালিয়া, প্রায় সবই তো শুনলে, আরো যদি জানতে চাও তো বলি, আমাকে সুর খুঁজে খুঁজে তো গান গাইতে হয় না, সুর আপনি ওঠে আমার মধ্যে, মাটি থেকে লতায় পাতায় রস যেমন ক’রে উঠে আসে, গানও তেমনি করে আমার মধ্যে ছুটে আসে আপনি, জন্মভূমির বৃকের রস। পূব আকাশের তীরে সকালটি ফুটি-ফুটি করছে, ঠিক সেই সময় আমার মধ্যে উথলে উঠতে থাকে সুর আর গান, বৃক আমার কাঁপতে থাকে তারি ধাক্কায়, আর আমি বুঝি, আমি না হলে সরস মাটির এই সুন্দর পৃথিবীর বৃকের কথা খুলে বলাই হবে না। সকালের সেই শুভ লগ্নটিতে মাটি আর আমি যেন এক হয়ে যাই, মাটির দিকে আমি আপনাকে নিয়ে যাই, আর পৃথিবী আমাকে সুন্দর শাঁখের মতো নিজের নিশ্বেসে পরিপূর্ণ করে বাজাতে থাকে, আমার মনে হয় তখন আমি যেন আর পাখি নই, আমি যেন একটি আশ্চর্য বাঁশি, যার মধ্যে দিয়ে পৃথিবীর কান্না আকাশের বৃকে গিয়ে বাজছে।

“অন্ধকারের মধ্যে থেকে ভোর রাতের হিম মাটি এই যে কাঁদন জানাচ্ছে, আকাশের কাছে তার অর্থ কী সোনালিয়া, সে আলো ভিক্ষে করছে, একটুখানি সোনার আলো-মাখা দিন তারি প্রার্থনা, ভোর বেলার সবাই কাঁদছে, দেখবে, আলো চেয়ে, গোলাপের কুঁড়ি সে অন্ধকারে কাঁদছে আর বলছে, আলো দিয়ে ফোটাও। ওই যে খেতের মাঝে একটা কাস্তে চাষারা ভুলে এসেছে, সে ভিক্ষে মাটিতে প’ড়ে মরচে ধ’রে মরবার ভয়ে চাচ্ছে আলো, একটু আলো এসে যেন রামধনুকের রঙে চারি দিকের ধানের শিষ রাঙিয়ে দেয়।

“নদী কেঁদে বলছে, আলো আশুক, আমার বৃকের তলা পর্যন্ত গিয়ে আলো পড়ুক। সব জিনিস চাচ্ছে যেন আলোয় তাদের রঙ ফিরে পায়, আপনার আপনার হারানো ছায়া ফিরে

পায়, তারা সারারাত বলছে, আলো কেন পাচ্ছি নে, আলো কী দোষে হারালেম।

“আর আমি কুঁকড়ো তাদের সে কান্না শুনে কেঁদে মরি, আমি শুনতে পাই ধান খেত সব কাঁদছে, শরতের আলোয় সোনার ফসলে ভরে ওঠবার জন্তে, রাঙা মাটির পথ সব কাঁদছে, যারা চলাচল করবে তাদের ছায়ার পরশ বৃকের উপর বুলিয়ে নিতে আলোয়। শীতে গাছের উপরের ফল আর গাছের তলার গোল গোল হুড়িগুলি পর্যন্ত আলো তাপ চেয়ে কাঁদছে, শুনি। বনে বনে সূর্যের আলোক কে না চাচ্ছে বেঁচে উঠতে জেগে উঠতে, কে না আলোর জন্তে সারা রাত কাঁদছে। এই জগৎসুদ্ধ সবার কান্না আলোর প্রার্থনা এক হয়ে যখন আমার কাছে আসে তখন আমি আর ছোটো পাখিটি থাকি নে, বুক আমার বেড়ে যায়, সেখানে প্রকাশ্যে আলোর বাজনা বাজছে শুনি, আমার হুই পাঁজর কাঁপিয়ে তার পর আমার গান ফোটে, “আ-লো-র ফুল”। আর তাই শুনে পূর্বের আকাশ গোলাপী কুঁড়িতে ভরে উঠতে থাকে, কাকসঙ্ঘার কা কা শব্দ দিয়ে রাত্রি আমার গানের সুর চেপে দিতে চায়, কিন্তু আমি গেয়ে চলি, আকাশে কাগড়মে রঙ লাগে তবু আমি গেয়ে চলি আলোর ফুল, তার পর হঠাৎ চমকে দেখি আমার বুক সুরের রঙে রাঙা হয়ে গেছে আর আকাশে আলোর জবাফুলটি ফুটিয়ে তুলেছি আমি পাহাড়তলির কুঁকড়ো।”

সোনালি অবাক হয়ে বললে, “এই বুঝি তোমার মস্তুর।”

“হাঁ, সোনালি, মস্তুরটা আর কিছু নয়, আমি না থাকলে পূব আকাশে সব আলো ঘুমিয়ে থাকত এই বিশ্বাসটা আমি করতে পেরেছি এইটুকুই আমার ক্ষমতা, তা একে মস্তুরই বলা বা তস্তুরই বলা কিংবা অস্তুরই বলা”, ব’লে কুঁকড়ো এমনি ঘাড় উঁচু ক’রে বুক ফুলিয়ে দাঁড়ালেন যে মনে হল যেন তিনি বলছেন— ‘ঘাড় হেঁট হয় এমন কাজ আমি করি নে, আমি নিজের গুণগান করে বেড়াই নে, আমি আলোর জয়-জয়কারই দিই, আমি জোরে গাই নিজের গলার রেশ নিজে শোনবার জন্তে নয়, আমি জোরে গাই আলোতে সব পরিষ্কার হয়ে ফুটবে ব’লে।’ কুঁকড়ো যতক্ষণ ব’লে চলেছিলেন ততক্ষণ সোনালি সব ভুলে তাঁর কথাই শুনছিল, এখন কুঁকড়ো চুপ করতে তার চটকা ভেঙে গেল, কুঁকড়োর কথায় তার অবিশ্বাস হল ; সে বলে উঠল, “একি পাগলের কথা! তুমি, তুমি ফুটিয়ে দাও আকাশে...”

“সেই জিনিস যা চোখের পাতা মনের ছয়ারে এসে ঘুমের ঘোমটা খুলে দেয়। আকাশ যেদিন মেঘে ঢাকা, সেদিন জানব, আমি ভালো গাই নি।”

“আচ্ছা, তুমি-যে দিনের বেলাও থেকে থেকে ডাক দাও, তার অর্থটা কী শুনি।” সোনালি শুধল।

কুঁকড়ো বললেন, “দিনের বেলায় এক-একবার গলা সেধে নিই মাত্র। আর কখনো-বা ওই লাঙলটাকে নয়তো কোদালটাকে ওই ঢেঁকি ও ওইখানে ওই কুড়ুল এই কাস্তেকে বলি, ভয় নেই, আলোকে জাগিয়ে দিতে ভুল-ব-না ভুল-ব-না।”

সোনালি বললে, “ভালো, আলোকে যেন তুমি জাগালে, কিন্তু তোমাকে ঠিক সময়ে জাগিয়ে দেয় কে, শুনি?”

“পাছে ভুল হয়, সেই ভয়েই আমি জেগে উঠি।”

কুঁকড়োর জবাব শুনে সোনালির তকরার করবার ঝাঁক বাড়ল বৈ কমল না; সে বললে, “আচ্ছা, তুমি কি মনে কর, সত্যি তোমার গানে জগৎ জুড়ে আলোর বান ডাকে?”

কুঁকড়ো বললেন, “জগৎ জুড়ে কী হচ্ছে তার খবর আমি রাখি নে, আমি কেবল এই পাহাড়-তলিটির আলোর জন্ম গেয়ে থাকি, আর আমার এই বিশ্বাস যে এ-পাহাড়ে যেমন আমি ও-পাহাড়ে তেমনি সে, এমনি এক-এক পাহাড়তলিতে এক-এক কুঁকড়ো রোজ রোজ আলোকে জাগিয়ে দিচ্ছে।” সোনালির সঙ্গে কথা কইতে রাত ফুরিয়ে এল। কুঁকড়ো দেখলেন, সকালের জানান দেবার সময় হয়েছে, তিনি সোনালিকে বললেন, “সোনালি, আজ তোমার চোখের সামনে সূর্য ওঠাব, আমাকে পাগল ভেবো না, দেখো এবং বিশ্বাস করো। আজ যে গান আমার বুকের মধ্যে গুমরে উঠছে, তেমন গান আমি কোনোদিন গাই নি, গানের সময় আজ তুমি কাছে দাঁড়াবে, আমার মনে হচ্ছে, আজ সকালটি তাই এমন আলোময় হয়ে দেখা দেবে যে তেমন সকাল এই পাহাড়তলিতে কেউ কখনো দেখে নি সোনালিয়া।” বলে কুঁকড়ো ঢালুর উপরে গিয়ে দাঁড়ালেন। নীল আকাশের গায়ে যেন ঝাঁকা সেই কুঁকড়োকে কী সুন্দরই দেখাতে লাগল। সোনালি মনে মনে বললে, ‘এঁকে কি অবিশ্বাস করতে পারি।’ এইবার কুঁকড়ো সোজা হয়ে দাঁড়ালেন, গায়ের রঙিন পালক ঝাড়া দিয়ে। সোনালি দেখলে, তাঁর মাথার মোরগ-ফুলটা যেন আগুনের শিখার

মতো রগরগ করছে। পুব দিকে মুখ করে কুঁকড়ো ডাক দিলেন, “ফ জী-ই-ই-র্ ফ-জী-র্”... সোনালি শুনলে কুঁকড়ো যেন পুব আকাশকে ছুকুম দিলেন, “কাজ শুরু করো”, আর অমনি মাটির ছুকুম কাজের সাড়া সকালের বাতাসে অনেক দূর পর্যন্ত ছুটে গেল, “ভোর ভয়ি ভো-র ভ-য়ি” হাঁকতে হাঁকতে। তার পর সোনালি দেখলে কুঁকড়ো যেন সব কাদের সঙ্গে কথা কইছেন, “বাদল বসন্তের চেয়ে ছদশু আগে তোমার আলো এনে দেব ভয় নেই।” সোনালি দেখলে তিনি একবার মাটির কাছে মুখ নামিয়ে একবার ও-ঝোপ এ-ঝোপের দিকে মুখ ফিরিয়ে কখনো ঘাসগুলির পিঠে ডানা বুজিয়ে কত কী বলছেন, যেন সবাইকে তিনি অভয় দিচ্ছেন আর বলছেন, “দেব দেব, আলো দেব, রোদ দেব, হিম আঁধার ঘুচবে, ভয় কী ভয় কী।” অণুপরমাণু ধুলোবালি তারা— কুঁকড়োর কানে কানে কী বলে গেল, কুঁকড়ো ঘাড় নেড়ে বললেন, “দোলনা চাই, আচ্ছা, দোলনা দিচ্ছি, সোনার সে দোলনা বাতাসে ঝুলবে, আর অণু পরমাণু মিলে লাগবে ঝুলোন দে দোল দোল, দে দোল দোল।” সোনালি দেখলে আকাশ আর মাটির মধ্যে ঝোলানো পাতলা নীল অন্ধকার একটু একটু ছলছে আর দেখতে দেখতে ভোরের শুকতারা যেন ক্রমে নিভে আসছে। সোনালি বললে, “দিনের আলো দেবার আগে সব তারাগুলোকে বড়ো যে নিভিয়ে দিচ্ছি, এককে নিভিয়ে অণুকে আলো দেওয়া, এ কেমন ?” কুঁকড়ো একটু হেসে বললেন, “একটি তারাও আমি নিভিয়ে ফেলি নি সোনালি, আলো জ্বালাই আমার ব্রত, দেখো এইবার পৃথিবী আলোময় হচ্ছে, রাত্রি দু-উ-উ-র হল দেখতে দেখতে।” সোনালির চোখের সামনে নীলের উপর হলদে আলো লেগে সমস্ত আকাশ ধানি রঙে সবুজ হয়ে উঠল, মেঘগুলোতে কমলা রঙ আর দূরের পাহাড়ে মাঠে সব জিনিসে কুসুম ফুলের গোলাপী আভা পড়ল। কুঁকড়ো ডাক দিয়ে চললেন, “আলোর ফুল আলোর ফ-ল-কি-ই-ই গোলাপী হোক সোনালি, সোনালি সে রুপোলি, রুপোলি হোক সাদা আ-লো-আ-লো-র ফুল”, কিন্তু তখনো দূরে খেতগুলোতে শোন্ ফুলের রঙ মেলায় নি, সব জিনিসে চমক দিচ্ছে, কুঁকড়ো ডাকলেন, ‘আ-লো-ও ও’, অমনি কাছের খেতের উপরে চট করে এক পৌছ সোনালি পড়ল, পাহাড়ে ঝাউগাছের মাথায় সোনা ঝকঝক করে উঠল। কুঁকড়ো পুব ধারের আকাশকে বললেন, “খুলুক খুলুক।” অমনি আকাশ জুড়ে পুব দিকে আলোর ছড়া পড়তে থাকল। পাহাড়ের দিকে চেয়ে কুঁকড়ো ডাকলেন, “খুলুক খুলুক”, অমনি

সব পাহাড়ে পাহাড়ে গোলাপী ফুলে ভরা পদম্ গাছ ছবির মতো খুলে গেল সোনালির চোখের সামনে। “খুলুক খুলুক”, দূরে ঝাপসা পাহাড় কুয়াশার চাদর খুলে যেন কাছে এসে দাঁড়াল। দূরের কাছে সব জিনিস ক্রমে পরিষ্কার হয়ে উঠছে, অন্ধকার থেকে আস্তে আস্তে বেরিয়ে আসছে, নতুন করে আলো-ছায়া দিয়ে গড়া এক টুকরো পৃথিবী। শুকনো ছড়ি থেকে ফলস্তু আমগাছ গড়বার সময় ছেলেরা যেমন সেটার দিকে হাঁ করে চেয়ে থাকে সোনালি তেমনি কুঁকড়োর এই-সব কাণ্ডকারখানা অবাক হয়ে দেখছিল, আর ভাবছিল কুঁকড়োই বুঝি এ-সবের ছিষ্টিকস্তা, এমন সময় কানের কাছে শুনলে, “মোন, বলো ভালোবাস তো?”

সোনালি খানিক চুপ করে থেকে বললে, “অন্ধকার থেকে এমন সকাল যে উঠিয়ে আনলে, তার সঙ্গে মনের কথা চালাচালি করতে কে না ভালোবাসে।”

কুঁকড়ো বললেন, “সরে এসো সোনালি, বুক তুমি আনন্দে ভরে দিয়েছ, তোমাকে পেয়ে আজ কাজ মনে হচ্ছে কত সহজ” এই-ব’লে কুঁকড়ো ডাকলেন, “আলোর ফুলকি সোনালি”, সোনালি অমনি কুঁকড়োর একেবারে খুব কাছে এসে বললে, “ভালোবাসি গো ভা-লো-বা-সি।” কুঁকড়ো বললেন, “সোনালিয়া, তোমার সোনালিয়া রূপটি সোনালি কাজলের মতো আমার চোখের কোলে লাগল, তোমার মধুর মতো মিষ্টি আর সোনালি কথা প্রাণের মধ্যেটা সোনায় সোনায় ভরে দিয়েছে। এত সোনা আজ পেয়েছি যে মনে হচ্ছে এখনি ওই সামনের উঁচু পাহাড়টা আমি আগাগোড়া সোনায় মুড়ে দিতে পারি।” সোনালিয়া আদর করে বললে, “দাও-না পাহাড়টা গিলটি ক’রে, আমি তোমাকে রোজ রোজ ভালোবাসব।” কুঁকড়ো হাঁক দিলেন, “সো-না-র জল সো-না-লি-য়া”, অমনি পাহাড়ের চুড়ায় সোনা বকবক করে উঠল, তার পর সোনা গ’লে ঢালু বেয়ে আস্তে আস্তে নীচের পাহাড়ের গোলাপীতে এসে মিশল, শেষে গোলাপী ছাপিয়ে একেবারে তলায় মাঠের উপর গড়িয়ে পড়ল। দেখতে দেখতে দূর আর কাছের রাস্তা-ঘাট মাঠ-ময়দান ঘর-ছায়োর গ্রাম-নগর বন-উপবন সোনাময় হয়ে দেখা দিলে। কিন্তু দূরে পাহাড়ের গায়ে এখানে ওখানে নদীর ধারে গাছগুলোর শিয়রে এখনো একটু-আধটু কুয়াশা মাকড়সার জালের মতো জড়িয়ে রয়েছে, ওগুলো তো থাকলে চলবে না, কুঁকড়ো প্রথম আস্তে বললেন, “সাক্ষাই”, সোনালি ভাবলে, কুঁকড়ো বুঝি হাঁপিয়ে

পড়েছেন আর বুঝি পারেন না গান করতে, কিন্তু একি যে-সে কুঁকড়ো যে কাজ বাকি রেখে যেমন-তেমন সকাল করেই ছেড়ে দেবে, “আরো আলো চাই” বলে কুঁকড়ো আবার গা-ঝাড়া দিয়ে এমন গলা চড়িয়ে ডাক দিলেন যে মনে হল বুঝি, তাঁর বুকটা ফেটে গেল, “আলোর ফুল আলোর ফুল, ফু-উ-উ-উল-কি-ই-ই আলো-র-র-র-র”। দেখতে দেখতে আকাশের শেষ তারাটি সকালের আলোর মধ্যে একেবারে হারিয়ে গেল, তার পর দূরে দূরে গ্রামের কুটিরের উপর জ্বলন্ত আখার সাদা ধূঁয়া কুণ্ডলী পাকিয়ে সকালের আকাশের দিকে উঠে চলল আস্তে আস্তে। সোনালি তাকিয়ে দেখলে কুঁকড়ো কী সুন্দর। সে সকালের শিল্পী কুঁকড়োকে মাথা নিচু করে নমস্কার করলে। আর কুঁকড়ো দেখলেন, আলোর ঝিকিমিকি আঁচলের আড়ালে সোনালিয়ার সুন্দর মুখ। কুঁকড়ো মোহিত হলেন। আজ তাঁর সকালের আরতি সার্থক হল, তিনি এক আলোতে তাঁর জন্মভূমিকে আর তাঁর ভালোবাসার পাখিটিকে সোনায় সোনায় সাজিয়ে দিলেন। কুঁকড়ো আনন্দে চারি দিকে চেয়ে দেখলেন, কিন্তু তখনো কেন মনে হচ্ছে, কোথায় যেন একটু অন্ধকার লুকিয়ে আছে। তিনি আবার ডাক দিতে যাবেন, এমনি সময় নীচের পাহাড় থেকে একটির পর একটি মোরগের ডাক শোনা যেতে লাগল; যে যেখানে সবাই সকালের আলো পেয়ে গান গাচ্ছে। আগে আলো হল, পরে এল সব মোরগের গান, কুঁকড়ো কিন্তু সবার আগে যখন আলো বলে ডাক দিয়েছেন, তখনো রাত ছিল, তিনি যে সবার বড়ো তাই অন্ধকারের মাঝে দাঁড়িয়ে তিনি আলোর আশা সবাইকে শোনাতে পারেন। আলো জাগানো হল, এইবার সূর্যকে আনা চাই, কুঁকড়ো আবার শুরু করলেন, “রাঙা ফুল আঙনের ফুলকি”, অমনি দিকে দিকে সব মোরগ গেয়ে উঠল সেই সুরে, “আলোর ফুলকি, আলোর ফুল।”

সোনালি বললে, “দেখেছ ওদের আস্পর্ধা। তোমার সঙ্গে কিনা সুর ধরেছে, এতক্ষণ সবাই ছিলেন কোথা?”

কুঁকড়ো বললেন, “তা হোক, সুর বেসুর সব এক হয়ে ডাক দিলে যা চাই তা পেতে বেশি দেরি হয় না, সূর্য দেখা দিলেন বলে।” কিন্তু তখনো কুঁকড়ো দেখলেন একটি কুটির ছায়ায় মিশিয়ে রয়েছে, তিনি হাঁক দিলেন অমনি কুটিরের চালে সোনার আলো লাগল। দূরে একটা সরষে খেত

তখনো নীল দেখাচ্ছে, কুঁকড়ো ডাক দিলেন, আলো পড়ে খেতটা সবুজ হল, খেতে যাবার রাস্তাটি পরিষ্কার সাদা দেখা গেল, নদীটা কেমন ধুঁয়াটে দেখাচ্ছিল। কুঁকড়ো ডাকলেন, অমনি নদীর জলে পরিষ্কার নীল রঙ গিয়ে মিলল। হঠাৎ সোনালিয়া বলে উঠলে, “ওই যে সূর্য উঠেছেন।” কুঁকড়ো আস্তে আস্তে বললেন, “দেখেছি, কিন্তু বনের ওপার থেকে এপারে টেনে আনতে হবে আমাদের ওই সূর্যের রথ, এসো তুমিও”, বলেই কুঁকড়ো নানা ভঙ্গিতে যেন সূর্যের রথ টেনে ক্রমে পিছিয়ে চললেন, “তফাত হো তফাত হো” বলতে বলতে। সোনালিয়া বলতে লাগল, “আসছেন আসছেন”, কুঁকড়ো হাঁপাতে হাঁপাতে বললেন, “ওপার থেকে এল রথ।” ঠিক সেই সময়ে শালবনের ওপার থেকে সূর্য উদয় হলেন সিন্দুর বরন। কুঁকড়ো মাটিতে বুক ঠেকিয়ে সূর্যের দিকে একদৃষ্টে চেয়ে বললেন, “আঃ, আজকের সূর্য কত বড়ো দেখেছ!” সোনালির ইচ্ছে, কুঁকড়ো সূর্যের জয় দিয়ে একবার গান করেন। কিন্তু গলার সব সুর খালি করে তিনি আজ সকালটি এনেছেন আর তাঁর সাধ্য নাই গাইতে। যেমন এই কথা সোনালিকে কুঁকড়ো বলেছেন, অমনি দূরে দূরে সব মেঝরগ ডেকে উঠল “উরু-উরু-রু-রু-রু”। কুঁকড়ো শুকনো মুখে বললেন, “আমি নেই-বা জয় দিলেম, শুনছ দিকে দিকে ওরা সব তুরী বাজিয়ে তাঁর উদয় ঘোষণা করছে।” সোনালি শুধলে, “সূর্য উঠলে পর তুমি কি কোনোদিনই তাঁর জয়-জয়কার দাও না? তোমার নবতথানায় সোনার রৌশনচৌকি সূর্যের জয় দিয়ে কি কোনোদিন বাজাও নি।”

“একটি দিনও নয়” বলে কুঁকড়ো চুপ করলেন। সোনালি একটু ঠেস দিয়ে বললে, “সূর্য তো তা হলে ভাবতে পারেন অল্প সব মোরগেরা তাঁকে উঠিয়ে আনে।” কুঁকড়ো বললেন, “তাতেই-বা কী এল গেল।” সোনালি আরো কী বলতে যাচ্ছে, কুঁকড়ো তাকে কাছে ডেকে বললেন, “আমি তোমায় ধন্যবাদ দিচ্ছি, তুমি আমার কাছে আজ না দাঁড়ালে সকালের ছবিটা কখনোই এমন উৎরতো না।” সোনালি কুঁকড়োর কাছে এসে বললে, “তুমি যে সকালটা করতে সূর্যের রথ বনের ওপার থেকে টেনে আনতে এত কষ্ট করলে তাতে তোমার লাভটা কী হল।” কুঁকড়ো বললেন, “পাহাড়ের নীচে থেকে ঘুমের পরে জেগে ওঠার যে সাড়াগুলি আমার কাছে এসে পৌঁচছে, এইটেই আমার পরম লাভ।” সোনালি সত্যিই শুনলে, নীচে থেকে



দূর থেকে কাছ থেকে কী-সব শব্দ আসছে। সে পাহাড় থেকে মুখ ঝুকিয়ে চারি দিক চাইতে লাগল। কুঁকড়ো চুপটি করে চোখ বুজে বসে বললেন, “কী শুনছ সোনালিয়া, বলো।”

সোনালিয়া বলে চলল, “আকাশের গায়ে কে যেন কাঁসর পিটছে।”

কুঁকড়ো বললেন, “দেবতার আরতি বাজছে।”

সোনালি বললে, “এবার যেন শুনছি মানুষদের আরতির বাজনা টং টং।”

কুঁকড়ো বললেন, “কামারের হাতুড়ি পড়ছে।”

সোনালি, “এবার শুনছি গোরু সব হামা দিয়ে ডাকছে আর মানুষে গান ছেড়েছে।”

কুঁকড়ো, “হাল গোরু নিয়ে চাষা চলেছে।”

সোনালি এবার বললে, “কাদের বাসা থেকে বাচ্ছাগুলো সব রাস্তার মাঝে চল্কে পড়ে কিচমিচ করে ছুটছে।”

কুঁকড়ো বলে উঠলেন, “পাঠশালার পোড়োরা চলল”, বলে কুঁকড়ো সোজা হয়ে বসলেন। সোনালি আবার বললে, “পাঁপড়ের মতো ককরা সাদা হাত-পা-ওয়ালা কাদের সব ধরে ধরে আছাড় দিচ্ছে, খুব দূরে একটা জলের ধারে পষ্ট দেখা যাচ্ছে না।”

কুঁকড়ো বললেন, “কাপড় কাচা হচ্ছে। আর দেখছি”—সোনালিয়া বললে, “এ কী, কালো কালো ফড়িংগুলো সব ইম্পাতের মতো চকচকে ডানা ঘষছে।” কুঁকড়ো দাঁড়িয়ে উঠে বললেন, “ওহো, কাস্তেতে যখন শান পড়ছে তখন ধান কাটার দিন এল বলে।” তার পর পাহাড়তলির থেকে এদিক থেকে ওদিক থেকে চারি দিক থেকে কত কিসের সাড়া আসতে লাগল। ঘন্টার ঢং ঢং, হাতুড়ির ঠং ঠং, কুড়ুলের খট খট, জলের ছপ ছপ, সেকরার টুকটাক, কামারের এক ঘা, হাসি বাঁশি-বাজনা সব শুনতে লাগলেন কুঁকড়ো। কাজ-কর্ম চলেছে, কেউ কি আর ঘুমিয়ে নেই বসে নেই সত্যিই দিন এসেছে, কুঁকড়ো যেন স্বপন দেখার মতো চারি দিকে চেয়ে বললেন, “সোনালি, দিন কি সত্যিই আনলেন, এই-সব কারণে একি আমার ছিষ্ট। দিন আমি যে আনলুম মনে করেছি আমি যে ভাবছি আকাশে আলো আমিই দিচ্ছি একি সত্যি, না এ-সব পাহাড়তলি পাগলা কুঁকড়োর খ্যাপামি আর খেয়াল? সোনালি, একটি কথা বলব, কিন্তু বলো সে কথা প্রকাশ করবে না, আমার

শক্র হাসাবে না? সোনালি, তুমি আমাকে যাই ভাব-না কেন, আমি জানি এই স্বর্গে মর্তে আলো দেবার ভার নেবার উপযুক্ত পাত্র আমি নই, এত পাখি থাকতে অতি তুচ্ছ সামান্য পাখি আমার উপর অঙ্ককারকে দূর করবার ভার পড়ল? কত ছোটো, কত ছোটো আমি, আর এই জগৎজোড়া সকালের আলো সে কী আশ্চর্যরকম বড়ো, কী অপার তার বিস্তার। প্রতিদিন সকালে আলো বিলিয়ে যখন দাঁড়াই তখন মনে হয়, একেবারে ফকির হয়ে গেছি। আমি যে আবার কোনোদিন এতটুকুও আলো দিতে পারব তার আশাটুকুও থাকে না। সোনালি শুনলে যেন কুঁকড়োর কথা চোখের জলে ভিজে ভিজে, সে তাঁর খুব কাছে গিয়ে বললে, “মরি মরি।” কুঁকড়ো সোনালির মুখ চেয়ে বললেন, “আঃ সোনাল, যে আশা-নিরাশার মধ্যে আমার বুক নিয়ত ছলছে তার যে কী জ্বালা কেমন করে বলি। গান গাইতে হবে, আলোও জ্বালাতে হবে, কিন্তু কাল যখন আবার এইখানে দাঁড়িয়ে দশ আঙুলে আশার রাগিণী খুঁজে খুঁজে কেবলই মাটির বুকের তারে তারে টান দিতে থাকব, তখন হারানো স্মরণ কি আবার ফিরে পাব, না দেখব, গান নেই গলা নেই আলো নেই তুমি নেই আমি নেই কিছু নেই? হারাই কি পাই, এরি বেদনা মোচড় দিচ্ছে বুকের শিরে শিরে সোনালি। এই যে দো-টানায় মন আমার ছলছে এর যন্ত্রণা কে বুঝবে। রাজহাঁস যখন রসাতলের দিকে গলাটি ডুবিয়ে দেয়, সে নিশ্চয় জানে, পদ্মের নাল তার জগ্বে ঠিক করা রয়েছে জলের নীচে, বাজপাখি যখন মেঘের উপর থেকে আপনাকে ছুঁড়ে ফেলে মাটির দিকে তখন সেও জানে ঠিক গিয়ে সে যেটা চায় সেই শিকারের উপরেই পড়বে, আর সোনালি তুমিও জান বনের মধ্যে উই পোকা আর পিঁপড়ের বাসার সন্ধান পেতে তোমায় এতটুকুও ভাবতে হয় না, কিন্তু আমার এ কী বিষম ডাক দেওয়া কাজ। কাল যে কী হবে সেই হুঃস্বপ্নই বয়ে বেড়াচ্ছি, আজকের ডাক আজকের সাড়া কাল আবার দেবে কি না প্রাণ, গান গাব কি না ফিরে আর-একবার, তাই ভাবছি সোনালিয়া।”

সোনালি কুঁকড়োকে আপনার ডানার মধ্যে জড়িয়ে ধরে বললে, “নিশ্চয়ই কাল তুমি গান ফিরে পাবে গলা ফিরে পাবে, আলোর স্মরণ মাটির ভালোবাসা আবার সাড়া দেবে তোমার বুকের মধ্যে।”

কুঁকড়ো সোনালিকে বললেন, “কী আশার আলোই জ্বালালে সোনালি, বলো, বলো, আরো বলো—।”

সোনালি চুপি চুপি বললে, “আহা মরি, কী সুন্দর তুমি।” “ও কথা থাক্ সোনালি।” “কী চমৎকারই গাইলে তুমি।” কুঁকড়ো বললেন, “গান ভালো মন্দ যেমনি গাই আমি যে আনতে পেরেছি...।” সোনালি ব্যস্ত হয়ে বলে উঠল, “ঠিক, ঠিক, আমি তোমায় যতই দেখছি ততই অবাক হচ্ছি।” “না সোনালি, আমার কথার উত্তর দাও, বলো, সত্যি কি—।” সোনালি আস্তে বললে, “কী?” কুঁকড়ো বললেন, “বলো, সত্যি কি আমি”, সোনালি এবার তাড়াতাড়ি উত্তর দিলে, “পাহাড়তলির কুঁকড়ো তুমি সত্যি আলো দিয়ে সূর্যকে ওঠালে আজ, এ আমি স্বচক্ষে দেখেছি।”

“ভ্যালারে ওস্তাদ” বলেই তাল-চড়াইটা হঠাৎ উপস্থিত। কুঁকড়ো চমকে উঠে দেখলেন চড়াইটা তাঁর মুখের দিকে চেয়ে ভুরু তুলে শিস দিচ্ছে আর নমস্কার করছে। কুঁকড়ো ভাবছেন এ হরবোলাটা সব শুনেছে নাকি। ইতিমধ্যে সোনালিয়া আস্তে আস্তে অগ্নি দিকে চলেছে দেখে তিনি ডাকলেন, “আমাদের একলা ফেলে কোথায় যাও সোনালি।” চড়াই যতই হাসুক কুঁকড়োর আজ কিছুই গায়ে লাগবে না, সোনালিকে কাছে পেয়ে তাঁর আনন্দ ধরছে না।

চড়াই বললে, “বাহবা তারিফ। যা দেখলেম শুনলেম—।”

কুঁকড়ো বললেন, “চটকরাজ, তুমি যে মাটি ফুঁড়ে উপস্থিত হলে দেখছি।”

চড়াই কুঁকড়োকে সেই পুরানো ময়লা খালি ফুলের টবটা দেখিয়ে বললে, “আমি ওইটের ভিতরে বসে একটা কান-কুটুরে পোকা কুট কুট করে খাচ্ছি এমন সময় আঃ, কী যে দেখলেম, কী যে শুনলেম তা কী বলি।”

কুঁকড়ো বললেন, “তার পর।” চড়াই অমনি বলে উঠলে, “তার পর যদি বলি ওই মাটির টবটা দিব্যি শুনতে পায় তবে কি তুমি অবাক হবে নাকি।”

কুঁকড়ো বললেন, “গামলা থেকে লুকিয়ে শোনা বিড়োও তোমার আছে দেখছি।” চড়াই জবাব দিলে, “শুধু শোনা নয় লুকিয়ে দেখার লুকি-বিড়োও আমি জানি, আমি এমন অবাক হয়েছিলেম যে কখন যে গামলার তলার ফুটোটা দিয়ে উঁকি মেরে সব দেখেছি তা আমার

মনে নেই। আহা, কী দেখলেম রে, কী দেখলেম রে, কী সুন্দর কী সুন্দর।”

কুঁকড়ো তাকে এক ধমক দিয়ে বললে, “বটে, লুকিয়ে দেখা ! তফাত যাও।” কুঁকড়ো যত বলেন, “তফাত তফাত”, চড়াই ততই লেজ নাচিয়ে বেড়ায় আর ঘাড় নেড়ে কুঁকড়োর নকল করে কিচ কিচ করে, “বিড়ে ফাঁস লুকি-বিড়ে হল ফাঁস ফুস-মস্তুর হল ফাঁস ক্যাবাৎ কাবাৎ। কুঁকড়ো তার রকম দেখে হেসে ফেললেন। সোনালিয়া বললে, “চড়াই যখন সত্যিই তোমায় ভক্তি করে তখন ওর সাত খুন মাপ।”

চড়াই বললে, “ভক্তি করব না ? এমন আলেয়া বাজিগর বুজরুগ কেউ কি দেখেছে, কী সকালের রঙটাই ফলালে কী গানটাই গাইলে গা যেন তুবাড়ি বাজি ভুস।”

সোনালি বললে, “এখন তোমরা দুই বন্ধুতে আলাপ-সালাপ করো, আমি চললুম।”

কুঁকড়ো বললে, “কো-ক্-কো-ক্ কোথায় ?”

সোনালি বললে, “ওই যে সেই—।”

চড়াই অমনি বলে উঠল, “তাই তো, কুঁকড়োর গানের শুনে চিনে-মুরগির ছোটো হাজিরিও জমতে চলল, সাথে বলি কুঁকড়োর গান গাওয়া, চিনে-মুরগির চা খাওয়া, একসঙ্গে আসা যাওয়া।”

কুঁকড়ো সোনালিকে চুপি চুপি শুধলেন, সে একা যাবে, না তিনিও সঙ্গে যাবেন ?

সোনালি বললে, না ওরকম মজলিসে তাঁর যাওয়াটা ভালো দেখায় না। কুঁকড়ো সোনালিকে বললেন, “তবে তুমি যাচ্ছ যে।”

সোনালি বললে, “আমি যাচ্ছি আজ তোমার আলোর বকমকানিটা কেমন তাই সেই-সব হিংসুক পাখিকে দেখিয়ে আসব”, ব’লে সোনালি একবার গা ঝাড়া দিলে তার সোনার পালক-গুলো থেকে যেন আলো ঠিকরে পড়তে লাগল। সোনালি কুঁকড়োকে সেইখানে তার জন্তে থাকতে ব’লে চিনে-মুরগির মজলিসে চলল। চড়াই অমনি তাড়াতাড়ি বলে উঠল, “হাঁ, কুঁকড়োর আজ সেখানে না গেলেই ভালো।”

কুঁকড়ো শোখালেন, “কেন।”

“সে তোমার শুনে কাজ নেই” ব’লে চড়াই মিটমিট করে চাইতে লাগল সোনালির দিকে।

সোনালি হেসে বললে, “না, চড়াইকেও যে তুমি পাগলা করলে” বলে সোনালী পাখি সোনালী ডানা মেলে উড়ে গেল। কুঁকড়ো চড়াইয়ের দিকে চেয়ে ভাবছেন, জিন্মা একে দেখতে পারে না, কিন্তু চড়াইটা নেহাত মন্দ নয়, একটু বক্তার বটে, কিন্তু বদমাশ তো নয়।

চড়াই এবার লেজ নেড়ে বললে, “বলিহারি তোমার বুদ্ধিকে, সব মুরগিগুলোকে বিশ্বাস করিয়েছে যে তুমিই সূর্যোদয় করে থাক, মেয়েদের চোখে ধুলো দিতে তোমার মতো ছুটি নেই, এতদিনে বুঝলেম মুরগিরা কেন তোমার অত প্রশংসা করে। হয় কলঙ্কস যে ডিমটি নিয়ে রাজাকে ডিমের বাজি দেখিয়েছিলেন সেই ডিমটি থেকে তুমি বেরিয়েছ, নয়তো সিন্ধুবাদ যে আজগুবি সামোরগের ডিমের গল্প লিখে গেছে, তারি তুমি বাচ্ছা, এ না হলে তুমি আলোর আবিষ্কর্তা হতে না আর মুরগিদের এমন আজগুবি কথা শুনিতেও ভোলাতে পারতে না। অণু পরমাণুদের জন্মে আলোর দোলনা, খড়ের চালে সোনার পৌঁচ, এ-সব খেয়াল কি যে-সে মাথা থেকে বার হয়, না আপনাকে অতি দীন অতি হীন ব’লে চালিয়ে যেমনি দিন এল ব’লে অমনি আলোর ফুল ব’লে চৈঁচিয়ে উঠে ঝোপ বুঝে কোপ মেরে যাওয়া যার-তার কর্ম।”

রাগে কুঁকড়োর দম বন্ধ হবার জোগাড় হচ্ছিল, তিনি অতি কষ্টে বললেন, “খামো, চুপ।”

চড়াই ছু-পা পিছিয়ে গিয়ে বললে, “আচ্ছা, সত্যি কি তুমি জান না যে দিন-রাত যে আসে সেটা একটা প্রকৃতির নিয়ম ছাড়া আর কিছু নয়?”

কুঁকড়ো বললে, “তুমি জানতে পার আমি জানি নে। আর যাই নিয়ে ঠাট্টা কর, করো, এ কথা নিয়ে আর কোনোদিন তামাশা করো না যদি আমার উপর তোমার একটুও মায়া থাকে।”

চড়াই মুখে বললে, খুব মায়া খুব শ্রদ্ধা সে কুঁকড়োকে করে কিন্তু তবু খোঁচা দিয়ে ঠেস দিয়ে কথা সে বলতে ছাড়ছে না, তর্কও করতে চায়।

কুঁকড়ো রেগে বললেন, “কিন্তু যখন আমি ডাক দিতেই সূর্য উঠল আলো হল, সে আলো পাহাড়ে পাহাড়ে ছড়িয়ে গেল, আকাশে নানা রঙ ধরলে তখনো কি একবার তোমার মনে হয় না যে এ-সব কাণ্ড করলে কে।”

চড়াই বললে, “গামলায় গর্তটা এমন ছোটো যে সেখান থেকে আমি কেবল একটুখানি মাটি আর তোমার ওই হলুদবরন চরণ-ছুখানি দেখেছিলেম, আকাশটা কোথায়, তা খবরেও আসে নি।”

কুঁকড়ো বললেন, “তোমার জন্ম আমার ছুঃধু হয়, আলোর মর্ম বুঝলে না, তুমি যে তিমিরে সেই তিমিরেই থাকো অত্যন্ত চালাক পাখি।”

চড়াই জবাব দিলে, “বেশ কথা, অতি বিখ্যাত কুঁকড়ো।”

কুঁকড়ো বললেন, “বেশ কথা, যে থাকবার থাক্, আমি যেমন চলছি সূর্যের দিকে মুখ রেখে তেমনিই চলি দিনরাত এই পাখি-জন্ম সার্থক ক’রে নিয়ে। চড়াই জান, বেঁচে সুখ কেন তা জান ?”

চড়াই ভয় পেয়ে বললে, “তব্বকথা এসে পড়ল শুনেই মনে হয় পিপড়ের পালক ওঠে মরিবার তরে”, ব’লে চড়াই নিজের পালক খুঁটতে লাগল। কিন্তু কুঁকড়ো বলে চললেন, “কিছুর জন্মে যদি চেষ্টা না করব তবে বেঁচেই থাকা বৃথা, বড়ো হবার চেষ্টাই হচ্ছে জীবনের মূল কথা, তুই চড়াই সবার সব চেষ্টাকে উড়িয়ে দিতে চাস, সেইজন্মে তোকে আমি ঘৃণা করি, এই যে এতটুকু গোলাপী পোকাটি একা মস্ত ওই গাছের গুঁড়িটাকে রূপোর জাল দিয়ে গিপিট করতে চাচ্ছে, ওকে আমি বাস্তবিকই শ্রদ্ধা করি।” “আর আমি ওকে টুপ ক’রে গালে ভরি” বলেই চড়াই পোকাটিকে ভক্ষণ করলেন। “তোর কি দয়া-মায়া নেই রে ? যাঃ, তোর মুখ দেখব না” ব’লে কুঁকড়ো চললেন। চড়াই বললে, “দয়া-মায়া নেই কিন্তু ঘটে আমার বুদ্ধি আছে, যা হোক আমি আর তোমার কিছুতে নেই তোমার শত্রুরা যা-ইচ্ছে করুক বাপু, আমার সে কথায় কাজ কী, তুমি জান আর তারা জানে।”

কুঁকড়ো শোধালেন, “শত্রু কারা শুনি ?”

“কেন, পৈঁচার।” চড়াইটা বলে উঠল।

“শেষ এও ভাগ্যে ছিল, পৈঁচা হলেন শত্রু আমার, হাঃ হাঃ হাঃ” ব’লে কুঁকড়ো হেসে উঠলেন।

চড়াই বললে, “আলোর কাছে তারা এগোতে পারে না বটে, সেইজন্মে তারা এক বাজুখাঁই গুণ্ডা জোঁগাড় করেছে, যে পাখি রোজই দিন গুনছে তাকে জবাই করতে।”

“কাকে তারা জোগাড় করেছে” কুকড়ো শোধালেন।

চড়াই বললে, “তোমারই জাতভাই হায়দ্রাবাদি মোরগ, আঃ, সে যে কুস্তিগীর ভীম বললেই চলে, সে তোমার আসা-পথ চেয়ে সেখানে আছে।” কুকড়ো শোধালেন, “কোথায়।” “ওই চিনে-মুরগির ওখানে” চড়াই বললে। কুকড়ো শোধালেন, “তুমি তাকে দেখতে যাচ্ছ নাকি।” “না বাবা, যে তার পায়ে লোহার কাঁটা বাঁধা কী জানি যদি লেগে যায় তবে” ব’লে চড়াইটা আড়চোখে কুকড়ো কী করেন দেখতে লাগল। কুকড়ো চট করে কুলতলার দিকে ঘুরে দাঁড়ালেন। চড়াই যেন কত ভয় পেয়ে বললে, “যাচ্ছ কোথায়।” “কুলের কাঁটা যেখানে অনেক সেই কুলতলাতে যাচ্ছি” ব’লে কুকড়ো ঘাড় উঁচু করে পায়ে পায়ে চললেন। চড়াই যেন কুকড়োকে কিছুতেই যেতে দেবে না এমনি ভঙ্গি করে বললে, “না তোমার যাওয়া সেখানে মোটেই উচিত হবে না, আমি বলছি যেয়ো না।” “যাওয়া চাই” ব’লে কুকড়ো গম্ভীর মুখে পুরোনো ফুলের খালি টবটা দেখে বললেন, “এই ছোটো গামলাটির মধ্যে তুমি সৈঁধোলে কেমন করে।” “কেন এমনি করে” বলেই চড়াই লাফিয়ে সেটার মধ্যে গিয়ে বললে, “কেন এই এমনি করে সৈঁধিয়ে এই ফুটো দিয়ে আমি দেখলুম”, “কী দেখলে?” “কেন মাটি”, “আর, এইবার আকাশ দেখে নাও।” ব’লেই কুকড়ো উনার এক ঝাপটে টবটা উলটে চড়াইকে চাপা দিয়ে সোজা চলে গেলেন। চড়াইটা গামলার মধ্যে থেকে বেরোবার জন্তে ঝটাপটি করতে থাকল “গেছি গেছি” ব’লে।

৬

চিনি-দিদি ব্যস্ত হয়ে চারি দিকে ঘুরছেন— খাতির যত্ন করে ; আর তাঁর ছেলেটিও মায়ের সঙ্গে ঘুরঘুর করছেন আর মাঝে মাঝে মায়ের হু-একটা ইংরিজি উচ্চারণের আর আদব-কায়দার ভুল হলেই চমকে তাঁকে কানে কানে ধমকাচ্ছেন। ছেলেটি বিলেতে ভাসাতত্ব পড়তে গিয়েছিলেন কিন্তু সাতার মোটেই না জানায় তিন-তিনবার প্লাক্ট হয়ে এসেছেন।

সোনালী-আঁচল উড়িয়ে বনমুরগি সোনালি যখন হেঁসেলবাড়ির খিড়কির কাছটায় পৌঁছল, তখন রাজ্যের পাখি সেখানে জুটে কিচমিচ লাগিয়েছে ; চিনি-দিদির মজলিসটা খুঁজে নিতে সোনালির আর একটুও কষ্ট পেতে হল না ।

সোনালিয়াকে দেখেই চিনি-দিদি খাতির ক'রে কুলতলায় ফাঁকায় নিয়ে বসিয়ে ওদিকে চলে গেলেন । সোনালি শুনতে লাগল বোলতার! সব ফলস্তু গাছকে ঘিরে ঘিরে মোচং বাজিয়ে গাইছে, সোনা-ফলের গান, হল রাগে ।

### গান

মন ভুলে গুঞ্জরি— মুঞ্জরি মুঞ্জরি ।  
 বাতাসে গুঞ্জরি, আকাশে মুঞ্জরি ।  
 ফুলে বউল গোছা গোছা,  
 ফলে মউল গাছে গাছে,  
 আমরা বলি গুঞ্জরিয়া—  
 শেষ সবারই আছে আছে ।  
 সবজে পাতার কলি, সোনালী ফুলের মধু  
 বঁধু ওগো বঁধু—  
 ফুলের মঞ্জরি ! আমরা গুঞ্জরি ।  
 ফুল ঝরে, ফল ঝরে, কুঁড়ি ঝরে, কলি ঝরে,  
 মন ঝরে গুঞ্জরি— মঞ্জরি মঞ্জরি ।

শুধু যে বোলতারাই গাইছিল তা নয়; ভোমরা, মৌমাছি, গঙ্গাফড়িং সবাই দলে দলে বাজি আর গান জুড়ে দিলে । চিনি-দিদি গড়ের মাঠের বাজি যত দল, তা ছাড়া কালোয়াতি কীর্তন বাউল সব রকম জোগাড়ই করেছিলেন । কেবল চুনোগলির ব্যাঙটা তিনি জোগাড় করতে পারেন নি । আর সেইজন্তে তিনি সবার কাছে বার-বার দুঃখু জানাতে লাগলেন । কালো-



কোট সাদা-কামিজ ফিটফিট কাক দরজায় দাঁড়িয়ে মোড়লি ক'রে এর-ওর-তার আলাপ-পরিচয় ক'রে বেড়াচ্ছেন— ইনি রাজহংস, ইনি হংসেশ্বরী, তুরস্কের পেরু, ও-পাড়ার চটসাই চড়াইমশায় ইনি আমাদের। সোনালি চড়াইকে ধুলোমাখা, কেমন হতভাগা-গোছের চেহারায় আসছে দেখে শুধলেন, “কোনো অসুখ হয় নি তো!” চড়াই সোনালিকে ফুলের টবের ইতিহাস বলতে সোনালি হেসেই অস্থির। সোনালি আর চড়ায়ে কথা হচ্ছে, এমন সময় আরো পাখি আসতে লাগল। ভিড় দেখে সোনালি চড়াইকে নিয়ে একটা জলের বোমার আড়ালে সরে দাঁড়ালেন। সেই সময় জিম্মা কাছেই একটা ভাঙা ঠেলাগাড়িতে লাফিয়ে বসল, সোনালি তাকে দেখে একবার ঘাড় হেলিয়ে নমস্কার করলেন, দূর থেকেই।

জিম্মার চেহারাটা কেমন রাগি-রাগি বোধ হল। ঘোঁটের খবর যেমন শোনা অমনি সে কুকড়োকে বিপদ থেকে বাঁচাতে শিকলিটা ছিঁড়ে টানতে টানতে এসে উপস্থিত কুলতলায়। চড়াইকে বোমার পিছনে দেখে জিম্মা রাগে গৌঁ-গৌঁ করতে লাগল। ভয় পেয়ে চড়ায়ের লেজ কাঁপতে লেগেছে, এমন সময় ফড়িংদের স্ত্রিংব্যাণ্ড শুরু হল, সেইসঙ্গে গঙ্গা-মুক্তিকার অলকা-তিলকা দিয়ে ছাপমারা গঙ্গাফড়িং কীর্তন ধরলেন— তুড়ি রাগিণীতে খোল বাজিয়ে সূর্যের রূপবর্ণনা।—

কনক বরন, কিয়ে দরশন  
নিছনি দিয়ে যে তার।  
কপালে ললিত চাঁদ শোভিত  
সিন্দুর অরুণ আর  
আহা কিবা সে মধুর রূপ।

হু-একজন বিলেত-ফেরত মোরগ, খোল শুনে দশা পেলেন।

তার পর মৌমাছি গাইতে লাগল দলে দলে ‘মধুর’ গান—

আলোতে চলি সবাই গুনগুনিয়ে,  
আলোতে ফুল ফুটেছে তাই গুনিয়ে,  
গুন-গুনিয়ে।

বাহিরে সোনার আলো,  
ভিতরে সোনার রেণু,  
বাহিরে বাজল বীণা,  
ভিতরে বাজল বেণু,  
সকালের আলো আলো গুন-গুনিয়ে ।

ফুলের সুবাস, সোনার রেণু, পদ্মের মধু রোদ-বাতাস সব যেন একসঙ্গে এসে উপস্থিত হল। মধুকরের দল চারি দিকে সুরের মধু-বিষ্টি করে দিলে। বাহবা বাহবা পড়ে গেল। চিনি-দিদি কিন্তু গানও বুঝছেন না, সুরও শুনছেন না। তিনি কেবল কারা কারা তাঁর পাঁটিতে এসেছে তারি হিসেব সবাইকে দিচ্ছেন, “বোঝা থেকে শাকের আঁটিটি পর্যন্ত কেউ আর আসতে বাকি নেই, দেখেছ ভাই?” একটা শ্যামা পাখি পেয়ারা গাছে বসে শিস্ দিলে, অমনি চিনি-দিদি বললেন, “ওই শ্যামদাসী এলেন। ওই বুঝি কাছিমুদ্দি? না না কাছিম বুড়ো তো নয়। এ তবে কে। সবাইকে তো চিনি নে ভাই, তেনার সব পুরোনো বন্ধু।” একটা ভীমরুল বোঁ-বোঁ করে চারি দিকে ঘুরে বেড়াতে লাগল, চিনি-দিদি তার পিছনে “ভালো আছ? ভালো আছ?” বলতে বলতে ছুটলেন।

চড়াই সোনালিকে বললে, “চিনি-দিদি একেবারে খেপে গেছেন।” সোনালি মজা দেখবার জন্তে আড়াল থেকে বেরিয়ে দাঁড়ালেন। চিনি-দিদি ভীমরুলের সঙ্গে খানিক ছুটে একটা গাছের তলায় দাঁড়িয়ে একটু কপি পাতা খাচ্ছেন এমন সময় হাওয়াতে টুপ টাপ করে পাতার শিশিরের সঙ্গে একটি শিউলি ফুল ঝরে পড়ল। চিনি-দিদি অমনি বলে উঠলেন, “অ শিউলি, অ শিশির, এতক্ষণে বুঝি আসতে হয়?” এই সময় একটু হাওয়া উঠল আর টুপ করে একটি কুল চিনি-দিদির ঠিক নাকের উপরে পড়ে গেল, চিনি-দিদি চমকে উঠে বললেন, “এই যে বাতাসি-দিদিও এসেছ। তবু ভালো যে মনে পড়েছে।” বলে কতকগুলো গিনিপিগ নিয়ে চিনি-দিদি খাওয়াতে চললেন। “কে যে চিনি-দিদির চেনা নয়, তা জানি নে।” বলে চড়াই এদিক-ওদিক ভালো করে দেখে পা টিপে টিপে বেরাল যেখানে আতা গাছের ডালে গুঁড়ি মেরে বসে এদিক-ওদিক দেখছিল, সেইখানে গিয়ে বললে, “সব ঠিক তো বন্দোবস্ত?” বেরাল

একবার ওই ওদিকটায় ঘাড় তুলে দেখে বললে, “সব ঠিক। আসছে তারা।” এদিকে চিনি-দিদি সোনালিকে নতুন বিলিতি কলে-দিয়ে-ফোটোনো ছুটি মুরগির ছানার সঙ্গে পরিচয় করিয়ে দিচ্ছে, এমন সময় দূরে ময়ূর গলা-খাঁকানি দিলেন, “কেও, চিনি নাকি।” ময়ূর এসে বুক ফুলিয়ে দাঁড়ালেন; মুরগি, হাঁস, তিতির, বটের সব অমনি তাঁকে ঘিরে যেন রথ দেখবার ভিড় করলে। ময়ূর সবাইকে জঁকালো পোশাক আর হীরে জ্বরতের ভাউ বাংলাদেশে লাগলেন, খুব বুদ্ধিমানের মতো গম্ভীর মুখ ক’রে। জিম্মা কুস্তানি কিন্তু ময়ূরকে দেখে মনে-মনে বললে, ‘এটার মতো দেমাকে অদ্ভুত জানোয়ার আর ছুটি দেখা যায় না।’ এমন সময় কাক দরজা থেকে ফোকরালেন, “চাটগাঁই মোরগ।” চিনি-দিদি এ-নাম কখনো শোনেন নি; বুক-বা ভুল করেছে কাকটা ভেবে সেদিকে যাবেন, এমন সময় সত্যিই সাদা জোকা-খাকা, কালো চাপদাড়ি মোড়াসা-মাথায় চাটগাঁই এসে সেলাম করলেন। চিনি-দিদির মুখে আর কথা সরল না। তার পর কাক একে একে সব অদ্ভুত মোরগের নাম ফোকরাতে থাকল, “সিংগালি, বোগদাদি, জাপানি।” সবাই বলে উঠল, “একি ব্যাপার।” চিনি-দিদি বেড়ার কাঁক দিয়ে দেখলেন দলে দলে অদ্ভুত মোরগ সব আরো আসছে, “সেলেম সাহি, খাঁ খানানি, তখ্তে ভাউস, কান্দাহারি, কাবুলী, জবরদস্ত বোঁটনদার, চম্পাখাড়ি, কুলঝুটি, খুধেপোষ, ডেগচি, মোগলাই, জবড়জজ, ইয়াছদি, চাল বাহাহর, খেতাববক্স, মেজাজি, পরহুসা, মুলুকচাঁদি, বাজখাঁই, শির-ই-ফরহাদ, গোলগুহজ, কাবাবি।”

চিনি-দিদি দেখে শুনে অবাক, কেবল লেজ দোলাচ্ছেন আর বলছেন, “ওমা কোথায় যাব। ওলো দেখ, কী হবে গো, এমন তো কখনো দেখি নি।”

নবাবী আমলের মোরগ সব একে একে এলেন। এবার পাটনাই মোরগ সব আসছেন, “ভিলকখারী ভোজপুরি, রামছলালি।”

“ওমা কোথায় যাব।” বলে চিনি-দিদি সবাইকে খাতির করতে ছুটলেন।

এবার গৌড়িয়া মোরগ সব আসছেন, “গোবরগণেশ, চালপিটুলি, মোহনভোগ, বামুনমারি, কানাইচুড়ো, চোগোপলা, ঢেঁকুচকুচ, ঢাক-পিটুনে, ফিকুরে গোসাই, বেঁটেবকট, কয়লাখামা, রাজকুমড়ো, থুতি নাতি।”

কুলতলাটা ঝুঁটিতে, পালকে, চাপদাড়ি, গৌপ, টিকি আর পোষা-পালা বড়ো বড়ো খেতাব-জাইগীর-শিরপেঁচওয়াল। মোরগের ভিড়ে সরগরম হয়ে উঠল, যেন পালকের গদী। কারু লেজের পালক, মেপে সাতগজ। কারু গলায় যেন উলের গলাবন্ধ জড়ানো রয়েছে। একজনের ঝুঁটির কেতা যেন রামছাগলের শিং। কারু মাথায় জরির তাজ, কারু এক চোখে চশমা, অণ্ড চোখটা টুপিতে ঢাকা; কারু বুক ফুলের তোড়ার মতো খানিক পালক, কারু আঙুল দস্তানায় মোড়া, কারু-বা আঙুল এত লম্বা যে কিছুই ধরতে পারে না। কেউ ঝাঁকড়া চুলের উপরে আবার টিকি রেখেছে, আর কারু-বা মাথায় চুলও নেই, টিকিও নেই, কিছুই নেই। ঘাড়-গর্দানে-সমান এই শেষের মোরগটা হচ্ছে সেই নামজাদা লড়ায়ে মোরগ, যে বিলেত পর্যন্ত মেরে এসেছে। এরি ছপায়ে ইস্পাতের কাঁটা-মারা ভয়ংকর ছোটো কাতান মানুষ শখ করে বেঁধে দিয়েছে, অণ্ড মোরগকে লড়ায়ে খুন ক'রে বাজি জেতবার আর মজা দেখবার জগ্গে। ঘোড়দৌড়ের খেলায় যেমন, তেমনি এই মোরগের লড়াই দেখতে আর বাজি লাগাতে লোকে টিকিট পায় না, এত ভিড় হয়।

বেরাল চড়াইকে গাছের উপর থেকে এই মোরগটাকে দেখিয়ে বললে, “এই সেই বাজখাঁই গুণ্ডা বা লড়ায়ে মোরগ বা নবাব বাজেরখাঁর বাবুর্জিখানার শেষ-পোষা পাখি। পুরুষানুক্রমে এদের ঘাড় এমন শক্ত যে মোটেই নোয় না, ইনি খালি দিল্লীর লাড্ডু খেয়ে লড়েন।”

এইবার সব বিলেত-ফেরতা মোরগ এলেন, “মিস্টার চচ্চড়ি, মিঃ ভাজি, মিঃ ঘন্ট, মিঃ আবার খাব, মিঃ চাপাটি, মিঃ বে-হৌঁস।” চিনি-দিদি ভাবছেন এই-সব মোরগের মুরগিদের নিয়ে আসছে-বারে তিনি একটা পর্দাপাটি দেবেন। দাঁড়কাক তখনো হাঁপাতে হাঁপাতে ফুকরোচ্ছে, “রামধনুস, রঙবেরঙ, বুঁদেলা মল, রণছোড় ভাগি, খান ভগৎজিউ...” যত মাড়োয়ার দেশের মোরগ, সিন্দি কচ্ছি, অরোদা-বরোদা সবাই এলে পর দাঁড়কাক মুখ ফিরিয়ে দেখলে— কুঁকড়ো। সে তাঁর পদবী উপাধি ফুকরোতে যাবে, কুঁকড়ো বললেন, “কিছু দরকার নেই। শুধু জানিয়ে দাও আমি কুঁকড়ো এলেম।” দাঁড়কাক তাঁর আপাদমস্তক দেখে নিয়ে মুখটা বেঁকিয়ে জোরে হাঁক দিলে, “কুঁকড়ো-ও-ও।” কুঁকড়ো অতি শাস্ত ভালোমানুষটির মতো চিনি-দিদিকে নমস্কার করে বললেন, “আমাকে মাপ করতে হবে, আমার সাজসজ্জা পদবী উপাধি কিছুই নেই, আমার ঠিক যতগুলো আঙুল হওয়া উচিত তাই আছে, আর মাথার এই লাল একটিমাত্র টুপি, জন্মাবধি

এইটেই প'রে বেড়াচ্ছি, সে কথাটা লুকিয়ে লাভ নেই। আর আমার এই গায়ের কাপড়— এটা প'রে এখানে আসাটা বাস্তবিক অশ্রায় হয়েছে; দেখো-না রঙচঙ বেশি নেই, কেবল একটু কচিপাতার সবুজ আর পাকা ধানের সোনালী। মাফ করো, আমি নেহাতই একটা সাধারণ কুঁকড়ো যাকে দেখা যায় ধানের গোলায়, চালের মটকায়, গির্জার চুড়োয়, সোনায় মোড়া ছেলের হাতে টিনের বাঁশির আগায় রঙ-করা, জলেপুলে সর্বত্র। কেবল কোনো চিড়িয়াখানায় আর জাতঘরে আমার দেখা পাওয়া যাবে না।”

চিনি-দিদি বললেন, “তা হোক। তোমার কাজের সাজে এসেছ তাতে কী দোষ। তোমার সময় কোথা যে, সেজে বেড়াবে? কাজের পাখি তোমার সব দোষ মাপ। কিন্তু যারা বিয়েতে যায়, কেরানীর কিস্বা উকিল ব্যারিস্টার মোক্তারের সাজ প'রে, কিস্বা বুট হ্যাট প'রে যায় বউ-ভাতের ভোজে, তাদের আমি কিছূতে মাপ করি নে।”

দাঁড়কাক ফোকরাল, “জুড়ি লোটন পায়রা।” কুঁকড়ো ভাবলেন বুঝি তাঁর বন্ধু কবুদ আর কবুদনী। কিন্তু ফিরে দেখলেন সাদা ছুটি গুঞ্জরাটি, পায়রা কি— কী, বোঝবার জো নেই, ডিগবাজি খেতে খেতে ভিড়ের মধ্যে ঢুকে পড়ল। তার পর দাঁড়কাক ফুকরলে, “ব্রহ্মাণ্ড-ভাণ্ডার রাজহংস স্বামিজী।” কুঁকড়ো পদ্মবনের মরাল আসছেন ভেবে আনন্দে দরজার দিকে চেয়ে রইলেন, অনেকক্ষণ পরে পাখির মতো পাখি আসছে ভেবে; কিন্তু হেলতে তুলতে সাদা মরাল না এসে, নেংচাতে নেংচাতে এলেন এক পাখি, দেখতে মরালের মতো কতকটা, কিন্তু মোটেই সাদা নয়, সিধেও নয়, কালো বুল। কুঁকড়ো নিশ্চয় ছেড়ে বললেন, “মরাল না এসে এল কিনা মরালের একটা বিকট কালো ছায়া।” ব'লে কুঁকড়ো একটা দোলার উপরে দাঁড়িয়ে এদিক ওদিক দেখতে লাগলেন, দূরে সবুজ মাঠ, তারি উপরে খেঁচু চরছে, বাছুরগুলো ছুটোছুটি করছে; কোথায় আমলকী গাছের ছায়ায় বাঁশি বাজছে তারি শব্দ। পৃথিবীর সবই এখনো এই-সব হরেক রকম পোষা পাখিগুলোর মতো টেরে বঁকে অদ্ভুত রকম হয়ে ওঠে নি; সাদাসিঁদে গোলগাল যেমন ছিল তেমনটি আছে। ঘাসের রঙ সবুজই রয়েছে, আকাশ নীল, জল পরিষ্কার, পাখিরা উড়ছে ডানা ছড়িয়ে, গোরু হাঁটছে চার পায়ে, মানুষ চলেছে ছপায়ে। কুঁকড়ো আনন্দে এই-সব দেখছেন আর সোনালি আস্তে আস্তে তাঁর কাছে এসে দাঁড়িয়ে বলছে, “এই-সব

চিড়িয়াখানার উপযুক্ত অদ্বুত সঙগুলোকে আমার ভারি খারাপ লাগছে, আর একদণ্ড এখানে থাকা নয়, চলো আমরা ছুজনে সেই বনে চলে যাই ; সেখানে আলো আর ফুল আর তোমার আমার ভালোবাসা ।” কুঁকড়ো ঘাড় নেড়ে বললেন, “না সোনালি, সে হতে পারে না । বিধাতা যেখানে রেখেছেন সেইখানেই আমাকে থাকতে হবে । আমি জানি এই আবাদটুকুর মধ্যে করবার মতো কাজ আমাদের অনেক রয়েছে, আর, সবার ভালোবাসাও এখানে পাচ্ছি তো ।”

সোনালির মনে পড়ল রাত্রে ঘুঁটের কথা ; কিন্তু ওদের ভালোবাসা যে মোসলমানের মুরগি-পোষার মতো, সেটা ব’লে কুঁকড়োকে ছঃখ দেওয়া কেন । সে বার বার বলতে লাগল, “না না, চলো ছুজনে চলে যাই, আহা সেই বনে যেখানে বসন্ত-বাউরী কেবলি বলছে, ‘বউ কথা কও’ ; আর পাতায় পাতায় সোনার অক্ষরে ভালোবাসার গান সব লেখা হচ্ছে সকাল থেকে সন্ধ্যা ।”

এই সময় ওধারটায় কিচিরমিচির শব্দ উঠল, সব পাখিরা ময়ূরকে পাখম ছড়াবার জন্তে পেড়াপিড়ি করছে । চিড়িয়াখানার সব মোরগগুলো তাদের সম্পর্কে পাখমদাদা ময়ূরের চারি দিকে ঘিরে দাঁড়িয়েছে । অনেক বলা-কওয়াতে ময়ূর পাখম খুলে দেখালেন । পাতিহাঁস হাঁ করে চেয়ে রইল । ময়ূরের কাছে কোটের কাটকুট নমুনো ফ্যাশান চাইতে লেগে মোরগদের মধ্যে হট্টগোল বেধে গেল । সবাই ময়ূরকে আপনার আপনার সাজগোজ দেখিয়ে পাস হতে চাচ্ছে, এক মোরগ অন্তকে ঠেস দিয়ে বলছে, “তোমায় দেখতে হয়েছে ওই কাপড়ে, যেন সুড়ঙ্গ সুপুরি গাছটি ।” সে আবার তাকে এক ধাক্কা দিয়ে বলছে, “আর তোমারই সাজটা কী দেখতে হয়েছে ? যেন মগের মুল্লকের আটচালাখানি, শিং বের-করা ছুঁচোলো ।” সবাই যখন সাজসজ্জা দেখাতে মারামারি বাধিয়েছে তখন কুঁকড়ো গলা চাড়িয়ে বলে উঠল, “তাকাও, তাকাও, ওদিকে তাকাও ।” কুঁকড়োর কথামত সব মোরগ মায় ময়ূর হাঁস আর যত দেমাকে পোশাকী পাখি সবাই সেই কাপড়-ঝোলানো খড়ের কুশো-পুতুলটার দিকে চেয়ে দেখলে, হাওয়াতে সেই খড়ের কাঠামোর কামিজের হাতাটা লটপট ক’রে যেন তাদেরই দেখিয়ে কী বলতে যাচ্ছে । ভয়ে সব পোশাকী পুষ্টি পাখিদের মুখ চুন হয়ে গেল । কুঁকড়ো হেঁকে বললেন, “তাকাও, তাকাও, উনি তোমাদের আশীর্বাদ করছেন ।” মোরগগুলো কুঁকড়োর দিকেই চেয়ে রইল, তখন কুঁকড়ো বললেন, “ওই

যে কাঠামোটোর পায়ে পের্টালুন লটপট করছে, ওটা কী বলছে জানো? আমার এই হক-কাটা ছিট একদিন ফ্যাশান ছিল, উনোপঞ্চাশ টাকা গজ দরে আমি বিকিয়েছি, এক কালে। আর ওই যে ভাঙা তোবড়ানো সোলার টুপি ওটার মাথায় চড়ানো দেখছ, ওটাই-বা কী বলছে?— আমিও একদিন ফ্যাশান ছিলাম, আশি টাকা দিয়ে লোকে আমায় কিনেছিল, এখন মেথরও আমাকে মাথায় দিতে লজ্জা পায়। আর ওই দেখে কোট, তার এখনো ভুল ভাঙে নি, সে এখনো দেখে, চলতি বাতাসে উড়ে উড়ে আকাশে ফ্যাশান হাতড়ে বেড়াচ্ছে। চলতি বাতাস চলে গেল আর ওই দেখে ফ্যাশান-খরা নিষ্কর্মা কোটের হাতছটো নিরাশ হয়ে বুলে পড়ল।” এই কথা কুঁকড়ো যেমন বলেছেন আর সত্যি সত্যি বাতাস বন্ধ হল, সব পাখিরা দেখলে দুই হাতা মাটির দিকে ঝুলিয়ে কুশো-পুতুলটা স্থির হয়ে দাঁড়াল। তারা সব সেইদিকে অবাক হয়ে তাকিয়ে আছে এমন সময় ময়ূর বললে, “রাখো, ওটা কি কথা বলতে পারে যে এ-সব বলবে। তুমিও যেমন।”

কুঁকড়ো ময়ূরকে বললেন, “তুমি যা বললে ওটাকে, মানুষেরা ঠিক ওই কথাই তোমাকে বলছে ইস্ত-না-গা-দ।”

ময়ূর তার কাছের এক পাখিকে চুপি চুপি বললে যে, এই-সব জঁকালো জঁদরেল পোষা মোরগকে সোনালির সামনে হাজির করাতেই কুঁকড়োটা তার উপর খাপ্পা হয়েছে। তার পর ময়ূর কুঁকড়োকে বললে, “আচ্ছা, এই যে সব জঁদরেল মোরগ এসেছেন, এঁদের তুমি ঠাউরেছ কী শুনি?”

বুক ফুলিয়ে কুঁকড়ো উত্তর দিলেন, “দর্জির হাতে সেলাই করা, কলে কাটা, কাঁচি দিয়ে ছাঁটা নকল ছাড়া এরা আর কিছুই নয়। সবটাই এদের জোড়াতাড়া দেখছি, ওর ডানা তার ঝুঁটি, এমনি সব টুকটাকি দিয়ে গড়া এদের চেহারাগুলো কাঁসারিপাড়ার সঙের বিজ্ঞাপনে লাগতে পারে; আর-কোথাও এমন-কি, এই সামান্য গোলাবাড়িতেও, এদের দরকার মোটেই নেই। এদের চলন, বলন, গড়ন সবই বেশুরো, বেয়াড়া, বেখাপ্পা। ডিমের সুন্দর ডোঁলটি নিয়ে সব পাখিই বেরিয়ে আসে জগতে, কিন্তু ডিম ফাটিয়ে এরা যে বেরিয়েছে তার কোনো লক্ষণ তো এদের শরীরে দেখছি নে।”

কুঁকড়োর কথা শুনে একটা পোশাকী মোরগ রেগে বলে উঠল, “বাড়াবাড়ি কোরো না।” কুঁকড়ো সে কথায় কান না দিয়ে বলে চললেন, সূর্যের দিকে চেয়ে, “এরা কি সত্যিকার মোরগ। কখনোই নয়। কোথায় এদের মধ্যে সেই সকালের আলো, সেই রক্তের মতো রাঙা সূর। সূর্য তুমি সাক্ষী, এরা দেখতে হরেক রকমের বটে, কিন্তু মিথ্যে ছায়া-বাজি বৈ সত্যি নয় সত্যি নয়। আর ছায়াবাজিরই মতো এরা তামাশা দেখিয়ে কোথায় মেলাবে তার ঠিক নেই। এদের কেউ বেঁচে থাকবে না, হ-রে-ক-র-ক-ম-বা-জি-বা-হ-বা” ব’লে কুঁকড়ো একটু ধামলেন। ময়ূর শোখালে, “কাকে তুমি সত্যিকার মোরগ বল শুনি।”

“সত্যিকার মোরগ তাকেই বলি যার একমাত্র ধ্যান হল”, ব’লে কুঁকড়ো চুপ করলেন। সব পাখিই অমনি শুধোলে, “কী কী? ধ্যান হল কী?”

কুঁকড়ো বুক-ফুলিয়ে বললেন, “আলোর ফুলকি—ই-ই—।”

সব পোশাকী মোরগ অমনি বাজখাঁই গলায় বলে উঠল, “কা-লো-কু-ল-চু-র। হাঁ, হাঁ এই তো চোখ বুজলেই আমরা সরষে-ফুলের মতো গুঁড়ো গুঁড়ো কী যেন দেখতে পাচ্ছি। বাঃ এ তো সবাই ধ্যান করে, নতুনটা কী হল?” ব’লে মোরগগুলো কুঁকড়োকে প্রশ্ন করতে লাগল, তিনি ওড়বে না খাড়বে না নাদে গলা সাধেন? তিনি দক্ষিণী চালে গান করেন না হনুমানের মতে। কোন্ রাগে তার দখল বেশি।

কুঁকড়ো সংগীতশাস্ত্র, স্বরলিপি এ-সবের ধার দিয়েও যান নি; তিনি প্রশ্ন শুনে অবাক হলেন। কুঁকড়ো গাইবে কুঁকড়োর মতো, হনুমানের মতে কেন যে হনুমান ছাড়া আর কেউ গাইতে যাবে কুঁকড়ো তা বৃক্কে উঠতে পারলেন না। এক মোরগ বললে, “রোসো, তালটা ঠিক করে নেওয়া যাক, ‘কা-আ-আ-লো-ও-ও-ও’...নাঃ মিলল না তো, কাঁকের বেলায়ও সোম পড়ছে, সোমের বেলাতেও তাই, কাঁক মোটেই নেই।” কাঁকা আওয়াজের জন্তে কেন যে এ পাখিটা এত ব্যস্ত তা কুঁকড়ো বুঝলেন না। এক মোরগ মুখে মুখে স্বরলিপি করে যাচ্ছিল, সে বললে, “প্রথম লাগল মধ্যম আ-মা; তার পর লো, রি-র-গা-র-গা এই হল মা-রি-গা।”

আর-একজন বললে, “মা-রি-গা তো নয়, ধ-পা-স।”



কুঁকড়োর মনে হল, ঠিক সবাই পাগল হয়ে গেছে। এ-সব কী খেয়াল। তিনি সাফ জবাব দিলেন, তিনি কোনো গানের ইস্কুলে গান শেখেন নি, শান্তর-মান্তর তিনি জানেনও না মানেনও না, গোলাপ যেমন ফুল ফুটিয়ে চলেছে, তিনি তেমনি গান গেয়ে চলেছেন, এইটুকুই তিনি জানেন।

কুঁকড়ো শাস্ত্রের কিছুই জানেন না দেখে অস্থ মোরগগুলো তর্ক ছাড়লে। কিন্তু গোলাপের শোভা কি কুঁড়িতে কি ফোটা অবস্থায় ময়ূরটার অসস্থ ছিল, দেখলেই সে ঠোকর দিতে ছাড়ত না; কুঁকড়ো গোলাপের নাম করতেই ময়ূরটা অমনি বলে উঠল, “গোলাপ আবার একটা ফুলের মধ্যে নাকি?”

কুঁকড়ো গোলাপের নিন্দে শুনে রেগেই লাগল; তিনি সব মোরগকে শুনিয়ে বললেন, “কুঁকড়ো কিম্বা মোরগ হয়ে গোলাপের নিন্দে যে সয় সে নরাত্ম কুলাঙ্গার...।”

“হে: তে-রি-গো-লা-প!” ব’লে বাজর্খাই মোরগ তাল-ঠুকে উপস্থিত, “আওতো, কুঁকড়ো দেখে” ব’লে।

“আও।” ব’লেই কুঁকড়ো বুক-ফুলিয়ে এগিয়ে এসে বললেন, “তোকেই খুঁজছিলেম বুটিকাটা কাকাতুয়া।”

বাজর্খাই কেওমে’ও করে বলে উঠল, “ক্যা বোলা? এ কেসা বাত ছয়া?—কা-কা-তু-য়া-তুয়া কাকা।”

কুঁকড়ো ঠিক তেমনি সুরে বলে উঠলেন, “ক্যা বোলা কা-কা-তুয়া।”

খানিক হুজনে চোখ পাকিয়ে পালক ফুলিয়ে এ-ওর দিকে চাওয়াচায়ি হল। তার পর বাজর্খাই বললে, “তুমসে কুস্তিগীর পাহালোয়ান জাহানদার জবরদস্ত দশ জোয়ানকো সাথ বেলায়েৎমে ময় লড়া হ’, আউর জিতা হ’, দো দশকো ঘয়েল ভি কিয়া।”

কুঁকড়োর কাজ খুন নয়— ভয় যারা পায় তাদের অভয় আর আলো দেওয়া। তিনি কিন্তু তাই ব’লে কাপুরুষ ভীরু ছিলেন না, এগিয়ে এসে বললেন, “তবে লড়ায়ের আগে একবার আলাপ-পরিচয়টা হয়ে যাক।”

বাজর্খাই চৈঁচিয়ে বললে, “মেরা নাম কতে-জঙ্গ তাগবাহাত্তর মালিকিময়দান।”

কুঁকড়ো হেসে বললেন, “আর আমার নাম কুঁকড়ো।”

লড়াই বাধে দেখে সোনালি ভয় পেয়ে জিম্মার কাছে ছুটে গেল। কুঁকড়ো বললেন, “জিম্মা, খবরদার, তুমি এতে কোনো কথা বলতে পাবে না, তুমি নড়তে পাবে না, যেখানে আছ সেখান থেকেই শেষ পর্যন্ত দেখো।”

সোনালি বললে, “একটা গোলাপ ফুলের জন্তে প্রাণ দিতে যাবে?”

কুঁকড়ো গম্ভীর স্বরে বললেন, “ফুলের অপমানে সূর্যের অপমান, তা জান?”

সোনালি চড়াইয়ের কাছে ছুটে গিয়ে বললে, “তুমি যে বলেছিলে সব মিটিয়ে নেবে?”

চড়াই গম্ভীর হয়ে উত্তর করলে, “সব মেটে কিন্তু জ্ঞাতির ঝগড়া মেটে না গো মেটে না।”

চিনি-দিদি বুক চাপড়াতে লেগেছেন আর বলছেন, “এ কী গো। লোকের বাড়ি নেমস্তম্লে এসে খুনোখুনি।” এই বলছেন আর কুঁকড়োর লড়াই দেখবার জন্তে সবাইকে বসাত্তে—ফুলের টবে, লাউকুমড়োর মাচায়। দেখতে দেখতে সব পাখি ছুই পালোয়ানকে ঘিরে বসে গেল কুস্তি দেখতে। সবপ্রথমে মুরগিরা গোল হয়ে বসেছে, ছানাপোনা কোলে, তার পর হাঁস ইত্যাদি, শেষে যত পোশাকী মোরগ, ময়ূর এঁরা।

জিম্মা কুঁকড়োকে ডেকে বললে, “জেতা চাই, পাহাড়তলির নাম রেখো।”

কুঁকড়ো একবার চারি দিক চেয়ে দেখলেন, সবাই আজ তাঁকে যেন মরতে দেখতে ঘাড়গুলো বাড়িয়ে বসে আছে মনে হল। কোথাও একটু ভালোবাসা নেই—হিংসে আর খুনের নেশায় সবার মুখ বিকট দেখাচ্ছে। কুঁকড়ো একটি নিখেস ফেললেন।

সোনালি চোখের জল মুছে বললে, “আহা, কাছাবাচ্ছাগুলির কী হবে গো।”

কিন্তু কুঁকড়োর প্রাণে কোনো ছঃখু নেই, তিনি বুঝলেন যে, তাঁকে মরতেই হবে। তবে মরবার পূর্বে কেন না তিনি সবার কাছে প্রচার করবেন, যা এতদিন কাউকে বলা হয় নি। এই তো ঠিক সময়। তবে আর কেন গোপন রাখা তাঁর মহামন্ত্র। কুঁকড়ো সবাইকে বললেন, “শোনো তোমরা আমার গোপন কথা, মহামন্ত্র, যা এতদিন বলি নি, আজ ব’লে যাব।”

সবাই যেটা জানতে ব্যস্ত, সেটা আজ কুঁকড়ো প্রচার করবেন, মুরগিদের আনন্দ আর ধরে না। কুঁকড়ো বাঁচুক মরুক তাতে কী। মস্তুরটা শুনতে পেলেই হল। তারা সবার আগেই

গলা বাড়িয়ে বসল। কুঁকড়ো সেটা দেখলেন। হায়দ্রাবাদিটা কেবল তাল ঠুকছিল, তার আর তর সয় না। কুঁকড়ো তাকে বললেন, “ভয় নেই, পালাব না, একটু সবুর করো।” তার পর সবার দিকে চেয়ে বললেন, “কথাটা শুনে তোমাদের যদি খুব হাসি পায় তো খুবই হেসো; তামাশা টিটকিরি দিতে চাও তাও দিয়ো, আমি তাই দেখেই সুখে মরব।” সোনালি চেষ্টা করে বললে, “ছিঃ, ও কী কথা।” জিন্মা বুঝেছিল, কুঁকড়োর মনের কথাটা কী; তাই সে বললে, “বেনা বনে মুক্ত ছড়িয়ে কী লাভ হবে বন্ধু।” কিন্তু কুঁকড়ো যখন বলেছেন তখন তিনি আর সে কথা নড়চড় হতে দেবেন না। তাঁর মুখ দেখে জিন্মা আর সোনালি দুজনেই চূপ হয়ে গেল। কুঁকড়ো চারি দিকে দেখে বললেন, “নিশাচরদের বন্ধু, অন্ধকারের পাখি সব। তবে শোনো, আর শুনে আমায় পাগল ব’লে খুব হাসো। আজ আমার কাছে তোমাদের কিছুই লুকোনো রইল না, কে আমার আপন্যার, কেবা পর সব চেনা গেল, ধরা পড়ল। তবে আজ আমিই-বা লুকিয়ে থাকি কেন আপনাকে না জানিয়ে।” ব’লে কুঁকড়ো আর-একবার চারি দিক দেখে বললেন, “আলোর ফুলকি, আলোর ফুল আকাশে কোটে কেন তা জানো? আমি গান গাই ব’লে।” প্রথমটা সবাই থ হয়ে গেল, তার পর একেবারে হাসির হুল্লোড় উঠল, “পাগল। পাগল।”

কুঁকড়ো বলে উঠলেন, “সবাই হাসছ তো।” ব’লেই হাঁক দিলেন, “সামাল জোয়ান সামাল।” লড়াই শুরু হয়ে গেল। তখনো সবাই হাসছে, কী মজা, উনি গান গেয়ে আকাশে আলো জ্বালান, কী আপদ...।

কুঁকড়ো বাজুখাঁই মোরগের এক প্যাঁচ সামলে বললেন, “হাঁ আমিই সূর্যের রথ রোজকে রোজ টেনে আনি।” তার পরেই কুঁকড়োকে বাজুখাঁই এক ঘা বসালে; তার পর আর-এক ঘা, আর-এক ঘা। সবাই চারি দিক থেকে চীৎকার করতে লাগল, “বাহবা বাজুখাঁ, চালাও, জোরসে ভাই।” কুঁকড়োর মুখে চোখে ঘা পড়ছে আর সবাই চেষ্টা করে, “খুব ছয়া, বহুত আচ্ছা, জেসাকে তেসা, ইয়ে: মারা।” ওদিকে কুঁকড়োও ব’লে চলেছেন, “আমিই আলো আনি, সকাল আনি, আলো, আলো, আলো।” কুকুর চেষ্টা করে, “হাঁ হাঁ।” সোনালি কাঁদছে চোখ ঢেকে, আর সব পাখি তারা ব’লে চলেছে হাততালি দিয়ে, “চালাও বাজুখাঁই চৌচ,

আঙুর এক লাথ ভুগুমে, বাহবা বাজখাঁ, খুব লড়তা, ইয়েঃ এক ঘা, উয়োঃ দো ঘাও, মারা মারা।” রাজ্যের পাখির গালাগালি হাসি টিটকিরির মধ্যে কুঁকড়ো এক-এক পা করে ক্রমে মরবার দিকে এগিয়ে চলেছেন। তাঁর বুক বেয়ে রক্ত পড়ছে, গায়ের পালক সব ছিঁড়েখুঁড়ে চারি দিকে উড়ছে, চোখ ঝাপসা হয়ে এসেছে, মনে হচ্ছে পৃথিবী যেন ঘুরছে কিন্তু তবু তিনি যুঝছেন। কিন্তু শক্তি ক্রমেই কমছে। এই সময় তাঁর মোরগ-ফুলের উপরে বাজখাঁ এমন এক ঘা বসিয়ে দিলে যে কুঁকড়ো অসান হয়ে বসে পড়লেন। অমনি চারি দিকে সবাই চৌচিয়ে উঠল, “বাহবা কী বাহবা। ঘায়েল ছয়া, ঘায়েল ছয়া।”

জিন্মা রাগে ফুলতে লাগল আর তার দুই চোখ দিয়ে দরদর করে জল পড়তে লাগল। কুঁকড়োর হুকুম, তার নড়বার জো নেই। কিন্তু সে তার বন্ধুর হৃদশা আর দেখতে পারে না। সে ধমকে উঠল, “তোরা সব পাখি না মানুষ?” জিন্মা বলতে চায় যে মানুষ ছাড়া এমন নির্দয় আর কে হতে পারে। কিন্তু তার কথা জোগাল না; সে কেবল বলতে লাগলে, “ওরে, এরা পাখি, না মানুষ?” কুঁকড়ো যখন সান পেয়ে আবার চোখ মেললেন, তখন সব চুপচাপ রয়েছে, হায়দারি মোরগ বেড়ায় ঠেস দিয়ে হাঁপাচ্ছে, জিন্মা কেবল কাছে দাঁড়িয়ে; আর দূরে, সব পাখির দলের থেকে দূরে, ডানায় মুখ ঢেকে রয়েছে সোনালিয়া।

কুঁকড়ো জিন্মাকে বলছেন, “এই শেষ, না যন্ত্রণার আরো কিছু রেখেছে পোশাকী পাখি আর তাদের দলবলেরা।” এমন সময় দেখা গেল, সব পাখি পা টিপে টিপে কুঁকড়ো যেখানে পড়ে রয়েছে সেই দিকে দল বেঁধে এগিয়ে আসছে; সবার মুখ শুকনো, যেন কী-একটা ভয়ে সবাই জড়োসড়ো, কেউ আর হাসছে না।

কুঁকড়ো বললেন, “আঃ জিন্মা, দেখো দেখো ওরা আমায় ভালোবাসে কি না দেখো। আহা সবার মুখ শুকিয়ে গেছে। এরা যদি শত্রু তবে আর মিত্র কে। আজ আমার ভুল ভাঙল, এখন সবাই আমায় ভালোবাসে জেনে সুখে মরতে পারব।”

জিন্মাও একটু অবাক হয়ে গেল, এই যারা ‘মার মার’ করে কুঁকড়োকে গাল পাড়ছিল, তারাই আবার হঠাৎ বন্ধু হয়ে উঠল এমন যে কেঁদেই অস্থির! কুকুর ঘাড় নেড়ে ভালো করে পাখিদের দিকে চাইলে; দেখলে, সবাই ভয়ে ভয়ে আকাশের দিকে এক-একবার চাচ্ছে

আর কুঁকড়োর কাছে পায় পায় এগিয়ে আসছে। পাখিরা কখন কিভাবে থাকে জিন্মার বেশ জানা ছিল, সে কুঁকড়োকে চুপি চুপি বললে, “আমার তো বোধ হয় না ওরা তোমার প্রাণের জন্তে ভয় পেয়েছে একটুও। ভয় ওইদিক থেকে আসছে শিকরে বাজ হয়ে, আর সেটা এসে ঘাড়ে পড়বার আগে সব পাখিরা চিরকাল যা করে থাকে, আজও ঠিক তাই করছে।”

কুঁকড়ো দেখলেন আকাশের অনেক উপরে থেকে সত্যিই বাজপাখি ঘুরে ঘুরে নামছে। তার কালো ছায়াটা যেন কালো হাতের মতো একবার খানিকক্ষণ ধরে সব পাখিদের উপর দিয়ে যেন তাদের এক-একে গুনতে গুনতে এক পাক ঘুরে গেল; অমনি সব পাখি ভয়ে জড়োসড়ো, আর-এক পা কুঁকড়োর দিকে এগিয়ে এল। বিপদের সময় কুঁকড়োর আশ্রয় তারা চিরকাল না চেয়েও যে পেয়েছে, বাজ অনেক বার পড়ো পড়ো হয়েছে, আর অনেকবারই কুঁকড়ো সেটাকে সরিয়ে দিয়েছেন, এবারও তা হবে না কেন। কুঁকড়ো সেই রক্তমাখা বুক ফুলিয়ে সত্যিই সোজা হয়ে দাঁড়ালেন, তার পর ঘাড় তুলে হুকুম হাঁকলেন, “আয় তোরা আয়, কাছে আয়, বুক আয়, ভয় নেই, ভয় নেই।” অমনি বাচ্ছাগুলোকে ডানার মধ্যে লুকিয়ে নিয়ে সবাই কে কার ঘাড়ে পড়ে, ছুটে এসে কুঁকড়োর গা ঘেঁষে দাঁড়াল কাতারে কাতারে সব পাখি। পোশাকী মোরগগুলোর কাছে কেউ গেলও না, তাদের আশ্রয়ও কেউ চাইলে না। কেননা পোশাকী তারা নিজেরাই ভয়ে কাঁপছিল এ-ওকে জাপটে ধরে। বাজের ছায়া আবার সবার উপর দিয়ে ঘুরে চলল, এবারে আরো কালো, আরো বড়ো; আর সবাই এমন-কি পালোয়ান হায়দারি পর্যন্ত ভয়ে গুটিয়ে যেন পালকের পুঁটলিটি। কেবল সবার উপরে মাথার মোরগ-ফুল লাল নিশেনের মতো উঁচু করে দাঁড়িয়ে রয়েছেন কুঁকড়ো, রক্তমাখা বুক ফুলিয়ে। বাজপাখি আর-এক পাক ঘুরে এল, এবার সে একেবারে কাছে এসেছে, কালবোশেখের মেঘের মতো কালো হয়ে উঠেছে তার ভয়ংকর কালো ছায়া; সমস্ত যেন অন্ধকার করে আসছে সেটা আস্তে আস্তে। ভয়ে মায়ের বকের মধ্যে বাচ্ছাগুলো পর্যন্ত কাঁদতে থাকল। সেই সময় কুঁকড়োর সাড়া আকাশ ভেদ করে উঠল, “অবতক্ হাম জিন্দা হ্যায়, অবতক্ হাম দেখতা হ্যায়, অবতক্ হাম মালেক হ্যায়...”

অমনি দেখতে দেখতে বাজের ছায়া ফিকে হতে হতে কোথায় মিশিয়ে গেল। আকাশ যে

পরিষ্কার সেই পরিষ্কার নীল বকবক করছে। আহ্লাদে পাখিরা সব আবার গা বাড়া দিয়ে যে যার জায়গায় উঠে বসে বললে, “এইবার আবার কুস্তি চলুক।” জিন্মা অবাধ হয়ে গেল; কুকড়োর মুখে কথা সরল না, সোনালি বললে, “ভূমি ওদের বাঁচালে আর ওরা তার পুরস্কার দেবে না? বাজ দেখালে ভয়, তার শোধ তুলবে ওরা তোমায় মেরে!”

কিন্তু কুকড়ো জানেন আর তাঁর মরণ নেই; যে-পাখিকে সবাই ভয় করে, সেই বাজের কালো ছায়া তিনবার তাঁর মাথার উপর দিয়ে ঘুরে গেছে, ভয় থেকে তিনি সবাইকে বাঁচিয়েছেন, এখন নিজে তিনি নির্ভয়ে যুদ্ধের জগ্রে এগিয়ে এসে হায়দারিকে এক গৌস্তা বসিয়ে বললেন, “আও।” গৌস্তা খেয়ে হায়দারি ঠিকরে বেড়ার উপর গিয়ে পড়ল। এবার ইম্পাতের পেরেক-আঁটা কাতান কুকড়োর উপর চালাবার মতলব করে সে ছুপায়ে বাঁধা ছোরাছুটোয় শান দিয়ে নিতে লাগল। বেরাল গাছের উপর থেকে হায়দারিকে বললে, “কেঁও মিঁয়া।”

চড়াই বললে, “কাতানি কাটকাটানি।”

জিন্মা বললে, “চালাক দেখি, ও কাতান, ওর টুঁটি ছিঁড়ব না!”

আবার কুস্তি চলল। জিন্মা দেখছে হায়দারিটা ছোরা না চালায়, এমন সময় হঠাৎ হায়দারি সাঁ করে ছোরা উঁচিয়ে ‘লেও’ বলেই যেমন কুকড়োকে কাতান বসাবে, অমনি কুকড়ো এক পাঁচ দিয়ে তাকে উলটে ফেললেন। হায়দারির নিজের কাঁটা তার নিজেরই বুক কেটে বসল। হায়দারি পড়লেন। তার বন্ধুরা তাকে ধরাধরি করে উঠিয়ে নিয়ে পালাল। পাখিরা সব “হুও হুও” করে তার পিছনে চলল। সোনালি আর জিন্মা কুকড়োর কাছে ছুটে এসে দেখলে, তিনি চোখ বন্ধ করে চুপচাপ বসে আছেন।

জিন্মা বললে, “আমরা এসেছি বন্ধু, আমাদের সঙ্গে কথা কও।”

সোনালি বললে, “আমি এসেছি একটিবার চেয়ে দেখো।”

কুকড়ো আন্তে-আন্তে চোখ মেলে বললেন, “ভয় নেই, কালও আবার সূর্য উঠবে, আলো ফুটবে।” এদিকে হায়দারিকে ‘হুও’ দিয়ে তাড়িয়ে সব পাখি কুকড়োকে ‘জয় জয়’ বলে খাতির করতে এল।

কুকড়ো রেগে হাঁকলেন, “ছুঁও মৎ, তফাত রও।”

জিন্মা বললে, “আর কেন। কে কেমন তা বোঝা গেছে, সরে পড়ো।”

সোনালি বললে, “সত্যিকার পাখি যদি থাকে তো সে বনে, তোরা কি পাখি।” তার পর কুঁকড়োর দিকে ফিরে সোনালি বললে, “চলো, আর এখানে কেন, বনে চলে যাই চলো।”

কুঁকড়ো বললেন, “না, আমাকে এখানেই থাকতে হবে।”

“এত কাণ্ডের পরেও, সব জেনেও?” সোনালি অবাক হয়ে শুধালে।

কুঁকড়ো জবাব দিলেন, “হাঁ, সব জেনেও থাকতে হবে।”

সোনালি অবাক হয়ে রইল। কুঁকড়ো আবার বললেন, “হাঁ সোনালি, এখন শুধু আমার গানের জগ্গেই থাকব, আর কারু জগ্গে নয়। মনে হচ্ছে এ দেশ ছাড়লে বিদেশে বিভূঁয়ে গান আমার শুকিয়ে মরবে। আঃ, এই আকাশ, এই দিন— একে আবার আমি গান গেয়ে আলো দিয়ে কাল জাগিয়ে তুলব, মরতে দেব না।” পাখিগুলো আবার মুখ কাঁচুমাচু করে কুঁকড়োর দিকে এগিয়ে এল। তিনি ঘাড় নেড়ে মানা করলেন, “না, আর না, কেউ না, এখন শুধু আমি আর আমার গান, আর আমার কেউ নেই, কিছু নেই, সরে যাও, আমি দিনের আসা গাই।” সব পাখিরা দূরে সরে গেল; কুঁকড়ো সোজা দাঁড়িয়ে সুর ধরলেন, “আ-আ-আ...।” কিন্তু এ কী। গান কোথায় গেল। তাঁর মনের ভিতর ঘুরছে— সা-সা-সা। তিনি আবার চাইলেন গাইতে, অমনি মনে হল সুরটা ওড়ব না খাড়ব? ওটা পঞ্চম না ষষ্ঠ? তেতালা না চৌতালা? এমনি সব নানা শাস্ত্রের বিভিবিড় হিজিবিজি তাঁর গলার মধ্যে বুকের মধ্যে ঘট্ঘট্ করতে লাগল। কুঁকড়ো নিশ্বেস ছেড়ে বললেন, “হায় আমার গান পর্যন্ত রাখলে না; সব কেড়ে নিলে— কোথায় আমার গান।” ব’লে কুঁকড়ো ঘাড় হেঁট করলেন।

সোনালিয়া কাছে ছুটে এল, কুঁকড়ো তার বুকের মধ্যে মুখ লুকিয়ে কেঁদে বললে, “তুমি ছাড়া আর কেউ নেই, তোমার ভালোবাসা ছাড়া আর কিছু নেই জগতে, ও আমার স্বপন-পাখি।” সোনালি আস্তে-আস্তে বললে, “চলো চলে যাই, যেখানে কেবলই গান আর ফুল ফুটছে সেই বন, সেখানে সা-রে-গা-মা-ব’লে কেউ মাথা বকায় না— দিনরাত গেয়েই চলে।”

কুঁকড়ো সোনালিকে বললেন, “যাব, তোমার সঙ্গেই যাব, ছুজনে যাব, শুধু যাবার আগে এদের একবার চোখ ফুটিয়ে দিয়ে যাব।” ব’লে কুঁকড়ো সবাইকে ডেকে বললেন, “ওগো

কুলতলার নিষ্কর্মার দল ! এই সবজি-বাগান হাওয়া খাবার জায়গাও নয়, গুলতোন করবার আড্ডাও নয়, এখানে কাজ চলেছে, ফুল থেকে ফল আন্তে-আন্তে তৈরি হচ্ছে, হট্টগোলের জায়গা এটা নয়, ওই শোনো মৌমাছিরাও এই কথাই বলছে ।” অমনি সব মৌমাছি ব'লে উঠল, “কাজের সময়, সরো না মশয় ! সরো না মশয় ! এসো না মশয় ! এসো না মশয় !”

তার পর মুরগিদের ডেকে কুঁকড়ো বললেন, “ওই-সব পোষা মোরগের পালক দেখে ভুলো না । ভুলো না । যে ধান ছড়ায় তারি কাছে ওরা ছুটে যায়, গোলাম ব'নে সেলাম বাজায় । ওদের সবখানিই মিথ্যে দিয়ে গড়া, সত্যির মধ্যে কেবল ওদের পেটটি । আর ময়ুর তোমাকে বলি, দেব-সেনাপতির বাহন ব'লে বিধাতা তোমায় ভালো সাজ দিয়েছেন কিন্তু তাই ব'লে সাহস ব'লে জিনিস তোমায় একটুও তিনি দেন নি ; দিয়েছেন তোমার বুকের মধ্যে হিংসে আর দেমাকের বিষ এমনি ভাবে যে তোমার গলার খানিক পালক পুড়ে কালি হয়ে গেছে ; আর তোমার ল্যাজের ডগাটি পর্যন্ত হয়ে গেছে নীল, পাছে কারু বাড় দেখতে হয় সেই ভয়ে ।”

চড়াই অমনি ব'লে উঠল, “ছুট্ ।”

কুঁকড়ো চড়ায়ের দিকে ফিরে বললেন, “কী কুক্ষণে শহুরে চড়ায়ের সঙ্গে তোমার দেখা হয়েছিল বনের তাল চড়াই, সেই থেকে কেবলই তুমি ভয়ে-ভয়ে আছ, পাছে কেউ তোমার শহুরে খোলস খুলে নেয় । নকল-শহুরে । তোমার চলন নিজের নয়, বলন নিজের নয়, কেননা তোমার আনন্দ নেই, আছে কেবল ধরা-পড়বার ভয় । তুমি নিজেকে পছন্দ কর না কাজেই অশ্রুকেও ভালোবাস না । তোমার কী নাম দেব ? তুমি জ্বলন্ত সলতের পোড়া গুল, তোমাকে কাঁচি দিয়ে ছেঁটে দেওয়াই দরকার ।”

চিনি-দিদি ব'লে উঠলেন, “বেশ বেশ ।”

চড়াইটা ল্যাজ-গুড়িয়ে এক কোণে সরে পড়ল, আর পেরুর উপরে এই অপমানের ঝালটা ঝাড়তে গেলে কোনো বিপদে পড়বে কি না সেটা মনে মনে বিচার করতে লাগল । ঠিক এই সময় দূর থেকে চিড়িয়াখানার মালিক ডাক দিলেন, “আয়—আঃ—আয় আঃ !” অমনি সব পোশাকী মোরগ সেই দিকে দৌড় দিলে ।



চিনি-দিদি বললেন, “চললে নাকি। চললে নাকি।” ব’লে তাদের সঙ্গে ছুটলেন।

সোনালি কুঁকড়াকে বললে, “আর কেন? চলো এইবার।” ব’লে কুঁকড়াকে নিয়ে বনের দিকে আস্তে আস্তে চলে গেল। জিন্মা ফ্যাল্ ফ্যাল্ করে সেইদিকে খানিক চেয়ে থেকে আস্তে আস্তে গোলাবাড়িতে ফিরে গেল মাথা নাড়তে নাড়তে।

চিনি-দিদি ফিরে দেখলেন সবাই চলে গেছে। তিনি তবু যেন সবাইকে খাতির ক’রে বেড়াতে লাগলেন আর কেবলই বলতে লাগলেন, “আসছে সোমবারে আসবে তো? নমস্কার। মনে থাকে যেন আসছে সোমবার।”

খালি উঠোনময় চিনি-দিদি ঘুরে বেড়াচ্ছেন এইভাবে, এমন সময় কাক ফুকরোলে, “কাছিম মিয়া, কাছিম মিয়া”...। চিনি-দিদি তার ছেলেকে বলছিলেন, “আঃ, আজ মজলিস্ কেমন জমেছিল দেখিছিস্!” গুটি-গুটি কাছিম এসে কুলতলায় বসলেন।

৭

বনে বসন্তকাল এসেছে। চমৎকার দিনগুলি— আলো-ছায়ায় নিবিড় বনের সবুজে ঢাকা পথে-পথে, আর নিস্তরূ রাতগুলি— রাঙা-ফুলে ঢাকা অশোক গাছের দোলনায়, কুঁকড়ো আর সোনালিয়া ছুটিতে আনন্দে কাটাচ্ছেন। এমন সবুজ, এমন ঠাণ্ডা ছায়ায় ছায়াময় সে বন, যেন মনে হয় মায়ের কোলে এসেছি। সেইখানে কুঁকড়ো আস্তে আস্তে সব কষ্ট ভুলতে লাগলেন। সকাল থেকে সঙ্গে তিনি বেড়িয়ে বেড়ান, একলাটি। চারি দিকে বড়ো বড়ো দেবদারু আর ঝাউ, এত পুরোনো যে তাদের বয়স কেউ জানে না। ডালে ডালে সব সবুজ শেওলা জটার মতো ঝুলে পড়েছে; শিকড়গুলো তাদের পাথর ঝাঁকড়ে কোন্ পাতালে যে নেমে গেছে তার ঠিক নেই। কোথাও ঝুর-ঝুর করে পাতা ঝরছে, কোথাও ঝাউ ফলগুলোয় মাটি একেবারে বিছিয়ে গেছে। একটা নালায় ধারে ঝরনা ঝরছে, তারি এক পাশে ব্যাঙেরা ছত্রি বেঁধে হাট বসিয়েছে।

কত রকমের পাখি গাছে গাছে। কাঠবেরালি সব বাদাম-গাছের ডালে-ডালে লাফালাফি করে বেড়াচ্ছে; খরগোস ঘাসের মধ্যে লুকোচুরি আর কপাটি খেলছে। বনে এসেই খরগোস-গুলোর সঙ্গে কুঁকড়োর ভাব হয়ে গেল; কিন্তু তারা ফ্যাল-ফ্যাল করে চেয়ে থাকে, সোনালিয়া সেটা সহিতে পারে না; এক-একদিন কুঁকড়োর আড়ালে ডানার ঝাপটা দিয়ে তাদের ভয় দেখাতে ছাড়ে না।

একটা কাঠঠোকরার সঙ্গে কুঁকড়োর খুব জমে গেল। অশোক-গাছটার পাশেই একটা কাঁঠাল গাছে তার কোটর। দিনের মধ্যে দশবার সে কুঁকড়োর সঙ্গে গল্প করতে এসে হাজির হয়। সোনালিয়া কিন্তু এটা ভারি অপছন্দ করে; সময় নেই, অসময় নেই, এলেই হল? শেষে কাঠঠোকরার সঙ্গে বন্দোবস্ত হল, আসবার আগে সে তিনবার ঠুকঠুক আওয়াজ দিয়ে তবে আসবে।

কিন্তু কাঠঠোকরার গল্প শুনতে কুঁকড়ো সত্যি ভালোবাসেন; সে যে কত কালের সব পাখিদের কথা জানে, তার ঠিক নেই।

একদিন সন্ধ্যাবেলা কাঠঠোকরা কুঁকড়োকে সন্ধ্যা-পাখির গান শোনালে। সে অতি চমৎকার। দুটি টুনটুনি সুর ধরলে আর বনের সব পাখি তাদের গানে আস্তে আস্তে যোগ দিলে। প্রথম পাখিটি গাইলে, “ও আমাদের বন্ধু!” জুড়ি-টুনটুনিটি অমনি ধরলে, “ও অন্যথের নাথ!” হাজার হাজার পাখির মিষ্টি সুর অমনি গাছে গাছে সাড়া দিলে, “ওগো বন্ধু। ওগো বন্ধু।” তার পরে বন্দনা শুরু হল—

“নমস্কার নমস্কার! আকাশে নমস্কার, আলোতে নমস্কার, আভাতে নমস্কার, বাতাসে নমস্কার, রাতে নমস্কার, দিনে নমস্কার— তোমাকে নমস্কার। তোমার দেওয়া চোখের আলো, তোমার দেওয়া মিষ্টি জল, তোমার এই ঘন বন, তোমার এই মধু ফল, তোমার এই কাঁটার বেড়া, তোমার এই সবুজ ঘাস। মিষ্টি সুর এও তোমার, তোমার এ নিশ্বাস। তোমার এই পাতার বাসা, তোমার এই ছোটো পাখি। আমার এই ছোটো সুরে তোমারেই আমি ডাকি।...ছোটো বাসার ছোটো পাখি— সন্ধ্যা হল তোমায় ডাকি, দিনের শেষে তোমায় ডাকি, বন্ধু এসো, তোমায় ডাকি।”

এ পাখি থেকে ও পাখি, এ গাছ থেকে ও গাছ, এমনি করে বনের শেষ পর্যন্ত “বন্ধু এসো”

ব'লে সবাই ডাক দিয়ে গেয়ে উঠল। কুঁকড়োও ডাক দিলেন, “বন্ধু বন্ধু!” তার পর একটি একটি ক'রে সব ছোটো পাখিরা পাতার আড়ালে ঘুমিয়ে পড়ল। দেখতে দেখতে চাঁদের আলো বনের কাঁক দিয়ে অন্ধকারের মধ্যে ঝরনার মতো নেমে এল— লতাপাতার কিনারায়, পাথরের উপর, শেওলার গায়ে। কুঁকড়ো দেখলেন, একটুখানি মাকড়সার জালে হীরের মতো কী ঝলক দিচ্ছে। মনে হল, বুঝি একটা জোনাক-পোকা জালে পড়েছে। কাছে গিয়ে দেখেন, বিষ্টির একটি ঝাঁটায় চাঁদের আলো এসে লেগেছে। এমনি সব নূতন-নূতন কত কী দেখতে দেখতে সেই মহাবনে কুঁকড়োর দিন আর রাতগুলি আনন্দে কাটছে।

বনে ফিরে এসে কুঁকড়ো আবার তাঁর গান ফিরে পেয়েছেন। কিন্তু কেবল সকালের গানটি ছাড়া সোনালি তাঁকে আর-একটি গানও গাইতে দেবে না— তাও আবার সকালটা যদি সোনালির গায়ের পালকের চেয়েও রঙিন আর জমকালো হয়ে দেখা দেয় তবেই। কুঁকড়ো সোনালিকে বলেন, “এই আলোতেই আমাদের সেদিনের মিলন, সেটা ভুললে চলবে না সোনালি। আলোর জয় আমাকে দিতেই হবে সারাদিন।” সোনালি বলে, “তুমি আমার চেয়ে আলো-কে কেন ভালোবাসবে।”

ইতিমধ্যে একদিন চক্চকে সবুজ এক সোনাল-পাখির সঙ্গে সোনালির দেখাশুনো হয়েছে, আর গহন-বনের একটা নির্জন পথে ছুটিতে বেড়িয়ে বেড়াচ্ছে এটা কুঁকড়োর চোখ এড়াল না। কিন্তু মনের হুঁখ মনেই রেখে কুঁকড়ো ভাবলেন, “আমি কি বলতে পারি, কেন তুমি সোনালকে বেশি পছন্দ করবে আমার চেয়ে সোনালি? আকাশ কি কোনোদিন তাতে-পোড়া পৃথিবীকে বলতে পারে— তুমি বিষ্টির ঝাঁটাগুলিকে রোদের চেয়ে কেন ভালোবাসবে? না, মাটিই বলতে পারে আকাশকে— তুমি বিষ্টিতেই বরণ করো, আলো-কে চেয়ো না! সোনালিয়া, সে বনের ছললালী, অরণ্য তো তাকে আমার সঙ্গে বাইরে— দূরে পাঠাতে পারবে না; সে দূত পাঠিয়েছে ঘন বনের সবুজ সোনাল-পাখিটি; ওরি সঙ্গে কোন্‌দিন চলে যাবে ঝরা ফুল ঝরা পাতার স্বপ্ন-বিছানো গহন-বনের অন্তরের পথে সোনার আঁচলে ঝিলিক দিয়ে সোনার পাখি। আর আমি”—ব'লে কুঁকড়ো নিশ্বাস ফেললেন।— “কাঠঠোকরা ঠিকই বলে, ‘যেখানে যার বাসা, সেইখানেই তার ভালোবাসা।’ আমার সবই সেই পাহাড়তলির আকাশের নীচে

—আর সোনালির সবই এই বনের তলায় যেদিন দেখা দেবে, সেদিন তো কেউ-কাউকে ‘যেয়ো না’ ব’লে রাখতে পারব না ; কেবল এইটুকুই সেদিন বলবার থাকবে— ভুলো না বন্ধু, মনে রেখো।”

সে আর-একদিন ; হুজনে অশোক-তলাটিতে দাঁড়িয়ে ; সূর্য অস্ত গেছে ; সন্ধ্যার পাখিদের গান বন্ধ হয়েছে ; হু-একটা কাঠবেরাল তখনো পাতার মধ্যে উসুথুসু করছে ; খরগোসগুলো তাদের গড়ের বাইরে বসে একটু সন্দের বাতাসে জিরিয়ে নিচ্ছে ; বন আন্তে-আন্তে নিঝুম হয়ে আসছে। রাত্রির অন্ধকারে গাছ সব ক্রমে যেন মিলিয়ে গেল ; সেই সময় ক্রমে-ক্রমে চাঁদের আলো ঘুমন্ত বনে এসে পড়ল। সে রাতের মতো বিদায় নেবার জন্তে সোনালি কুঁকড়োকে “আসি” বলতে গিয়েই দেখলে খরগোসগুলো চোখ প্যাঁট-প্যাঁট ক’রে তাদের দিকে দেখছে। অমনি এক ডানার ঝাপটায় সোনালি তাদের তাড়িয়ে দিয়ে বললে, “আসি তবে।” কুঁকড়ো বললেন, “দেখো, মনে রেখো।” সোনালি বিদায় নিয়ে অশোক ফুলের গাছে তার মনোমত ডালটির উপরে উড়ে-বসতে ফিরে দাঁড়িয়েছে, এমন সময় পায়ে তার কী-একটা ঠেকল। ‘ইস্’ ব’লে সোনালি সরে দাঁড়িয়ে দেখলে কী, সে তো কিছু বুঝতে পারলে না। কুঁকড়ো কাছে এসে দেখে বললেন, “সর্বনাশ, এ যে ফাঁদ পাতা রয়েছে। কে এখানে ফাঁদ পাতলে ?” টুক্ টুক্ টুক্ তিনবার আওয়াজ দিয়ে সবুজ ফতুয়া লাল-টুপিটি মাথায় কাঠঠোকরা কোটর থেকে বেরিয়ে বললেন, “ফাঁদটা বাঁচিয়ে চলো, ওই গোলাবাড়ির মানুষটিই ফাঁদ পেতেছে, সোনালিয়াকে ধরবে ব’লে।” “আমাকে ধরা তার কর্ম নয়।”—ব’লে সোনালি মাথা ঝাড়া দিলে। কাঠঠোকরা বলল, “শুনলুম সে তোমাকে ধ’রে পোষ মানাবে।” কুঁকড়ো বললেন, “তিনি খুব ভালো লোক, যদি তুমি ধরা পড়তে, তবে তোমাকে তিনি কষ্ট দিতেন না, এটা আমি ঠিক বলতে পারি।” সোনালি বললে, “কষ্ট না দিন, কিন্তু প্রাণ থাকতে সোনালি তার পোষ মানত না, সেটাও ঠিক।”

ফাঁদ পাতা হলে বনের সবাই সবাইকে সাবধান না ক’রে নিশ্চিত হতে পারে না, তাই খরগোস এসে বললে, “দেখো, খবরদার ওই কলটাতে যেন পা দিয়ে না ; ছুঁয়েছ কি।—”

“বোকোনা তুমি। ফাঁদে যে আটকায় কেমন-ক’রে তা আমি খুব জানি। এক কুকুর ছাড়া আর কাউকে আমি ডরাই নে। ঘরে যাও, ঠাণ্ডা লাগবে।”—ব’লে সোনালি আন্তে ডানার ঝাপটা

দিয়ে খরগোসকে বিদায় ক'রে কুঁকড়োকে বললে, “আমি একবার গোলাবাড়ির দিকে যাচ্ছি।”

কুঁকড়ো ব্যস্ত হলে ব'লে উঠলেন, “কেন। কেন। সেখানে কেন।” “ও-দিককার কুকুর-গুলোকে একটু দৌড় করিয়ে আসি। এই এক-পা এখানে, এক-পা ওখানে, যাব আর আসব, দেরি হবে না।”

সোনালি চলে গেল, কুঁকড়ো অনেকক্ষণ সেদিকে চেয়ে থেকে, গাছের উপর কাঠঠোকরাকে শুধালেন, “সোনালিকে দেখতে পাচ্ছ কি।” কাঠঠোকরা উঁচু ডাল থেকে গলা বাড়িয়ে দেখে বললেন, “না, তিনি গেছেন।” কুঁকড়ো বললেন, “তুমি ভাই, একটু নজর রেখো তো, সে আসছে কি না। আমি একবার গোলাবাড়ির চড়াইটার সঙ্গে কথা কয়ে নিই।”

কাঠঠোকরা আশ্চর্য হয়ে ব'লে উঠল, “চড়াই না তোমার শত্রু?”

কুঁকড়ো বললেন, “কিন্তু খবর দিতে আর তার মতো ছুটি নেই। খবর যা চাও, তার কাছে পাবে।”

“চড়াই আসছেন নাকি।” কাঠঠোকরা শুধলে।

কুঁকড়ো বললেন, “না। এই দেখো-না তাকে ফৌ করি। এই যে নীল ধুঁতরো ফুলটা দেখছ, এর সঙ্গে মাটির মধ্যে দিয়ে তারের মতো সরু শিকড় দিয়ে গোলাবাড়ির পুকুরধারে খেত ধুঁতরো ফুলের যোগ আছে। ফুলের ভাষা ব'লে কবিতার বইয়ে পড়েছ তো। একেই বলে ফুলে-ফুলে কানাকানি।”

বনের মধ্যে যে এমন কল আছে কাঠঠোকরা তা জানত না। ফৌ কেমন, দেখতে সে ব্যস্ত হল। কুঁকড়ো ফুলের মধ্যে মুখ দিয়ে ডাকলেন, “হ্যালো।” খানিক ঘর্-ঘর্ শব্দ হল।— “হ্যালো চড়াই। গোলাবাড়ি।” কাঠঠোকরা বলে উঠল, “কুঁকড়ো ভাই, তোমার তো সাহস কম নয়। বাসার একেবারে দরজায় দাঁড়িয়ে কথা-চালাচালি। সোনালি টের পেলে—।”

কুঁকড়ো বললেন, “সেখান থেকে যখন কথা আসবে তখন এই ফুলের মধ্যে যে মৌমাছিটা আছে, সে জেগে উঠবে আর—।”

‘বৌ-ও-ও’ শব্দ হল। অমনি কুঁকড়ো ফুলে কান দিয়ে “চড়াই নাকি” বলে খানিক আবার শুনে বললেন, “ও: তাই নাকি। আজ সকালে—।”

কাঠঠোকরা শুধলে, “কী বলছে ? কী ?”

কুঁকড়ো বললেন, “তুকুড়ি দশটা মুরগির বাচ্ছা ফুটেছে ?” তার পর আবার একটু শুনে বললেন, “বলো কী। তম্মার ভারি ব্যায়রাম !”

কী একটা গোল বাধল। কুঁকড়ো বললেন, “রোসো, রোসো। কী। ভালো শোনা যাচ্ছে নাহে। আঃ, মশাগুলো জ্বালালে। চড়াই, আঃ, হাঁ হাঁ তারপর, জিন্মাকে নিয়ে তারা শিকারে বেরবে। বল কী হে। “জিন্মা গোলাবাড়ির একজন।”—কাঠঠোকরাকে এই ব’লে কুঁকড়ো আবার ফৌধরলেন, “কী বললে ? আমি চলে আসবার পর থেকে সব কাজে গোলমাল চলেছে ? এ তো জানা কথা... এই সেদিন এসেছি এরি মধ্যে... যেতে হবে... তাই তো কী করা যায় হে... যাব নাকি। কী বল।” কাঠঠোকরা চুপিচুপি বললে, “সোনালি আসছেন।” কিন্তু কুঁকড়ো তখন মন দিয়ে কানে ফুলটা চেপে ধরেছেন, কাঠঠোকরার কথা তাঁর কানেই গেল না। কথা চলল, “কী বললে ? হাঁসগুলো সারারাত লাঙলটার তলায় ঘুমিয়েছে ? বল কী !” কাঠঠোকরা কুঁকড়োকে বলছে, “থাক্, দেখো, চুপ।” কিন্তু কিছু ফল হচ্ছে না। ওদিকে সোনালি এসে উপস্থিত। কাঠঠোকরাকে ইশারায় চুপ করতে ব’লে সোনালি কুঁকড়োর পিছনে লুকিয়ে দাঁড়াল।

ফোনে কুঁকড়ো বললেন, “বল কী, সব কজনেই ? ওঃ ময়ুরটা তা হলে মাটি হয়েছে বলো।”

কাঠঠোকরা আবার মুখ বার করতেই সোনালি তার দিকে এমনি চোখ রাঙিয়ে উঠল যে সে তাড়াতাড়ি কোটরে যেমন সঁধবে, অমনি দরজায় মাথা ঠুকে ফেললে। কুঁকড়ো ফোনে বললেন, “মুরগিরা সব... আঃ, ভালো আছে শুনে খুশি হলেন... গান ? ওঃ গান করি বৈকি। হাঁরোজ। কিন্তু এখন থেকে একটু দূরে... ওই যে দিঘিটা আছে, তারি ধারে। হাঁ, নিত্য নিত্য, ঠিক আগেরই মতো।”

রাগে সোনালি লাল হয়ে উঠল ; তাকে লুকিয়ে গান গাওয়া হয়। এত বারণ করলুম...।

কুঁকড়োর কথা চলল, “সোনালি গাইতে মানা করে, তাই লুকিয়ে আমি আলো আনছি আজকাল।” সোনালি এক-পা কুঁকড়োর দিকে এগিয়ে গুনলে, কুঁকড়ো বললেন, “যখন

সোনালির কালো চোখছুটি ঘুমে ঢলে পড়ে, যখন তার সোনার দেহটি আলিসে লুটিয়ে চমৎকার দেখতে হয়”, সোনালির মুখে এবার হাসি ফুটল। “...সেই সময় আমি পা-টিপে-টিপে শিশিরের উপর দিয়ে দূরে গিয়ে, আলোর জগ্রে যে-ক’টি গান সব ক’টি গেয়ে, যেমনি দেখি অন্ধকার ফিকে হচ্ছে, অমনি আস্তে আস্তে বাসায় ফিরি।... কী বলছ? শিশিরে পা ভিজ়ে দেখে সে সন্দেহ করবে? তাই যদি হবে, তবে ডানার পালাকগুলো আছে কী করতে। পা-ছুটো মুছে নিতে কতক্ষণ। তার পর আস্তে আস্তে অশোকের ডালে ব’সে যে-গান সে গাইতে মানা করে নি, সেইটে গেয়ে তার ঘুম ভাঙাই।”

সোনালি আর রাগ সামলাতে না পেরে ফঁোস করে উঠল। কুঁকড়ো ঘাড় ফিরিয়ে তাকে দেখেই চটপট ফোনে বললেন, “নাঃ কিছু না, আর-একদিন হবে এখন।”

সোনালি বললে, “আমাকে ঠকালে কেন।”

ফোনটা শব্দ করলে, “ফুর-র।”

কুঁকড়ো বললেন, “আমি তোমাকে—”

“ফুর-র”, আবার ফুলের মধ্যে মাছিটা ডাকলে। কুঁকড়ো ফুলটার উপর ডানা চাপা দিলেন, কিন্তু সেটা ক্রমাগত “ফুর-র-র-র-র-র” ব’লেই চলল।

সোনালি খুব রেগে বললেন, “কী নির্দয় তুমি ঠগ।... কেন শুধুছ। তুমি মুরগিদের খবর নিতে এতক্ষণ ব্যস্ত ছিলে’না? কে কোথায় ঘুমোয়, কে কী খায়, কার কটি ছানা হল? গোলাবাড়ির বাইরেও যে ডালকুন্তোটা তার পর্যন্ত খবর নেওয়া হচ্ছে। এও না-হয় সইলুম কিন্তু ভোরবেলায় ডানায় পা মুছে চুপি চুপি... ওঃ বুঝেছি, তুমি একলা এই সোনার পাখিটাকেই ভালোবাস, কেমন?”

কুঁকড়ো খানিক চুপ থেকে বললেন, “সোনালি, ভেবে দেখো, এই হৃদয়ের মধ্যে আলোটি যদি না দেখতে পেতে তবে কি এখানে আসতে তোমার ইচ্ছে হত। হৃদয়ের মধ্যে কিছু না থাকার চেয়ে আলো থাকা কি ভালো নয়। রঙিন-আলো-দিয়ে-গড়া সোনালিয়া। আমি আলো-কে ভালোবাসি তাই তোমাকেও ভালোবাসতে পেরেছি, আলোর দিকে হৃদয় পেতে যদি প্রতি-দিন না দাঁড়াতেম, তবে ভালোবাসার ফোয়ারা যে এতদিনে শুকিয়ে যেত সে কি জান না।”

কুঁকড়োর কথায় সোনালির অভিমান বাড়ল বৈ কমল না। সে ঝগড়া করতে লাগল। কাল্লাকাটি ক'রে ক'রে পাড়া জাগিয়ে তোলাবার জোগাড় করলে। কুঁকড়োও একটু যে চটেন নি তা নয়। শেষ সোনালি বললে, “আচ্ছা আমার যদি মান রাখতে চাও, তবে কাল সকালে একেবারে গাইবে না বলো।”

কুঁকড়ো বললেন, “এ কী কথা। সমস্ত পাহাড়তলিটা যে অন্ধকার হয়ে থাকবে।” সোনালি ঠোঁট ফুলিয়ে বললে, “না-হয় থাকলই। তোমারই-বা কী, আমারই-বা কী।” কুঁকড়ো ঘাড় নাড়লেন, “তা হতে পারে না। একদিন আলো বন্ধ! সব যে ধ্বংস হয়ে যাবে। আমাকে গাইতেই হবে।”

সোনালি বললে, “আচ্ছা, যদি প্রমাণ করে দিই, তুমি না থাকলেও সকাল হতে কিছু বাধল না, তখন?”

কুঁকড়ো একটু হেসে বললেন, “তখন সোনালি আমি সেখান থেকে তোমার সঙ্গে ঝগড়াও করতে আসব না, আর আলো হল কি না হল সে খবরও জানতে খুব উৎসাহ করব না। কেননা যেদিন আমি-ছাড়া হয়ে আলো উঠবে, সেদিন আমি তো আর কুঁকড়ো নেই, আমি যে আলোর আলোয় গিয়ে মিশেছি।”

সোনালির চোখে জল ভরে উঠলে সে কেঁদে বললে, “একটি দিন আমার কথা রাখো।”

কুঁকড়ো ঘাড় নাড়লেন, “না, হতে পারে না।”

সোনালি বললে, “ভুলেও কি একদিন আমার কথা রাখতে নেই গা।”

কুঁকড়ো বললেন, “ভুল হবার যোটি নেই। অমনি অন্ধকার বৃকে চেপে বলে, ডাক্ আলো-কে।”

সোনালি বলে উঠল, “অন্ধকার গুর বৃকে চেপে ধরে? সব বাজে কথা। বলো-না বাপু গান গাও—সবাই তোমার তারিফ করবে ব'লে। গানের তো ওই ছিরি, এর জগ্গে মিছে কথা কেন বাপু। তোমার গান শুনে তো বনের সবাই মোহিত হল। এখানকার বাবুই-পাখি, সেও তোমার চেয়ে গায় ভালো।”

কুঁকড়ো বললেন, “হতে পারে বাবুই গায় চমৎকার, কিন্তু সেইজগ্গে অভিমানে আমি গাওয়া বন্ধ করব, তেমন কুঁকড়ো আমার ভাবলে নাকি।” সোনালি রেগেই বলে চলল,



“যেখানে নীচের বনে রোদের বেলা বসন্ত বাউরির গানটি মিনতি জানায়, আর উপরের বনে সা-বুলবুল গানের ফোয়ারা খুলে দেয়, সেই বনের মধ্যে কুকড়োর ডাক কেউ শুনতে চাইবে, এটা পাগল ছাড়া আর কেউ বিশ্বাস করতে পারে না।”

কুকড়ো কোনো কথা না কয়ে তফাতে সরে দাঁড়ালেন। সোনালি তবু বললে, “শুনেছ কোনো-দিন নিশুত রাতের স্বপনপাখির গান?” “শুনি নি।” ব’লে কুকড়ো অশোকের ডালে উঠে বসলেন। সোনালি নিজে নিজেই বলে যেতে লাগল, “স্বপনপাখির গান, সে এমন আশ্চর্য ব্যাপার যে প্রথমবার শুনতে শুনতে”, হঠাৎ সোনালির কী একটা বুদ্ধি মাথায় জোগাল ; সে চুপ হয়ে ভাবতে লাগল।

কুকড়ো শুধলেন, “কী বলছিলে?” সোনালি চেষ্টা করে বললে, “নাঃ, কিছু নয়।” আর মনে-মনে হেসে বললে, “এইবার ঠিক হবে। উনি তো জানেন না যে স্বপনপাখির গান শুনতে শুনতে রাত কখন যে ভোর হয়ে যায়, কেউ বুঝতে পারে না।”

কুকড়ো গাছের উপর থেকে নেমে এসে সোনালিকে বললেন, “কী বলছিলে।”

“কিছু না।” বলে সোনালি মুখ ফিরিয়ে দাঁড়াল।

৮

ঘাসের মধ্যে থেকে ব্যাঙ আওয়াজ দিলে, “কর্তা, ঘরে আছেন? কর্তা।” সোনালি “ও মাগো ব্যাঙ।” ব’লে একলাফে একটা গাছের কোটরে গিয়ে লুকোলে। ছ’-ছ’টা কোলাব্যাঙ এসে উপস্থিত। তার মধ্যে সব চেয়ে বড়ো ব্যাঙ এসে হাত নেড়ে কুকড়োকে বললে, “বনে চিন্তাশীল যারা, তাঁদের হয়ে আমরা এসেছি ধ্বংসবাদ জানাতে গানের ওস্তাদ আপনাকে... ওর নাম কী, অনেক গানের আবিষ্কর্তাকে”, আর একজন থপ্ করে বললে, “জলের মতো সহজ গানের”, অমনি তৃতীয় ব্যাঙ থপ্ থপ্ করে বললে, “যত-সব ছোটো গানের”, অমনি অশ্রু বললে, “মজার গানের।”

পঞ্চম, ষষ্ঠ, তারাও থপ্ থপ্ ছপ্ ছপ্ করে এগিয়ে এসে বললে, “সব বড়ো বড়ো গানের... সব পবিত্র গানের।”

ব্যাঙেদের কুকড়োর মোটেই ভালো লাগছিল না, কিন্তু ভয়ভয় খাতিরে তিনি তাদের বসতে বললেন। একটা মস্ত ব্যাঙের ছাতা টেবিলের মতো পাতা রয়েছে, তারি চারি দিকে সবাই বসলেন। সদালাপ চলল। ব্যাঙ বিনয় করে বললেন, তাঁরা কিছুই নয়, অতি হীন। কুকড়ো বললেন, “কিন্তু বড়ো বড়ো চোখ দেখলেই বোঝা যায় তাঁরা খুবই বুদ্ধিজিভি।” কোলাব্যাঙ দাঁড়িয়ে উঠে বললেন, “আমরা বনের মধ্যে একছত্রী সবাই, মোরগদের মধ্যে একমাত্র কুকড়োকে একদিন ভোজ্য দিতে মনস্থ করেছি। আপনার গান পৃথিবীকে আলোকিত, পুলকিত, চমকিত, সচকিত করেছে।” এক ব্যাঙ বললে, “সত্য আপনার গান...” অশ্রু ব্যাঙ আকাশে চোখ তুলে বললে, “স্বর্গীয়।” “অথচ এই পৃথিবীরই।”— অশ্রু ব্যাঙ মাটিতে চোখ নামিয়ে বলে উঠল। সোনাব্যাঙ বললে, “স্বপনপাখির গান, সে কী তুচ্ছ আপনার গানের কাছে।”

কুকড়ো বলে উঠলেন, “কী বললে। স্বপনপাখির গান... তুচ্ছ? ... একি সত্যি? না, তোমরা নিশ্চয় বাড়িয়ে বলছ।” কোলাব্যাঙ গম্ভীর স্বরে বললে, “স্বপনপাখির স্বপ্ন ভেঙে দিয়ে, সত্যিকার গানে বনকে মাতিয়ে তুলে দেয়, এমন একজনের বিশেষ দরকার হয়ে পড়েছে। একটু অদল-বদল না হলে আর পেরে ওঠা যাচ্ছে না।”

কুকড়ো দাঁড়িয়ে উঠে বললেন, “সে কাজটা যদি আমার দ্বারা সম্ভব হয়, তবে আমি রাজি আছি।” সব ব্যাঙ ডেকে উঠল, একসঙ্গে কুকড়োর জয় দিয়ে, “কুক-ড়ো পাহাড়-ত-লির কুকড়ো-পা-হাড়—ত-লির।”

সোনাব্যাঙ গলা ভারী করে বললে, “এইবার স্বপনের দফা রফা হল।” কুকড়ো শুধলেন, “দফা রফা কী রকম।” কিন্তু কে তাঁর কথা শোনে। গলা ফুলিয়ে গান ধরলে সব ব্যাঙ-কটা করতাল বাজিয়ে—

মেঘ হাঁকে, “গড় কর, গড় কর, গড় কর।”

বিষ্টি বলে, “টুপ টাপ, চুপ চাপ, বুপ ঝাপ।”

শিল বলে, “তড়-বড়, গড় কর, গড় কর।”

বাদল ঝরে গড় করি,  
 জলে ভাসে মাঠ, ঘাট আর বাট,  
 এলো বাতাস এলোমেলো,  
 লাক দিয়ে ঝড় এলো  
 ঘাড় ধ'রে ব'লে গেল, “কর্ গড় কর্”... ।

কোলাব্যাঙ ধুয়ো ধরলেন, “কে তারে গড় করে। কে কারে গড় করে।” সোনাব্যাঙ চিতেন গাইলেন, “বাতাস তারে গড় করে, সবাই তারে গড় করে।” ফেরতা গাইলে সব ব্যাঙ, “গড় কর্, গড় কর্। কর্ কর্ গড় কর্। গড় কর্, গড় কর্।” কুঁকড়ো ব্যাঙদের শুধালেন, “স্বপনপাখির গান কেমন।”

ব্যাঙরা বললে, “আমরা কেউ থাকি পাথর-চাপা, কেউ থাকি কুয়োঁর তলায়, আমাদের কানে কেমন ক'রে সে গান আসবে। তবে স্বপন আমরা দেখি বটে, শীতের ক'মাস চব্বিশ ঘণ্টাই। গেছোব্যাঙকে শোখালে হয়, সে স্বপন আর পাখি দুই দেখেছে।”

কুঁকড়ো গেছোব্যাঙকে শুধালেন স্বপনপাখির গানের কথা।

গেছো তার কটকটে আঙুয়াজে পাখির গানের নকল দেখিয়ে দিলে, “দম ফাট্ দম ফাট্। ছয়ো ছয়ো ছয়ো ছয়ো...।” নকলটা মোটেই আসলের মতো হল না, কিন্তু কুঁকড়ো ভাবলেন সত্যিই স্বপনপাখি এমনই গায়, তিনি ব্যাঙদের বললেন, “আহা বেচারা পাখি যদি এই গান গেয়েই খুশি থাকে তো থাক্-না। তার উপর উৎপাত ক'রে কী হবে। মশা মারতে কামান পাতবার কী দরকার।”

ব্যাঙরা বললে, “না মশয়, আপনার গান যেদিন শুনেছি, সেইদিনই বুঝেছি, কী বিজ্ঞী স্বপনপাখিটার গান। আপনার সুর শুনেলে আমাদের যেন ডানা গজিয়ে উঠে উড়তে ইচ্ছে হয়। আর তার গান, ছোঃ।” ব'লে সব ব্যাঙগুলো হাঁচতে লাগল। তাঁর গান শুনে ব্যাঙরা ডানা গজিয়ে সব উড়ে চলেছে এ ছবিটা মনে ক'রে কুঁকড়ো বেশ একটু আমোদ পেলে। ব্যাঙরা তাঁর হাসি দেখে আরো জোরে ছাতা পিটতে লাগল, “জয় কুঁকড়ো, জয় কুঁকড়ো” ব'লে।

সোনালি বেরিয়ে এসে বললে, “এত গোল কিসের।” কুঁকড়ো বললেন, “ব্যাঙরা আমায়

ভোজের নিমন্ত্রণ করছে।” সোনালি অবাক হয়ে শুধলে, “তুমি যাবে নাকি ওদের ভোজতে।” কুঁকড়ো বললেন, “আপত্তি কী। এরা সবাই বুদ্ধিজিভি। আমার গান এদের যদি ডানা গজাবার কাজে লাগে, তবে কেন আমি এদের সে সুখ থেকে বঞ্চিত রাখি। তোমার স্বপনপাখির গান তো সে কাজটা করতে পারলে না, উলটে বরং বেচারাদের দম ফাটিয়ে দেবারই জোঁগাড় করেছে। শোনো-না স্বপনপাখি ওদের কী গানই শুনিয়েছে।” কুঁকড়ো ব্যাঙেদের ইশারা করলেন, আর অমনি তারা সোনালিকে স্বপনপাখির গানের নকল দেখিয়ে দিলে, “দম ফাট্, দম ফাট্, ছয়ো ছয়ো ছয়ো। দম ফাট্ ফাট্ দম, ছয়ো ছয়ো।”

“শুনলে তো।” কুঁকড়ো সোনালিকে বললেন। ঠিক সেই সময় বনের শিয়রে নিশুত রাতের আঁধার কাঁপিয়ে একটি সুর এসে পৌঁছল, “পিয়ো।” কুঁকড়ো সেই মিষ্টি সুর শুনে চমকে বললেন, “ও কে ডাকে?” কোলাব্যাঙ তাড়াতাড়ি ব’লে উঠল, “কেউ নয়, ওই সেই পাখিটা।”

এবার আবার সেই স্বপনপাখির মিষ্টি সুর কুঁকড়োর কানে এল, যেন একটি-একটি আলোর কোঁটা— “পিয়ো, পিয়ো। পিয়ো।” কুঁকড়ো শুনতে লাগলেন। একি পাখির ডাক। না এ স্বপ্নের বীণায় ঘা পড়ছে! সোনাব্যাঙ কী বলতে আসছিল, কুঁকড়ো তাদের এক ধমক দিয়ে সরিয়ে দিলেন। এইবার স্বপনপাখি গান ধরলে,

পিয়ো।

আঁধার রাতের পিয়ো, একলা রাতের পিয়ো।

পিয়ো, ওগো পিয়ো। দিয়ো, দেখা দিয়ো।

আমায় দেখা দিয়ো, একলা দেখা দিয়ো।

আঁধার-করা ঘরে, জাগছি তোমার তরে,

অন্ধকারে পিয়ো, দিয়ো দেখা দিয়ো।

দেখতে দেখতে চাঁদের আলো জ্বলে স্থলে এসে পড়ল। নীল আলোর সাজে সেজে অন্ধকারের পিয়ো যেন বনের আঁধার-করা বাসরঘরে এসে দাঁড়ালেন। স্বপনপাখি আনন্দে গেয়ে উঠল, “পিয়ো, সুধা পিয়ো, সুধা পিয়ো পিয়ো পিয়ো।”

কুকড়ো বলে উঠলেন, “ছি ছি, ব্যাঙগুলোকে বিশ্বাস ক’রে কী ভুলই করেছে। হায়, এ লজ্জা রাখব কোথায়, ওগো স্বপনপাখি।” মধুর সুরে স্বপনপাখির উত্তর এল, “দিনের পাখি তুমি নির্ভীক, সতেজ ডাক দাও, রাতের পাখি আমি আঁধারে ডাকি, ভয়ে ভয়ে মিনতি ক’রে। কিন্তু বন্ধু, তুমিও যাকে ডাক, আমিও তাকে ডাকি। ওরা যা বলে বলুক, তুমি আমি এক আলোরই দূত।”

কুকড়ো বনের শিয়রে চেয়ে বললেন, “গেয়ে চলো, গেয়ে চলো রাত্রির স্বপন। আলোর দূত।”

আবার সুর উঠল আকাশ ছাপিয়ে তারার মধ্যে গিয়ে ঝংকার দিয়ে। বনের সবাই চাঁদের আলোয় বেরিয়ে দাঁড়াল সে সুর শুনে। গাছের তলায় আলো-ছায়া বিছানো, তারি উপরে হরিণ দাঁড়িয়ে শুনছে; কোটরের মধ্যে চাঁদের আলো পড়েছে, সেখান থেকে মুখ বাড়িয়ে বাচ্ছারা সব শুনছে; বনের পোকা-মাকড় পশু-পাখি সবার মনের কথা এক ক’রে নিয়ে স্বপনপাখি বনের শিয়রে গাইছে; জোনাকির ফুলকি, তারার প্রদীপ, চাঁদের আলোর মাঝে—নীল আকাশের চাঁদোয়ার তলায়। ব্যাঙের কড়া সুর থেকে আরম্ভ ক’রে ঝিঁঝির ঝিমে সুরটি পর্যন্ত সবই গান হয়ে এক তানে বাজছে যেন এই স্বপনপাখির মিষ্টি গলায়। কুকড়ো অবাক হয়ে বলে উঠলেন, “এ যে জগৎজোড়া গান, এর তো জুড়ি নেই। স্বপনপাখি কার কানে তুমি কী কথা বলে যাচ্ছ কে তা জানে।” অমনি কাঠবেরালি বললে, “অমনি শুনছি ‘ছুটি হল, খেলা করো’।” খরগোস বললে, “আমি শুনছি ‘শিশিরে-ভেজা সবুজ মাঠে চলো’।” বনবেরাল বললে, “শুনছি ‘চাঁদের আলো এল’।” মাটি বললে, “বিষ্টির ফোঁটা পড়ছে যেন।” জোনাক বললে, “তারা আর তারা।” কুকড়ো তারার দিকে চেয়ে বললেন, “তোমরা কী শুনছ আকাশের তারা।” তারা সব উত্তর করলে, “আমরা নয়নতারার নয়নতারা।”

কাছে সোনাল-পাখি দাঁড়িয়ে ছিল, কুকড়ো তাকে শুধালেন, “আর তুমি কী শুনছ।” সে এক মনে শুনছিল, কোনো কথা কইলে না, কেবল “ওঃ!” বলে নিশ্বাস ফেললে।

কুকড়ো সোনালিকে বললেন, “যে যা ভালোবাসে স্বপনপাখি তাকে সেই গানই শুনিয়ে যায়। আমি কী শুনলেম জানো?—‘দিন এল, গান গাও। ভোর ভয়ি, ভোর ভয়ি...’।”

সোনালি মুখ টিপে হেসে মনে-মনে বললে, “ভোরের বড়ো দেরি নেই, তুমি না গাইলেও ভোর আজ আসে কি না দেখাব তোমায়।”

কুঁকড়ো একেবারে মোহিত হয়ে গান শুনছিলেন; ভোর হচ্ছে, কিন্তু সেটা আজ তাঁর খেয়ালই হল না; তিনি বলে উঠলেন, “ওগো স্বপনপাখি, তোমার এ গানের পরে আর কোন্ লজ্জায় আমি গাইব?” স্বপনপাখি বললে, “গান বন্ধ তো করতে পার না তুমি।” কুঁকড়ো বললেন, “কিন্তু এর পরে সেই রঙ্গুরগে আগুনের মতো রাঙা সুর কি কারো গাইতে হচ্ছে হয়।” স্বপন উত্তর দিলে, “আমার গান আমারি মনে হয় যে, সময়ে সময়ে বড়ো বেশি নীল। আসল কথাটা কী জানো? যে সুরের স্বপ্ন তোমারো মনে, আমারো মনে জাগছে, সেটিকে সুরে বসাতে তোমারো সাধ্য হল না, আমারো ক্ষমতায় কুলোল না কোনোদিন। গানের পরে মন সে বলবেই, হল না হল না, তেমনটি হল না, এ কিছুই হল না।”

কুঁকড়ো বললেন, “সুরের পরশে ঘুম আসবে, তাকেই বলি গান।” স্বপন বললে, “গানের ডাকে জেগে উঠল, কাজে লাগল— তন্দ্রা ছেড়ে, তাকেই বলি গান।”

কুঁকড়ো বললেন, “আমার গান কি কোনোদিন কারু চোখে এক ফোঁটা জল আনতে পারবে।”

স্বপনপাখির উত্তর হল, “আর আমার গান কি কোনোদিন কিছু জাগিয়ে তুলবে। বন্ধু, দুঃখু নেই গেয়ে চলো, যেমন সুর পেয়েছি, ভালো হোক, মন্দ হোক, গেয়ে যাই যতক্ষণ—।”

‘হুম’ ক’রে বন্দুকের শব্দ হল। একটা আগুনের হলকা বিছাতের মতো বনের শিয়রে চমকে উঠল। একটি ছোটো পাখি গাছের শিয়র থেকে কুঁকড়োর পায়ের কাছে বরা পাতার মতো ঝরে পড়ল।

সোনালি চীৎকার করে উঠল, “স্বপনপাখি রে, স্বপনপাখি।” কুঁকড়ো ঘাড় হেঁট ক’রে বলে উঠলেন, “ওরে মানুষ কী নিষ্ঠুর। কী নির্দয়।” স্বপনপাখি তাঁর দিকে কালো চোখ মেলে একটিবার চেয়ে দেখলে, তার পর একবার তার ডানা ছুটি কেঁপে উঠে স্থির হল। সকালের হাওয়া আগুনে-বলমানো রক্তমাখা একটি ছেঁড়া পালক আন্তে আন্তে উড়িয়ে নিয়ে চলল, বনের পথে পথে ছুঁ করে কেঁদে।

হঠাৎ ওদিকের ঝোপঝাপগুলো মাড়িয়ে হাঁস ফাঁস করে হাঁপাতে হাঁপাতে জিম্মা হাজির।

কুকড়ো তাকে দেখে বললেন, “জিন্মা, তুমি এখানে যে। শিকার পৌঁছে দিতে না কি।”

জিন্মা ঘাড় হেঁট করে বললে, “এরা যে জোর করে আমায় শিকারে নিয়ে এল...।”

কুকড়ো এতক্ষণ স্বপনপাখিটিকে আড়াল করে আগলে ছিলেন, এবার সরে দাঁড়িয়ে বললেন, “চেয়ে দেখো কাকে তারা মেরেছে।”

জিন্মা ঘাড় নেড়ে বললে, “আহা যে গাছটি সুরে ভরা দেখবে, সেই গাছেই কি আগে গুলি চালাবে রান্ধসগুলো। আমি আবার এদের হুকুম মানব!”—ব’লে জিন্মা ঘুরে বসল। তার পর, মাটির মধ্যে সব কারা চলাফেরা করতে লাগল, আর দেখতে দেখতে স্বপনপাখিকে পৃথিবী যেন কোলের মধ্যে আস্তে আস্তে টেনে নিতে লাগলেন।

দূরে শিকারীদের শিটি পড়ল। জিন্মা কুকড়োকে চটপট গোলাবাড়িতে ফিরে যেতে ব’লে দৌড়ে চলে গেল শিকারীদের দিকে। এদিকে সোনালি কেবল দেখছিল কখন সকাল হয়। তার ভয় হচ্ছিল বুঝি কুকড়ো এইবার আকাশে চেয়ে দেখেন। কিন্তু কুকড়ো যেমন মাথা হেঁট ক’রে স্বপনপাখির জগে কাঁদছিলেন, সেই ভাবেই রইলেন। সোনালি আস্তে আস্তে তাঁর কাছে গিয়ে বললে, “এসো, আমার বুক মুখ লুকিয়ে কাঁদো।” কুকড়ো নিশ্বাস ফেলে সোনালির কাছে সরে গেলেন, সে ডানায় তাকে ঢেকে নিলে। তার পর সেই সোনার ডানার মধ্যে ঢেকে সোনালি কত ভালোবাসাই জানাতে লাগল, কত মিষ্টি কথা, কত মিনতি, কত ছল। আর ও দিকে সকাল হতে থাকল, অন্ধকার ফিকে হয়ে এল, সব জিনিস স্পষ্ট হতে থাকল। কিন্তু তখনো সোনালি বলছে, “দেখছ আমি তোমায় কী ভালোবাসি।” তার পর হঠাৎ এক সময় ডানা সরিয়ে নিয়ে সোনালি ব’লে উঠল পালক ঝাড়া দিয়ে, “দেখেছ, কেমন সকাল এসেছে, তুমি না ডাকতেই।”

কুকড়ো চমকে আকাশে চাইলেন। তার পর বুক ফেটে তাঁর এমন সুর উঠল যে তেমন কান্না কোনদিন কেউ শোনে নি। তিনি যেন পাষণের মতো স্থির হয়ে গেলেন; আর চোখের সামনে তাঁর সকালের আলো মেঘে আকাশে গাছে ছড়িয়ে পড়তে থাকল।

সোনালি নিষ্ঠুরের মতো বললে, “শেঙলাগুলো রাঙা হয়ে উঠল ব’লে!” “না, কখনো না!” ব’লে সেদিকে কুকড়ো ছুটে যাবেন, দেখতে দেখতে পাখরের গায়ে শেঙলার উপরে সকালের আভা পড়ল আর সেগুলো আঙনের মতো লাল হয়ে গেল। সোনালি বললে, “ওই দেখো

পূর্বদিকে।” কুঁকড়ো “না” ব’লে যেমন সেদিকে চাইলেন, অমনি সোনায় আকাশ ভরে উঠল। “এ কী। এ কী।”—ব’লে কুঁকড়ো চোখ ঢাকলেন। সোনালি বললে, “পূর্বদিক কার হুকুম মানে না, দেখলে তো?”

কুঁকড়ো ঘাড় হেঁট করে বললেন, “সত্যিই বলেছ। মন সেও হুকুম মানে, কিন্তু পূর্বদিক, সে কার নয়। আজ আমি বুঝেছি কেউ কার নয়।”

এই সময় জিন্মা ছুটতে ছুটতে এসে বললে, “গোলাবাড়িতে সবাই চাচ্ছে তোমাকে। পাহাড়তলি আর অন্ধকার করে রেখো না।” কুঁকড়ো জিন্মাকে বললেন, “হায়, এখনো তারা আমাকে আলোর জগ্রে চাচ্ছে? আলো দেব আমি, এ কথা এখনো তারা বিশ্বাস করছে।” জিন্মা অবাক হয়ে রইল। কুঁকড়ো এ কী বলছেন। তার চোখে জল এল। সোনালি এবার সব অভিমান ছেড়ে ছুটে কুঁকড়োর কাছে গিয়ে বললে, “আকাশ আর আলো দুটোই কি আমার এই বৃকের ভালোবাসার চেয়ে বড়ো? দেখো ওরা তো তোমায় চায় না, আর আমার বুক তোমায় চাচ্ছে।”

কুঁকড়ো ভাঙা গলায় বললেন, “হাঁ, ঠিক।” সোনালি ব’লে চলল, “আর অন্ধকার, সে কি আর অন্ধকার থাকে, যদি ছুটি-প্রাণের ভালোবাসার আলো সেখানে—।” কুঁকড়ো তাড়াতাড়ি “হাঁ” ব’লে সোনালির কাছ থেকে সরে দাঁড়িয়ে সপ্তম-সুরে চড়িয়ে ডাক দিলেন, “আলোর ফুল।” সোনালি অবাক হয়ে বললে, “গাইলে যে।”

কুঁকড়ো বললেন, “এবার আমি নিজেকে নিজে ধমকে নিলেম। বারবার তিনবার আমি যা ভালোবাসি, তা করতে ভুলেছি।” সোনালি শুধলে, “কী ভালোবাস শুনি।”

কুঁকড়ো গম্ভীর হয়ে বললেন, “কাজ, আমার যা কাজ তাই।” বলে কুঁকড়ো জিন্মাকে বললেন, “চলো, এগোও।” “গিয়ে করবে কী।” সোনালি শুধলে। “আমার কাজ সোনালি।” “কিন্তু রাত্রি তো আর নেই।”

কুঁকড়ো বললেন, “আছে, সব ঘুমন্ত চোখের পাতায়।”

সোনালি হেসে বললে, “আজ থেকে ঘুম ভাঙানোই বৃষ্টি ব্রত হল তোমার। কিন্তু যাই বল, সকাল তো হল তোমাকে ছেড়ে, তেমনি ঘুমও ভাঙবে তুমি না গেলেও।”



কুঁকড়ো বললেন, “দিমের চেয়েও বড়ো আলোর ছকুমে আমায় চালিয়ে নিয়ে যাচ্ছে সোনালি...।”

সোনালি গাছের তলায় মরা স্বপনপাখিটি দেখিয়ে বললে, “এও যেমন আর গাইবে না, তেমনি তোমার মনের সুরটি কোনোদিন আর ফিরে আসবে না।” ঠিক এই সময় সবাইকে অবাক করে দিয়ে বনের শিয়রে স্বপনপাখি ডাক দিলে, “পিয়ো পিয়ো।” ঠিক সেই গাছটির উপর থেকে যার তলায় রাতের স্বপন এখনো পড়ে আছে ধুলোয়। কুঁকড়ো উপর দিকে চেয়ে শুনলেন যেন আকাশবাণী হল, “শেষ নেই, শেষ নেই, বনের স্বপন অফুর।”

কুঁকড়ো আনন্দে ব'লে উঠলেন, “অফুর সুর, অশেষ স্বপন।” সোনালি বললে, “তোমার বিশ্বাস কি এখনো অটল থাকবে। দেখছ না সূর্য উঠছেন।” কুঁকড়ো বললেন, “কাল যে গান গেয়েছি তারি রেশ আকাশে এতক্ষণ বাজছিল সোনালি।”

এমন সময় পৈঁচাগুলো চৌঁচিয়ে গেল, “আজ কুঁকড়ো গায় নি, কী মজা।” “ওই শোনো, সোনালি, পৈঁচার স্পষ্টই জানিয়ে গেল যে, আলো আজ দেওয়া হয় নি। তাই আনন্দ করছে তারা।” ব'লে কুঁকড়ো সোনালির কাছে গিয়ে বললেন, “সকাল আমিই আনি। শুধু তাই নয়, বাদলে যখন পাহাড়তলিতে দিনরাত ঘন কুয়াশা চেপে এসেছে, দিন এল কি না বোঝা যাচ্ছে না, সেই-সব দিন আমার সাড়া সূর্যের জায়গাটি নিয়ে সবাইকে জানায় ‘দিন এল, দিন এল রে, দিন এল’।”

সোনালি কী বলতে যাচ্ছিল, কুঁকড়ো তাকে বললেন, “শোনো।” সোনালি দেখলে, কুঁকড়ো যেন কতদূরে চেয়ে রয়েছেন, চোখে তাঁর এক আশ্চর্য আলো খেলছে। কুঁকড়ো আস্তে আস্তে বললেন, যেন মনে-মনে, “দূর সূর্যলোকের পাখি আমি। তাই না আমি ডাক দিলে নীল আকাশ ছেয়ে জ্বলে ওঠে সন্ধ্যার অন্ধকারে রাত্রির গভীরে আলোর ফুলকি। আমার দেওয়া আলো কোনোদিন কি নিভতে পারে। না আমার গান বন্ধ হতে পারে? কতদিন গাচ্ছি, কতদিন যে গাইব তার কি ঠিকানা আছে। যুগ যুগ ধরে এমনই চলবে...। আমার পর সে, তার পর সে গেয়ে চলবে— আমার মতো অটল বিশ্বাসে। শেষে একদিন দেখা যাবে আকাশের নীল, তারায় তারায় এমনি ভরে উঠছে যে রাত আর কোথাও নেই, সব দিন হয়ে গেছে— আলোয়

আলোময়।” সোনালি অমনি শুধলে, “কবে সেটা হবে শুনি।” “কোনো এক শুভদিনে।” ব’লে কুঁকড়ো চূপ করলেন।

সোনালি বললে, “আমাদের এই বনটিকে ভুলো না যেন সেদিন।”

কুঁকড়ো বললেন, “কোনোদিন ভুলব না। এইখানেই জানলেম যে, এক স্বপন ভেঙে যায়, আর-এক স্বপন এসে দেখা দেয়, স্বপনের সঙ্গে নিজেও ভেঙে পড়া নয় কিন্তু জেগে ওঠা, নতুন আলোয় নতুন আশা নিয়ে।” সোনালি বুঝলে কুঁকড়ো আর থাকেন না, সে হতাশ হয়ে অভিমানে বলে উঠল, “যাও যাও, সেই খোপের মধ্যে রোজ সন্কেবেলা ঘুম দিয়ো, নিজের অন্তর-মহলে মই বেয়ে উঠে।”

কুঁকড়ো উত্তর দিলেন, “ডানা খুলে উড়তে বনের পাখিরা শিখিয়েছে যে।”

“যাও, সেই বুড়ির মধ্যে মুরগি-গিল্মি এতক্ষণ কাঁদছে।”

কুঁকড়ো বললেন, “মা আমায় দেখে কী খুশিই হবেন।”

জিন্মা বললে, “আর বলবেন পুরোনো চাল ভাতে বেড়েছে রে।” ব’লে কুকুর ঠিক মুরগি-গিল্মির আওয়াজটা নকল করলে। কুঁকড়ো জিন্মাকে বললেন, “চলো যাওয়া যাক। আর কেন?”

সোনালি যেন সে কথা শুনেও শুনলে না। সে দেখতে চায় কুঁকড়ো গেলে তার একটুও কষ্ট হবে না। কিন্তু আপনা হতেই তার চোখ দুটি জলে ভরে এল। কুঁকড়ো তা দেখলেন, তাঁরও মন একটু উদাস হল। শেষে কুঁকড়ো জিন্মাকে সোনালির কাছে ছ-একদিন থাকতে বললেন। জিন্মা অনেক দুঃখ সয়েছে, সে সোনালিকে বোঝাবার জন্তে কিছুদিন বনে থাকাই স্থির করলে। কুঁকড়ো বিদায় নিয়ে এবার সত্যিই চললেন, সোনালি আর থাকতে পারলে না, ছুটে গিয়ে কাঁদতে কাঁদতে তাঁকে বললে, “আমাকেও সঙ্গে নাও।” কুঁকড়ো তার মুখে অনেকক্ষণ চেয়ে থেকে বললেন, “আলোর ছোটো বোন হয়ে থাকতে পারবে কি।” “কখনো না।” ব’লে সোনালি সরে দাঁড়াল। “তবে আসি।” ব’লে কুঁকড়ো এগোলেন। সোনালি রেগে বললে, “আমি তোমায় একটুও ভালোবাসি নে।” কুঁকড়ো তখন মাঝ-পথে ফিরে দাঁড়িয়ে বললেন, “কিন্তু আমি তোমায় সত্যিই ভালোবাসি, কেবল ভাবছি আমার দিনগুলির সঙ্গে যদি তুমি মিলতে পারতে।” বলতে-বলতে কুঁকড়ো বনের আড়ালে বেরিয়ে গেলেন। সোনালি রাগ-ভরে ব’লে

উঠল, “যেমন আমাকে ঠেলে গেলেন, তেমনি পড়েন পাখ্‌মারের পাঞ্জায় তো ডানাছুটি কেটে ছেড়ে দেয়।”

জিন্মা চুপটি করে বসে সোনালির রকম-সকম দেখছে, এমন সময় কাঠঠোকরা নিজের কোটর থেকে মুখ ঝুঁকিয়ে বলে উঠল, “পাখ্‌মারটা কুঁকড়োকে তাগ করছে যে। কী বিপদ।” পৌঁচারি অমনি গাছের উপর থেকে ছুয়ো দিয়ে বললে, “বেশ হয়েছে, খুব হয়েছে, কুঁকড়োর এবারে কর্ম কাবার।” খরগোসগুলো গড় থেকে ছুটে বেরিয়ে এল, একটা বাচ্ছা কান খাড়া করে দেখে বললে, “পাখ্‌মার বন্দুকটা মুচড়ে ভাঙলে যে।” আর একজন অমনি বলে উঠল, “না রে, গুলি ভরছে, দেখছিস না?”

জিন্মার দিকে সোনালি, সোনালির দিকে জিন্মা অবাক হয়ে চেয়ে রইল। জিন্মা, বললে, “ওরা কি কুঁকড়োর ওপরেও গুলি চালাবে।”

সোনালি বললে, “না। সোনালির দেখা যদি পায়, তবে সেইদিকেই বন্দুক ওঠাবে।” ব’লে সোনালি চলল। জিন্মা পথ আগলে বললে, “কোথায় যাও সোনালি।”

“আমার যেটুকু করবার সেই কাজটুকু করতে।” ব’লে বন্দুকের মুখে সোনালি উড়ে পড়তে চলল।

কাঠঠোকরা চেষ্টা করে উঠল, “ফাঁদ। ফাঁদ। ফাঁদটা বাঁচিয়ে সোনালি।” কিন্তু তার আগেই সোনালিকে দড়ির ফাঁদ নাগপাশের মতো জড়িয়ে ফেলেছে। “তারা তাঁকে প্রাণে মারবে।” ব’লে সোনালি ধুলোর উপরে সোনার পাখা লুটিয়ে ফাঁদতে লাগল। তার সব অভিমান চুর হয়ে গিয়ে কান্নার সুরে মিনতি করতে লাগল কেবলি সকালের কাছে, “হিমে সব ভিজিয়ে দাও, বারুদ না জ্বলুক, ভিজে ঘাসে শিকারীর পা পিছলে যাক অগ্নি দিকে। ওগো সকালের আলো, তুমি তোমার পাখিকে রক্ষা করো, যে-পাখি আঁধার দূর করে, আকাশের বাজকে ফিরিয়ে দেয়, সবাই উপর থেকে। ওগো স্বপনপাখি, তুমি গেয়ে ওঠো, তুলে পড়ুক ছরস্তু মানুষের চোখের পাতা, স্বপ্নের রাজ্যে সে ঘুমিয়ে থাক্‌ তার মৃত্যুবাণের পাশাপাশি।”

স্বপনপাখি গেয়ে উঠল বন মাতিয়ে করুণ সুরে, “পিয়-পিয়, ও গোলাপের পিয়, ও আমাদের পিয়।” সোনালি ছুখানি ডানা ধুলোর উপরে রেখে বললে, “আলো। তোমার পাখিকে বাঁচাও,

তার সঙ্গে সেই গোলাবাড়িতেই আমি চিরদিন থাকব, আর কোনোদিন অভিমান করব না তার উপরে।” অমনি সোনালি দেখলে আলো হতে আরম্ভ হল, চারি দিকে পাখিরা গেয়ে উঠল, আকাশ ক্রমে নীল হতে থাকল, বনের ঘুম আস্তে আস্তে ভাঙতে লাগল।

সোনালি মাটিতে মাথা হুইয়ে বললে, “আলোর অপমান, আলোর দূতের অপমান আর আমি করব না। হে আলোর আলো, আমায় ক্ষমা করো, তাঁকে বাঁচাও।” ‘হুম’ ক’রে ওধারে বন্দুক ছুটল, বনের সমস্তটা যেন রী-রী ক’রে শিউরে উঠল, তার পর কুঁকড়োর সাড়া এল, “আলোর ফুলকি।”

“তাগ ফসকেছে। গুলি ফসকেছে।”—পেঁচাটা কেঁদে উঠল। আর অমনি দিকে দিকে পাখি সব “জয় জীব। জয় জীব।” ব’লে কুঁকড়োর জয় দিয়ে উঠল। কোকিল উলু উলু দিয়ে বলতে লাগল, “শুভদিন এল—শুভদিন।” দেখতে দেখতে চারি দিক আলোময় হয়ে উঠল। সেই সময় বনের মধ্যে পায়ের শব্দ উঠল। সোনালি চোখ বুজে চুপ করে শুনতে লাগল, পায়ের ধ্বনি আস্তে আস্তে তালে তালে পড়ছে এক, দুই, তিন। কার ঠাণ্ডা হাতের যেন পরশ পেয়ে সোনালি চোখ খুলে দেখলে, পলাতকা কুঁকড়োকে বৃকের কাছে ধ’রে কুঁকড়োর মনিব। সোনালি পালাবার চেষ্টাও করলে না; কুঁকড়োর পাশে গেরেণ্ডার হয়ে গোলাবাড়িতে চলল। বসন্ত বাউরি পাহাড়তলি মাতিয়ে সুর ধরলে, “কথা কও, বউ কথা কও, কোথা যাও। বউ কোথা যাও। কথা কও, বউ কথা কও।”







